

మత్తయి రాసిన యేసుక్రీస్తు సువార్త మత్తయి రాసిలా యేసుక్రీస్తురొ సువార్త అగరొ కొత

నో నిబందనరె యేసుక్రీస్తురొ జీవితచరిత్ర కొయిలా చార సువార్తలరె మత్తయి సువార్త గుటె ఈనె సొబ్బి పుస్తకాలుకూ సువార్త పుస్తకాలు బులి డక్కునె సువార్త బుల్నే బొల్ల వార్త మత్తయి, మార్కు, లూకా, యోహాను యెడానె యేసు క్రీస్తు మొరిజిల్లా తరవాతరె రాసిసె. మత్తయి సువార్త కెబ్బె రాసిసేవో కచ్చితమైలా తారీకు పండితులుకంకా తెలిసిని. ఈనె యేసుక్రీస్తు జొర్నెలా తరవాతరె క్రీ స సుమారు చోటదొస్ట బొచ్చొరోనెరె రాసిసె బులి కుండెలింకెరొ ఉద్దేశం. సాకిరాక యే పుస్తకం కే చోటురె రాసిసేవో కచ్చితంగా తెలిసిని, ఈనె కుండెలింకె ద్రుస్టిరె యే పుస్తకం పాలిస్తీనా ఇంకా యెరూసలేము పట్నరె రాసిసే బులి కొయిగితోసె.

మత్తయి సువార్త గ్రందకర్తకు యేసుక్రీస్తు తాకు సిస్యడుగా నాడక్కిలా అగరె యెయ్యె పన్నునె వొసూలు కొరిలా తా. తాకు లేవీయుడు బుల్లా నా అచ్చి. మత్తయి పన్నెండులింకె అపోస్తలురె జొనె. మత్తయి యూదునెకోసం రాసిసి. యెడ పుర్ననిబందనరె అరవై ఆదారాలుకు కచ్చితంగా దిగదూసి. తా ఉద్దేశం కిరబుల్నే యేసుక్రీస్తుకు మెస్సయగా దిగదీవురొ, పురువాక రక్సకుడు బులి కొయిలా ప్రవచన పూర్నుడు. పురువురొ రాజ్యం కోసం బడె విసయొనె రాసిసి. మెస్సయ రాజ్యపరమైలా రొజాగా ఆసిబులి యూదునెరొ ఉద్దేశం. ఆత్మసంబందమైలా పురువురొ రాజ్యం కోసం గుటె గొప్పవిసయంకు బోదించితె నవాలుగా కడిగిచ్చి.

నో నిబందన ప్రారంబించితె అగరె మత్తయి సువార్త గుటె బొల్ల పుస్తకం పనికిరి అచ్చి. కిరకుబుల్నే యెడ పుర్ననిబందన పుస్తకాలుకు

మూలమైకిరచ్చి. యెడ పుర్ననిబందనకు నోనిబందనకు సందికొరికిరి అచ్చి. పుర్ననిబందనరె మోసే రాసిలా పాట పుస్తకాలుకూ ఆదారం కొరిగీకిరి రాసిసి బులి అం పండితులురొ ఉద్దేశం. పొరొతంపరె యేసుక్రీస్తురొ ప్రసంగం మత్తయి 5-7 ఇంకా పురువు మోసేకు దర్మసాస్త్రం దిల్లీసిబులి పొల్చికిరి 19:3-23; 25 కొయిసి.

సంగతినె

1. యేసు క్రీస్తురొ జొర్నొ కోసం ఇంకా తా సువార్త సేవ ప్రారంభించువురొ 1-4
2. యేసు క్రీస్తురొ పరిచర్య ఇంకా తా బోదానె వివరించువురొ 5-25
3. ఆకరుగా గొప్ప పరిచర్య ఇంకా మొర్నొ, పునరుద్ధానం గురించి 26-28

యేసు క్రీస్తురొ వంసావలి

(లూకా 3:23-38)

¹ యేసు క్రీస్తు వంసావలి యాకిరి రొయితప్పి, ఎయ్యె దావీదు రొజా యింకా అబ్రాహాము వంసంలంకు చెందిలాలంకె.

² అబ్రాహాము పో ఇస్సాకు. ఇస్సాకు పో యాకోబు. యాకోబు పో యూదా ఈనె తా అన్నబయినె.

³ యూదా తామారు వల్లరె పో పెరెను ఈనె జెరహు. పెరెను పో ఎస్రోము పో ఆరాము

⁴ ఆరాము పో అమ్మీనాదాబు. అమ్మీనాదాబు పో నయస్సోను. నయస్సోను పో సల్మాను

⁵ సల్మాను పో బోయజు. బోయజు మా రాహాబు. బోయజు పో ఓబేదు. ఓబేదు మా రూతు. ఓబేదు పో యెస్సయి.

⁶ యెస్సయి పో రొజా యిలా దావీదు. దావీదు పో సొలోమోను.*

⁷ సొలోమోను పో రెహబాము. రెహబాము పో అబీయా. అబీయా పో ఆసా.

⁸ ఆసా పో యెహోసాపాతు. యెహోసాపాతు పో యెహోరాము. యెహోరాము పో ఉజ్జియా.

* 1:6 సొలోమోనురొ మా పూర్వం ఊరియారొ నెయిపొ .

9 ఉజ్జయా పో యోతాము. యోతాము పో ఆహాబు. ఆహాబు పో హిబ్జియా.

10 హిబ్జియా పో మనస్సే తా పో ఆమోను. ఆమోను పో యోసియా.

11 యోసియా పో యెకొన్యా ఈనె తా బయినె. యంకె తల్లాబెల్లె ఇస్రాయేలీయులు బబులోను గాకు బందీలుగా రొయితవ్వె.

12 బబులోను గాకు జెల్లా తరవాతరె వంసం యాకిరి అచ్చి, యెకొన్యా పో సయల్తీయేలు. సయల్తీయేలు పో జెరుబ్బాబెలు.

13 జెరుబ్బాబెలు పో అబీహూదు. అబీహూదు పో ఎల్యాకీము. ఎల్యాకీము పో అజోరు.

14 అజోరు పో సాదోకు. సాదోకు పో ఆకిము. ఆకిము పో ఎలీహూదు.

15 ఎలీహూదు పో ఎలియాజరు. ఎలియాజరు పో మత్తాను. మత్తాను పో యాకోబు.

16 యాకోబు పో యోసేపు. యోసేపు నెయిసా మరియు. మరియు పో యేసు. తాకు క్రీస్తు బులుసె.

17 ఈనె అబ్రాహాము దినోనె దీకిరి దావీదు జాంక పద్నాలుగు తరాలు. దావీదు తీకిరి యూదునె బబులోను గాకు బందీలుగా తల్లా దినోనె జాంక పద్నాలుగు తరాలు. బబులోను చెరకు జెల్లా దినోనె దీకిరి క్రీస్తు వరుకు పద్నాలుగు తరాలు.

యేసు క్రీస్తు జొర్రైవురొ

(లూకా 2:1-7)

18 యేసు క్రీస్తు జొర్రైవురొ యాకిరి అచ్చి, యేసు క్రీస్తు మా మరియుకు, యోసేపు బుల్లా మనమ సంగరె ప్రదానమైకిరి అచ్చి. బ్యాకు అగరె పురువు ఆత్మసక్తి సంగరె మరియు పెట్టొ సంగరె అచ్చి.

19 ఈనె తా గొయిత యోసేపు బొల్టమనమ సడకు సెయ్యె తాకు సార్లింకె బిత్తరె అవమానం కొరిలాని. కాకు నా బుజ్జికుంటా తాకు సడదిమ్మంచె బులిగిచ్చి.

20 సెయ్యో సా బులిగిల్లా తరవాతరె, దేవదూత తాకు సొప్పొరె దిగదీకిరి, దావీదు పో యీలా యోసేపు మరియు పురువు ఆత్మ సంగరె పనిదీగిచ్చి. తాకు తో నెయిపొగా అంగీకరించితె దొరితెనా.

21 మరియు జొనె వొండ్ర పోకు జొర్నొదూసి. సెయ్యో తా మనమానుకు తంకు పాపొనె దీకిరి రక్సించుసి. సడకు తాకు యేసు బులికిరి నా లొగు బులి కొయిసి.

22 ప్రబువు తా ప్రవక్త సంగరె పలికిలా కొతా నెరవేరిలాపనికిరి యడల్లా జరిగిసి.

23 ఈనె కన్యక పనిదీగికిరి వొండ్ర పోకు జొర్నొదూసి. తంకె తాకు ఇమ్మానుయేలు బులి నా సంగరె డక్కుసి. “ఇమ్మానుయేలు బుల్నే పురువు అముకు తోడు బులి అర్దం.”

24 యోసేపు గుమ్మొదీకిరి ఉటికిరి దేవదూత తాకు ఆజ్ఞాపించిలాపని కొరిసి. మరియుకు బ్యా కొరిగీకిరి తా గొరొకు కొనిగీకిరి జేసి.

25 ఈనె, సెయ్యో పో జొర్నొలా జాంక మరియు దీకిరి మిసిలాని. సెయ్యో సే వొండ్ర పోకు “యేసు” బులి నా లొగిసి.

2

తూర్పు దెసొ మనమానె దర్శించితె అయివురొ

1 రొజా యీలా హేరోదు దినోనె బెల్లె యూదయ దెసొరె బేత్లెహేమురె యేసు జొర్నొలా ఎంట్రాక ఇదిగొ తూర్పు దెసొలింకె యెరూసలేముకు అయికిరి.

2 “యూదునెకు రొజగా జొర్నొలాట కేటె? తూర్పురె అమె నక్సిత్రం దిక్కిరి తాకు పూజించితె అయింఁచొ” బులి కొయిసె.

3 రొజా యీలా హేరోదు యే కొతా సునిలా బెల్లె సెయ్యో, తాదీకిరి తల్లా యెరూసలేమురొ మనమానల్లా కలవరం పొడిసె.

4 ఈనె హేరోదు *ప్రదానయాజకూనెకు, మనమానె బిత్తరె తల్లా †సాస్త్రీనెకు సొబ్బిలింకు సమకూర్చికిరి, క్రీస్తు కేట జొరైవో? బులి తంకు పొచ్చురిసి.

5 తంకె “యూదయ దెసో బుల్లా బేత్లేహేమురె” బులి సమాదానం కొయినె. ఎడగురించి ప్రవక్త యాకిరి రాసిసి.

6 యూదా దెసారొ బేత్లేహేము! తూ యూదయ పాలకులకన్నా తక్కువ ఈలాటను! కిరుకుబుల్చే, తోబిత్తరెతికిరి జొనె పాలకుడు అయివాసి.

నెయ్యె మో మనమానె యీలా ఇస్రాయేలుకు జొగిలొతాగా తాసి.

7 సే తరవాతరె హేరోదు తెలివిలింకు రహస్యంగా డక్కిపించికిరి సే నక్సత్రం తంకు దిగదిల్లా కలొ తెలిసిగిచ్చి.

8 తంకు బేత్లేహేముకు పొడదీసి. “సే జొరైవోలా పిల్ల గురించి పూర్తిగా తెల్సిగిండి, సే పిల్లాసుకు దిగిలా తరవాతరె మెత్తె అయికిరి కోండి, నెల్లె మియ్యంకా అయికిరి ఆరాదించుంచి” బులి కొయినె.

9 తంకె రొజా కొతానె సునికిరి తంకె బట్టరె తంకె బాజీసె. తంకె తూర్పు దిక్కురె దిగిలా నక్సత్రం తంకు అగరె జేకిరి సే పిల్లాసా రొల్లా గొరొ ఉంపరె టారిసి.

10 తంకె సే నక్సిత్రముకు దిక్కిరి బడే సంతోసించినె.

11 గొరొ బిత్తరుకు జేకిరి సే సన్నిపిల్లాసుకు తంకె మా మరియు దీకిరి తవ్వరొ దిగినె. తంకె తా అగరె మోకరించికిరి పురువుకు ఆరాదించినె. సే తరవాతరె తంకె దన్నెలా మూటానె పిటికిరి తాకు విలువైలా కానుకానె సున్న, సాంబ్రాని, బోలం, పురువుకు సమర్పించినె

12 పురువు తంకు హేరోదు పక్కు జేతెనాబులి సే తెలివిలింకెకు హెచ్చరించినె. సడకు తంకె దెసాకు తంకె ఇంగుట బట్టరె బాజేసె.

ఐగుప్తుకు బాజెవురొ

* 2:4 24 గుంపునె కలిగిలా యూదునెరొ యాజకూనెకు నాయకులు అంకు సద్దుకయులు బులికిరి కూడా డక్కునె † 2:4 మోసే దిల్లా దర్మసాస్త్రంకు చదివికిరి ప్రజానెకు వివరించిలా నాయకులునె

13 తంకె బాబెల్లా తరవాతరె దేవదూత యోసేపుకు సొప్పొరె దిగదీకిరి, “ఉటు! హేరోదు పిల్లాసాకు మొరదిమ్మాసిబులి తా కోసం కుజ్జలీసి. మా, పిల్లకు దరిగీకిరి ఐగుప్తు దెసాకు బాబా! మియి కొయిలా జాంక సెట్టాక రో” బులి కొయిసి.

14 యోసేపు ఉటికిరి మా, పిల్ల దీకిరి నే రత్తిరాక ఐగుప్తు దెసాకు బయలుదేరిసి.

15 యోసేపు హేరోదు మొరిజిల్లా జాంక సెట్టాక రొయిజీసి. సెత్తెలె ప్రబువు ప్రవక్త దీకిరి, “మియి మో పోకు ఐగుప్తు దీకిరి డక్కించి” బులి కొయిలా కొత సొత్తయిసి.

సన్నిపిల్లాసుకు మొరదివ్వరొ

16 జ్ఞానులు హేరోదుకు మోసం కొరిసె బులి రగ్గొ సంగరె సిజ్జిజేసి. నెయ్యె తంకె కొయిలా కొత దీకిరి బేత్తెహేమురె, నే పక్కరె గానె దీట బొచ్చురోనె దీట బొచ్చురోనె కన్నా సన్ని వయస్సు రొల్లా మొడ్రపో పిల్లానుకల్లా మొరిదీపేండి బులి ఆజ్ఞాపించిసి.

17 యాకిరి యిర్మీయా ప్రవక్త దీకిరి ప్రబువు కొయిల ఏ వినయం సొత్తయిసి.

18 “రామా బుల్లా పట్టనంరె బడే దుక్కం తీకిరి కంద సుందీసి.

రాహేలు తా పిల్లానె కోసం కందిలీసి.

ఓదార్చితె కేసె నింతె.

తా లింకె కేసె మిగిల్లానింతె.”

ఐగుప్తు తీకిరి బుల్లికిరి అయివురొ

19 హేరోదు మొరిజిల్లా తరవాతరె దేవదూత ఐగుప్తురె రొల్లా యోసేపుకు సొప్పొరె దిగదీకిరి,

20 “ఉటు! పిల్లాసుకు పొర్నొ కడిమాబులి దిగిలాలింకె మొరిజీసె. ఈనె మాకు, పిల్లకు దరిగీకిరి ఇస్రాయేలు దెసాకు జా” బులి కొయిసి.

21 సడుకు యోసేపు ఉటికిరి మాకు, పిల్లకు సంగరె ఇస్రాయేలు దెసాకు అయిసి.

22 ఈనె యూదయ దెసాకు హేరోదు చోటురె తా పో అర్రెల్లా పాలించిలి బులికిరి నునికిరి సెట్టికు జేతె డొరిజేసి. తాకు గుటె సాప్పొ అయిసి. సే సాప్పొరె ప్రబువు తంకు బోదించిలందరె సెయ్యె గలిలయ ప్రాంతముకు జేసి.

23 సెట్టికి జేకిరి నజరేతు బుల్లా గారె రొయితవ్వె. సెల్లె “సెయ్యె నజరేతురె రొల్లా మనమబులి” డక్కుసె బులి పురువురొ ప్రవక్తనె సంగరె కొయిలా కొత సొత్తయిసి.

3

బాప్టీసం దిల్లా యోహాను బోదించివురొ

(మార్కు 1:1-8; లూకా 3:1-18; యోహాను 1:19-28)

1 సే దినోనై బాప్టీసం దిల్లా యోహాను, యూదయ దెసారె బొనొరె వాక్యం ప్రకటించితవ్వె.

2 సెయ్యె పురువురొ రాజ్యో అముకు పక్కరాక అచ్చి ఈనె తొమె చెడుపైటీనె సడదేండి బులి కొయిసి.

3 యోహాను గురించి పురువు యెసయా ప్రవక్త సంగరె యాకిరి కొయిసి.

“ప్రబువు కోసం బట్టొ సిద్ధం కొరుబులికిరి,

బట్టొ బొలుకొరుబులికిరి,

బొనొరె గుటె గొలాసుందిసి.”

4 యోహాను పొగ్గిల్లా కొన్నానె ఒంటురొ బల్లోనె దీకిరి కొరిలాంచ. వొంటకు సామ్మె దొగుడి బందిగీకిరి, తా కద్ది మిడతానె, బొనొతేనె కైకిరి జితై.

5 మనమానె యెరూసలేము తీకిరి, యూదయ, యెర్దాను వొద్దొ పక్కరెత్తల్లా గాండ్రెతీకిరి యోహాను పక్కరకు అయికిరి.

6 తంకె కొరిలా పాపోనె ఒప్పిగినికిరి యోహాను సంగరె యెర్దాను వొద్దొరె బాప్టీసం కడిగిచ్చె.

7 యోహాను బాప్టిసం దిల్లబెల్లె సెటుకు పరిసయ్యునె, సద్దుకయ్యునె, అయినె సెల్లె యోహాను “తోమె సప్పొవనా మనమనే! పురువురో రగ్గతీకిరి తప్పించిగితై తొముకు బుద్ది కొయిలాలింకె కేనె?

8 తోమె పాపొనెకు సడదీకిరి తోమె మనుసు మార్చిగీకిరి యెడానె కొరండి.

9 ‘అబ్రాహాము అం బో’ బులి కొయిగీకిరి తోమె యే సిక్సతీకిరి తప్పించిగిమాసి బులి కొయిగిల్లిసానా? ఈనె ఏ పొత్తొనె దీకిరి పురువు అబ్రాహామురో పిల్లనె ఈలావనికిరి కొరిపారి బులి మియి కొయిలించి.

10 ఉంచినాక గొడ్డలి గొచ్చొనె సెరోనె ఉంపరె అనితె అచ్చి. బొల్ల పొగలానె నాదిల్లా ప్రతీ గొచ్చుకు అనిపేకిరి నియ్యరె పొక్కుదివ్వొ.

11 తోమె మారుమనుసు పొందిసా గనుక మియి తొముకు పని సంగరె బాప్టిసం దిల్లించి. ఈనె మో తర్వాతరె అయితల్లాట మో కన్నా సక్తి యీలాట! తా చెప్పిలీనె బొయితె కూడా మియి సారుపొడుని. నెయ్యె తొముకు పవిత్రాత్మ దీకిరి, నియ్యదీకిరి, బాప్టిసం దూసి.

12 తా కుల్ల తా అత్తరె అచ్చి తా కొలకు బొలికొరికిరి తా దన్నొకొట్టురె పొక్కిరి, పొట్టుకు నానూజిల్లా నియ్యరె పొక్కిరి పుడ్డిపివొ” బులి కొయిసి.

యేసు బాప్టిసం కడిగివురో

(మార్కు 1:9-11; లూకా 3:21-22)

13 యేసు గలిలయ తీకిరి యొర్దాను వొడ్డొ పక్కు అయికిరి సే సమయంరె యోహాను అత్తరె బాప్టిసం కడిగితై అయిసి.

14 ఈనె యోహాను తాదీకిరి, “తో సంగరె మియి బాప్టిసం కడిగిమాసి, ఈనె తువ్వు మో సంగరె బాప్టిసం కడిగితై అయివురో కిడా?” బులి కొయికిరి యేసుకు ఆపితె ప్రయత్నించిసి.

15 యేసు సమాదానం దీకిరి, “ఉంచునుకు ఎడ యీమురో. నీతి కోసం యాకిరి కొరువురో అముకు బొల్లాక!” బులి కొయిసి. ఎడకు యోహాను ఒప్పిగిచ్చి.

16 యేసు బాప్టిసం పొందిగీకిరి ఎంట్రాక, పనిబిత్తరె తీకిరి దోరకు అయిసి, యిత్తో మెగో పిటిగిచ్చి, పురువురో ఆత్మ గుటె పావురం పనికిరి వొల్లికిరి తా ఉంపరకు అయివురో యేసు దిగిసి.

17 ఈనె యిత్తో యెయ్యక మో యిస్టమైలా పో, ఆ ద్వారాక మీ ఆనందించిలించి బులి గుటె సబ్బం మెగోతీకిరి అయిసి.

4

యేసుకు అయిలా సోదన
(మార్కు 1:12; 13; లూకా 4:1-13)

1 సే తరవాతరె అపవాది దిల్లా సోదనానె ఎదిరిగిమ్మాసి బులికిరి, పురువురో ఆత్మ యేసుకు బొనో ప్రదేసంకు కొనిగిజేసి.

2 సెట్టె యేసు నలపై దినోనే రత్తిదూసు ఉపాసం కొరిసి. సే తరవాతరె తాకు బొక్కొ లగిసి.

3 అపవాది తా పక్కు అయికిరి, “తూ పురువురో పో యీనె ఏ పొత్తొరొనుకు రొట్టెలుగా ఆజ్ఞాపించు” బులి కొయిసి.

4 యేసు నమాదానం దీకిరి, “మనమకు జీపించిలాట కేవలం కద్దాక నీయి. ఈనె లేకనానె తల్లాపనికిరి పురువు కొయిలా ప్రతీ కొత వలరె జీపారి బులి రాసికిరి అచ్చి” బులి కొయిసి.

5 సే తరవాతరె అపవాది పురువుకు పరిసుద్ద పట్నం ఈలా యెరూసలేముకు కొనిగిజేసి. సెట్టె మందిరం ఉంపరె గుటె సికరమంపరె టారదీకిరి,

6 తువ్వ పురువురో పొ యీనె తొల్లుకు గెంతు, కిరుకుబుల్నే “తొత్తె సహాయం కొరుబులికిరి, పురువు తా దూతానెకు కొయివో. తంకె అయికిరి తొ పాదంకు కే పొత్తొ నాబయికుంటా తొత్తె తంకె అత్తొనే దీకిరి టెక్కికిరి కొగ్గునుసె బులి రాసికిరి అచ్చి” బులి కొయిసి.

7 యేసు తా దీకిరి, “తొ ప్రబుయాల పురువుకు పరిక్సించినాసి బులికిరంకా లేకనాలై రాసికిరి అచ్చి” బులి కొయిసి.

8 అపవాది తాకు బడే డెంగరొల్లా గుటె పొరొతో ఉంపురుకు కొనిగి జేకిరి తాకు దెసోనెరో రాజ్యాలుకు, సడాన్రో మహిమకు దిగదీసి.

9 “తూ మో అగరె ముడుకూనె పొక్కిరి మెత్తె పూజించినె ఎడల్లా తొత్తె దూంచి బులి” అపవాది కొయిసి.

10 యేసు సమాదానం కొయికుంటా, “అపవాది! మో అగరెతీకిరి బాజా, కిరుకుబుల్నే ‘తొ ప్రబుయీల పురువుకాక మొక్కిమంచి. తా సేవ మాత్రమాక కొరుమంచి’ బులి కూడా లేకనాలె రాసికిరి అచ్చి.”

11 సెల్లె అపవాది తాకు సడదీకిరి బాజీసి. తర్వాతరె దేవదూతానె అయికిరి యేసుకు పరిచర్య కొరినె.

యేసు గలిలయరె తా పరిచర్య ప్రారంభించువురో

(మార్కు 1:14; 15; లూకా 4:14; 15)

12 సెల్లె యోహాను చెరసాలరె అచ్చిబులికిరి సునికిరి యేసు గలిలయకు బులికిరి అయిసి.

13 సెయ్యె నజరేతుకు సడదీకిరి, సెట్టెతీకిరి కపెర్నహూము బుల్లా గాకు జేకిరి సెట్టె రొయితవ్వి. కపెర్నహూము, జెబూలూను ఇంకా నష్టాలి గానె పక్కరె ఒడ్డొ ఒడ్డురె అచ్చి.

14 యెయ్యె కొరివురో వల్లరె పురువు యెసయా ప్రవక్త సంగరె కొయిల కొతానె సొత్తయిసి. యెసయా ప్రవక్త యాకిరి కొయిసి,

15 జెబూలూను ప్రాంతము,

నష్టాలి ప్రాంతము, సోంద్రొ పక్కరె రొల్లా యే మనమానె,

యొర్దాను ఒడ్డుకు తెనాడె పొక్కరె రొల్లా గానె!

యూదునెనీలాలింకె తంకె రొల్లా ఓ గలిలయా!

16 వొందారె రొల్లా మనమానె గొప్ప వెలుతురు దిగుసె!

మొర్నొ పొడిల గానె రొయితల్లా మనమానె వుంపరె వెలుతురు అయిసి.

17 సెల్లె తీకిరి యేసు, “పురువురో రాజ్యొ పక్కరాక అచ్చి. ఈనె మారుమనుసు పొందిగిండి!” బులి వాక్యం ప్రకటించువురో మొదలు కొరిసి.

యేసు చార్లింకు మచ్చర్లింకు డక్కువురో

(మార్కు 1:16-20; లూకా 5:1-11)

18 యేసు గలిలయ సొంద్రో ఒడ్డున సలుకుంటా పేతురు బులి డక్కితల్లా సీమోనుకు, తా బయి అంద్రెయకు దిగిసి. తంకె సెల్లె సొంద్రో బిత్తరె వల పొక్కుంటా అచ్చె; తంకె మచ్చర్లింకె.

19 యేసు తంకు దిక్కిరి, “మెత్తె అనుసరించొండి! తొముకు మనమానుకు దరిలాపని కొరిమి” బులిసి.

20 ఎంట్టాక తంకె వలలకు నడిదీకిరి తా పొచ్చాడె జేసె.

21 యేసు సెట్టె దీకిరి జేకుంటా దీలింకు దిగిసి. తంకె కూడా బయినె. జొనెరో నా యాకోబు, యింకజొనెరో నా యోహాను. బోరో నా జెబెదయి. సే అన్నబయినె తంకె బో దీకిరి మిసికిరి పడవరె బొసిరికిరి వలానె బొలికొరిగిల్లీసె. యేసు తంకు డక్కిసి.

22 తంకె ఎంట్టాక పడవకు, తా బోకు నడదీకిరి తా పొచ్చాడె జేసె.

యేసు బోదించువురో, ప్రకటించువురో, బొలికొరువురో
(లూకా 6:17-19)

23 యేసు యూదునెరో ప్రార్థన స్థలమురె బోదించుకుంటా పురువురో రాజ్యం గురించి నువార్త కొయికుంటా గలిలయ ప్రాంతముల్లా బుల్లిల్లిసి. సెయ్యె మనమానొ ప్రతి రోగము యింకా జబ్బునుకు బొలికొరిసి.

24 తా కీర్తి సిరియా దెసల్లా యే వార్త వ్యాపించిసి. మనమానొ రకరకాల రోగోనే రొల్లాలింకు, బాదపొడిలాలింకు, బుత్తోనె దరిలాలింకు, మూర్చ జబ్బులింకు, పక్సవాత జబ్బులింకు, తా పక్కు డక్కిగీకిరి అయినె సెయ్యె తంకు బొలికొరిసి.

25 గలిలయ తీకిరి, దొన్ఱ పట్టనమూనె తీకిరి, యెరూసలేము తీకిరి, యూదయ తీకిరి, యెర్దాను ఒడ్డొ తెనాడె రొల్లా ప్రాంతమూనె తీకిరి మనమానె గుంపునె గుంపునెగా తాకు అనుసరించిసె.

5

పర్వతమంపరె బోదించువురో

1 ఈనె యేసు బడే మనమానుకు దిక్కిరి పొరొతో ఉంపరకు జేకిరి బొసిరిసి. సే తరవాతరె తా సిస్యూనె తా పక్కు జేసె.

2 యేసు యాకిరి ఉపదేశించివురో మొదలు కొరిసి.

సొత్తెలా సంతోసం
(లూకా 6:20-23)

³ ఆత్మ వినయమురె దీనులుగా తల్లాలింకె దన్యూనె;
పురువురొ రాజ్యం తంకట.

⁴ దుక్కొ.పొడిలాలింకు పురువు ఓదార్చుసి.
ఈనె తంకె దన్యూనె.

⁵ నెమ్మది మనస్సు తల్లాలింకె బూమికి వారసులూనె.
ఈనె తంకె దన్యూనె.

⁶ నీతి న్యాయం కోసం ఆసక్తి రొల్లాలింకె దన్యూనె.
సడ వల్లరె తంకె త్రుప్తి పొడివె.

⁷ పొదర్లింకంపరె కనికరం తల్లాలింకె దన్యూనె. పురువురొ
కనికరం పొందివె. ఈనె తంకె దన్యూనె.

⁸ పవిత్ర హృదయం కల్గిలాలింకె దన్యూనె,
తంకె పురువుకు దిగునె.

⁹ సమాదానపర్చిలాలింకె దన్యూనె;
తంకు పురువురొ పొనె బులి డక్కునె.

¹⁰ పురువురొ ఇష్టంకు జరిగించితె హింస పొడిలాలింకె దన్యూనె;
పురువురొ రాజ్యం తంకట.

¹¹ మెత్తె అనుసరించువురొ వల్లరె మనమానె తొముకు
నిందించునె, హింసించునె, తొమంపరె విరోధంగా నిందానె పొగిలా
బెల్లె తొమె దన్యూనె.

¹² సంతోసించొండి ఆనందించొండి, తొముకు పరలోకంరె తొం
పలం బడేట వూసి. ఈనె తొమె దన్యూనె. యాకిరి తొముకు
హింసించిలాపనికిరాక తొముకన్నా అగరె తల్లా ప్రవక్తానెంకా
హింసించబొడిసె.

నున్నొ, బొత్తి
(మార్కు 9:50; లూకా 14:34,35)

13 తొమె యే లోకంరె నున్నొపనాలింకె, ఈనె నున్నొరె తల్లా గునొ జెన్నే సడకు నున్నొగా క్యాకిరి కొరిపారొ? సడ కిరుకు నాపైటికైకుంటా ఈజుసి. మనమానె సడకు మండిపేకిరి సలుసె.

14 తొమె యే లోకంరె హల్లో పనాలింకె. పొరొతో ఉంపరె తల్లా పట్టుంకు మరుగు పరుచువురొ సాద్యమైని.

15 మనమానె బొత్తికి పుడ్డికిరి కుంచ తొల్లె లొగినింతె ఈనె సడ గొరొ బిత్తరె తల్లాలింకల్లా హల్లో దీతందుకు బొత్తి స్తంబమంపరె లొగివె.

16 సాకిరాక తొ జికానె హల్లోదీకిరి ప్రకాసించుమాసి. నెల్లె పొదరిలింకు తొమె కొరిలా బొల్ల పైటినె దిక్కిరి పరలోకంరె తల్లా తొ బో స్తుతించబొడివో.

దర్మసాస్త్రం గురించి బోదించువురొ

17 మియి దర్మసాస్త్రంకు ఈనన్నా, ప్రవక్తనెరొ కొతానెకన్నా రద్దు కొరితె అయింబి బులి కొయిగిత్తెనాండి. మియి సడకు రద్దు కొరితె అయిలాని. సడకు కొరితాక అయింబి.

18 మెగొ బూమి గతించుసి గాని, దర్మసాస్త్రమురె సన్ని అక్కరం ఈనెను, పొల్లు ఈనెను గుటె సున్నా ఈనెను తప్పిజెన్నీ బులి కచ్చితంగా తొముకు కొయిలించి.

19 ఈనె యే ఆజ్ఞానెరె కే సన్నీట ఈనెను సారాక మిసికిరి, నెయ్యె పొదరిలింకు సాకిరి కొరుబులికిరి బోదించిలా మనమ పురువురొ రాజ్యంరె తక్కువ మనమపనికిరి బచ్చుసె. ఈనె సే ఆజ్ఞానె సాబ్బీ పాటించికిరి సడకు బోదించిలాట పురువురొ రాజ్యంరె గొప్పీటపనికిరి బులుగుచ్చె.

20 కిరుకుబుల్చే, తొమె సాస్త్రీనెకన్నా పరిసయ్యునెరొ నీతి కన్నా తొ నీతి ఎక్కువగా నారొన్నె పురువురొ రాజ్యం బిత్తురుకు జెన్నారొ బులికిరి తొ సంగరె కొయిలించి.

రగ్గొ కోసం బోదించివురొ

21 సే కలోసురె బొడిలింకె కొయిలాట తొమె సునిసొ నీనా మొరదినాసి మొరదిల్లాలింకు సిక్స పొడుసి.

22 మియి కొయిలాట కిరబుల్నే, తా అన్నబయి ఉంపరె రగ్గోపొడిల ప్రతి మనమకు సిక్కు తప్పిని. తా అన్నబయి పైటి నాఅత్తరైలా మనమ బులి కొయిల ప్రతి మనమ మహసబరే సమాదానం కొయిమంచి. తా అన్నబయికు మూర్కుడా బులి కొయిలా ప్రతి మనమ నరకంరె నియ్యపాలు వూసి.

23 ఈనె తు, తో కానుక బలిపీటం పక్కరె లొగిల అగరె, తో అన్నబయికు తోఉంపరె కిరన్నా కారనంరె రగ్గో అచ్చి బులికిరి గుర్తు అయినె,

24 తో కానుక సెట్టాక బలిపీటం పక్కరె సడిదీకిరి బాజా. జేకిరి తో అన్నబయిదీకిరి అగరె రాజీపొడు. సే తరవాతరె అయికిరి తో కానుకకు అర్పించు.

25 “తూ తో ప్రతివాది దీకిరి బట్టరె తల్లబెల్లాక తాదీకిరి రాజీ పొడు”. ఈనె సెయ్యె సాకిరి నాకొరినె తొముకు న్యాయాదిపతికు అప్పగించుసి. సే న్యాయాదిపతి తొముకు బటుడుకు అప్పగించుసికివో, సే బటుడు తొముకు చెరసాలరె పొక్కుదివొచ్చు.

26 యెడ సొత్తాక తొమె దివ్వలిసిలా చివరికాసు దిల్లాజాంక తొమె సే చెరసాలరె దీకిరి పొదరకు అయినారో.

దర్పిపైటి కోసం బోదించివురో

27 దర్పిపైటి కొరితెనాండి బులి కొయిలాట తొమె సునిసా నీనా.

28 ఈనె మియి కొయిలాట కిరబుల్నే, జొనె తిల్లిపిల్ల ఆడుకు కామం దీకిరి దిగినే, హుదయంరె తాదీకిరి దర్పిపైటి కొరిలాపనికిరాక.

29 తు పాపం కొరితె తో కైలాఅంకి కారనంయినె సడకు కడికిరి పొక్కుదేండి. తో దే అల్లా నరకంబిత్తరె పొడిలకన్నా తో దేరె గుట బాగం వొరదీగిన్నే బొల్లు.

30 తు పాపం కొరితె తో కైల అత్తో కారనంయినె సడకు అనికిరి పొక్కుదేండి. తో దే అల్లా నరకం బిత్తరె పొడిలాటకన్నా తో దేరె గుట బాగం వొరదీగిన్నే బొల్లు.

విడాకులు గురించి యేసు బోధించివురో
(మత్తయి 19:9; మార్కు 10:11,12; లూకా 16:18)

31 తా నెయిపొకు విడాకులు దివ్వొలిసిలాట కేసన్నా తా నెయిపొకు విడాకులు పత్రం దిమ్మించిబులి కొయిసి.

32 ఈనె మియి కొయిలాట కిరబుల్నే నైపో ఉంపరె దర్పిపైటి కారనం నీకుంటా గొయిత తాకు విడాకులుదిన్నె సెయ్యె దర్పిపైటి కొరిలాపని పరిగనింపబోడతె సెయ్యె కారనం ఉంసి. సాకిరాక విడాకులు పొందిలా తిల్లాపిల్లకు బ్యా కొరిగిన్నె దర్పిపైటికొరిలపనికిరి పరిగనింపబోడునె. దర్పిపైటి కారనంసంగరాక తా నెయిపొకు విడాకులు దిమ్మంచి గాని ఇంగుట కారనం నీ.

మొక్కుబడి కోసం బోధించివురో

33 సే మొక్కుబడి కొత తప్పితెనాండి. ప్రబువు దీకిరి కొరిలా మొక్కుబడి నెరవేర్చిగిండి, బులి సే కలోనై మనమానుకు కొయిలాట తొమె సునిసో నీనా.

34 ఈనె మియి కొయిలాట కిరబుల్నే, కెడవుంపరె మొక్కుబడి కోసం ప్రమానం కొరితెనాండి, మెగొ పురువురో సింహాసనం ఈనె మెగొ ఉంపరె ప్రమానం కొరితెనాండి.

35 బూమి పురువురో పాదపీటం ఈనె యెరూసలేము మహారొజారొ పట్టనం యీకిరి అచ్చి.

36 తొం ముండొ ఉంపరె తల్లా గుట బల్లో కూడా దొగలైకిరి గాని, కలియేకిరి గాని, మార్చినారొ. ఈనె తొమె ముండొ ఉంపరె ప్రమానం కొరితెనాండి.

37 తొం కొతా వై బులి బులిమా బులిరోన్నె వై బులి కోండి. నీ బులి బులిమా బులి రొన్నే నీబులి కోండి. ఈనె ఎడకు మించికిరి కెటువంటి కొతన్నా తొం తీకిరి అయినె సడకు కారనం సే దుస్థ ఆత్మాక.

పగ తీర్చిగివురో గురించి బోధించివురో

(లూకా 6:29,30)

38 అంకికి అంకి, దంతొకు దంతొ కడిపిమంచె బుల్లా కొతా తొమె సునిసో నీనా.

39 ఈనె మియి కొయిలాట కిరబుల్నే విరోది హానికొర్నే తాకు ఆపితె ప్రయత్నం కొరితెనాండి. తొముకు కేసన్నా కైల చెంపంపరె మరినె తొ దీటో చెంపంకా తాకు దిగదె.

40 కేసన్నా తొమంపరె కొలీ లగినె తొ కొన్నానె కూడా జింకిగిమ్మాసి బులి దిగినె, తొ కండువాంక దీపొండి.

41 కేసన్నా తొముకు తంకె దీకిరి గుటె మైలు దూరు ఆయిబులి బలవంతం కొర్నే, తాసంగరె దీట మైలు జాండి.

42 మగిలాలింకు దేండి తొ పక్కరె అప్పు కడిగిమాబులి బులిగీకిరి ఆయిలాలింకు దిక్కిరి నీబులితెనాండి.

సత్తువూనెకు ప్రేమించిమాసి
(లూకా 6:27,28,32-36)

43 జట్టుకారీనెకు ప్రేమించొండి. సత్తువూనెకు ద్వేసించ్చొండి బులి కొయివురొ తొమె సునిసోనీనా.

44 ఈనె మియి ఉంచినె కొయిలాట కిరబుల్నే తొ సత్తువూనెకు ప్రేమించొండి తొముకు హింసించిలాలింకు కోసం ప్రార్థించొండి.

45 నెల్లె తొమె పరలోకంరె తల్లా తొ బోరొ పిల్లానె యీషారొ. కిరుకుబుల్నే పురువు చెడ్డలింకు కోసం, బొల్లిలింకు కోసం సూర్యోదయం కలిగించిసి. చెడ్డలింకు కోసం, బొల్లిలింకు కోసం బొరస పొడదిల్లీసి.

46 తొముకు ప్రేమించిలాలింకు తొమె ప్రేమించినె తొముకు ప్రతిఫలం కలిగినీ? పన్నునె వొసులు కొరిలాలింకె కూడా సాకిరాక కొరివెనీనా!

47 తొమె తొ అన్నబయినెకాక అభివందనము కొర్నే పొదర్లింకె కన్నా గొప్ప కిర? పొదరెలింకె కూడా సాకిరాక కొరివెనీనా!

48 పరలోకంరె తల్లా తొ బో పరిపూర్నునుడు యిలాట. తొమ్మంకా తా పనికిరి తమ్మాసి.

6

దానం కోసం బోదించివురొ

1 “జాగ్రత్త! తొమె కొరిలా బక్తిపరమయిలా నీతి పైటీనె పొదరిలింకె దిగిలా పని కొరితెనాండి. సాకిరి కొర్నే పరలోకంరె తల్లా తొం బో తొముకు ప్రతిపలం దిన్నీ.”

2 సడకు తొమె దానం కొరిలాబెల్లె చాటింపు పొగ్గీకిరి సార్లింకూ బుజ్జిలాపనికిరి కొరితెనాండి. కపటలింకె సమాజం బిత్తరె, సెయినై, మనమానె గెరవింఁచిమాసిబులికిరి సాకిరి కొరుసె. యెడ సొత్తాక, తంకు మిలివలిసిలా ప్రతిపలం సెల్లాక పూర్తిగా మిలుసి.

3 ఈనె, నీలాలింకు తొమె దానం కొరిలాబెల్లె తో బత్తో కయిల అత్తో కిర దిల్లీవో తో బాఅత్తోకు తెలిసిపించినాసి.

4 సెల్లె తో దానం కాకు నాఅరకైకుంటా తాసి. సెల్లె తొమె రహస్యంగా కొరిలాంచకు దిక్కిరి తో బో తొత్తె ప్రతిపలం దూసి.

ప్రార్థన కోసం బోదించువురొ

(లూకా 11:2-4)

5 ఈనె తొమె ప్రార్థన కొరిలాబెల్లె వేసదారునె పనికి ప్రార్థించితెనాండి. తంకె సబాస్థలం, సెయినై, పాకలురె టారికిరి సార్లింకె దిగిమంచబులికిరి ప్రార్థన కొరువురొ తంకు ఇస్థం. ఈనె ఎడ సొత్తాక తంకు మిల్లా పలితం సెల్లె తంకు పూర్తిగా మిలుసి.

6 ఈనె తొమె ప్రార్థన కొరిలాబెల్లె గొరొబిత్తరకు జేకిరి తట్టినె పొగ్గీకిరి రహస్యంగా తొం బోకు ప్రార్థన కొరొండి. సెల్లె రహస్యంరె తల్లా తొం బో తొముకు ప్రతిపలం దూసి.

7 ఈనె తొమె ప్రార్థన కొరిలాబెల్లె నాపైటికైలా కొతానె పొదరిలింకె పనికిరి కొరినాసి. సాకిరి బొట్ట ప్రార్థన కొరిలాబెల్లె పురువు సునువో బులి తంకె బులుగునుసె.

8 తొమె తంకెపనికిరి కొరితెనాండి. తొముకు కిర కావాలో తొమె నాపొచ్చురా అగరాక తొం బోకు తెలుసుసి.

9 ఈనె తొమె యాకిరి ప్రార్థించిమంచె, పరలోకంరె పురువైలా మో బో,

తో నా గెరవింపబొడుమాసి.

10 తో రాజ్యం అయిమంచి, పరలోకంరె తో ఇస్థం నెరవేరిలాపని

యే లోకంరె కూడా నెరవేరిమంచిబులి అమె ప్రార్థించిలింఁచొ.

11 సొబ్బి దినోనె అముకు కావలిసిలా కద్ది అముకు దే.

12 పొదర్లింకె అమె పట్ల కొరిలా అపరాదమునె అమె క్షమించిలాపనికిరి,
అమె కొరిలా అపరాదమునె క్షమించు.

13 అమె సోదనరె నాపొడుకుంటా అముకు దుష్టుడు తీకిరి తప్పించు.

14 పొదర్లింకరో తప్పునెకు తొమె క్షమించినె పరలోకంరె తల్లా తొం బో తొముకు క్షమించివో.

15 ఈనె పొదర్లింకు తొమె నాక్షమించినె తొం బో అంకా తొం తప్పునె క్షమించిని.

ఉపాసం గురించి బోదించివురో

16 వేనదారునె ఉపాసం కొరిలాబెల్లె మనమానె దిగిమంచి బులి తంకె మూనే నీరసంగా దిగదిల్లాపనికిరి కొరుగునునె. తొమె ఉపాసం కొరిలాబెల్లె సాకిరి కొరితెనాండి. యెడ సొత్తాక, తంకె తంకరో ప్రతిపలం పొందిసె బులి కచ్చితంగా కొయిలించి.

17 తొమె ఉపాసం కొరిలాబెల్లె “మూ” దొయిగీకిరి ముండొ అంచిడిగిండి

18 సాకిరి కొర్నె తొమె ఉపాసం కొరిలాపనికిరి మనమానుకు దిగిదిన్ని. ఈనె రహస్యంగా దిగిలా తో “బో” తెలుసుగుచ్చి. నెల్లె తొం బో తొం ప్రార్థన దిక్కిరి ప్రతిపలం దూసి.

పరలోకంరె పలియ కూర్చిగివురో

(లూకా 12:33,34)

19 తొం కోసం యే లోకంరె పలియకు సంపాదించితెనాండి. ఎట్టె సే పలియకు చెదానె దరిపొసి. సే పలియకు తుప్పు కయిపివో. సొరోనె పొడికిరి దోచిగివ్వె.

20 తొమె పలియకు పరలోకంరె కూర్చుగునొండి. నెట్టె చెదానె దరిని, తుప్పు కయిపిని. సొరోనె పొడికిరి దోచిగిన్నింతె.

21 తో సంపద కేట తన్నే తో మనుసు కూడా కెబ్బుకూ సెట్టాక తాసి.

దేకు హల్లో బొత్తి
(లూకా 11:34-36)

22 అంకి దేకు గుట బొత్తిపనాట. తో అంకినె బొల్లేరోన్నె తో దేఅల్లా హల్లోగా తాసి.

23 ఈనె తో అంకినె నాబొల్లర్నే తో దేఅల్లా మొదారొ యిజోసి. తొం బిత్తరె తల్లా హల్లో మొదారొ యిజిన్నే సే మొదారొ కెత్తో డొరోగా తాసి.

పురువు ఇంకా సంపద
(లూకా 16:13; 12:22-31)

24 జొనె మనమ దీలింకు యజమానునెకు సేవ కొర్నారి. సాకిరి కొర్నే సెయ్యె జొనుకు ప్రేమించికిరి, యింకాజొనుకు ద్వేసించికిరి తాసి. ఈనె జొనుకు అతిస్తద్దదీకిరి సేవ కొరికిరి, యింకాజొనుకు అస్తద్ద కొరుసి. తొమె పురువుకు, పలియకు సేవ కొరివురో ఈని.

25 సడవల్లరె మియి కొయిలాట కిరబుల్నే, తొం జీకానుకు కావలిసిలా కద్ది గురించి కాని, తొం దేనుకు కావలిసిలా కొన్నానె గురించి కాని, చింతించితెనాండి. కద్ది కన్నా పొర్నొ విలువైలాట నీనా? సాకిరాక కొన్నానె కన్నా దే ముక్కుమైలాట నీనా?

26 మెగోనై ఉడిల్లా పక్కినెకు గమనించోండి. సడానె విత్తనాలు జల్లినింతె పచ్చానె పచ్చదిన్నింతె. ఈనె దన్నొకు కొట్టురె కూర్చుగిన్నింతె. ఈనె పరలోకంరె తల్లా తొం “బో” సడానుకు పోసింబిలీసి. తొమె సడకన్నా విలువైలాలింకె నీనా?

27 చింతించికిరి తా జీవిత కలోకు గుట గడియకు బొడిదిగిల్లాలింకె తొంబిత్తరె కెన్నా అచ్చెనా?

28 తొమె కొన్నానె గురించి కిరుకు చింతించిలీసో? గసాంపరె బొడిలా పుల్లోనుకు గమనించోండి. సడనె పైటి కొర్నింతె కొన్నానె కొరిగిన్నింతె.

29 ఈనె మియి కొయిలాట కిర బుల్నే గొప్ప విలువ తల్లా సొలోమోను రొజంకా అలంకరనమురె యే పుల్లోనై గుట పుల్లోదీకిరి కూడా సరితూగునారి.

30 ఆజి రొయికిరి కల్లికి నుక్కిజీకిరి నియ్యబిత్తరె పొక్కుదిల్లా యే గసాకు పురువు ఎత్తె అందంగా అలంకరించినె తొముకు యింకెత్తో అందంగా అలంకరించివోయో నీ! తొమె అల్పవిస్వాసినె.

31 ఈనె “కిర కయిమంచి? కిర పీమంచి? కే కొన్నానె పిందిగిమంచి? బులి చింతించితెనాండి.”

32 పురువుకు నాజనిలా మనమానాక నడపొచ్చాడె దొమిడితోసె. పరలోకంరె తల్లా తొ బోకు ఎడల్లా తొముకు అవసరం బులికిరి తెలుసు.

33 ఈనె అగరె తా రాజ్యం కోసం, నీతి కోసం ప్రయాస పొడెండి; సెల్లె నడల్లా పురువు తొముకు దూసి.

34 నడుకాక కల్లికి గురించి చింతించితెనాండి. కల్లికిరొ చింత కల్లికిరోటాక. కే దినొకు తగిలా కొస్తొనె సే దినొకాక చాలు.

7

పొదర్లింకు తీర్పు తీర్పువురొ
(లూకా 6:37,38,41,42)

1 తొమె తీర్పు తీర్చితెనాండి. సాకిరి కొర్నె పురువొకా తొముకు తీర్పు తీర్చిని.

2 తొమె పొదరలింకె ఉంపరె తీర్పు తీర్చినె తొముకంకా పురువు తీర్పు తీర్చివొ. తొమె నప్పిలా నప్ప దీకిరి పొదరలింకె తొముకు నప్పికిరి దూసి.

3 తొమె తో బయిరొ అంకిరె తల్లా నలుసుకు దిగిలీసా. ఈనె తొ అంకిరె తల్లా దూలముకు దిగినార్లీసా.

4 తో అంకిరె దూలము తన్నుగా తో బయిరొ అంకిరె తల్లా నలుసుకు కడిగిత్తు బులి క్యాకిరి కొయిపార్లీసు?

5 వేసదారి! అగరె తో అంకిరె తల్లా దూలముకు కడిగిత్తు. సెత్తెలె తో బయిరొ అంకిరె తల్లా నలుసుకు కడితె తొత్తె తేటగా దిగదూసి.

6 పరిసుద్దమైలాట కుక్కురొనుకు దీతేనాండి. తొం ఉంపరె పొడికిరి తొముకు చీల్చిపూసె. తొమె మూత్యాలుకు గుసిరీనె అగరె పొగితెనాండి. పొగినె నడ నడానుకు గొడ్డొనె తొల్లె మండిపూసె.

మగు, కుజ్జు, మరు

(లూకా 11:9-13)

7 మగినె దూసి. కుజ్జునె మిలుసి. మరినె తలుపు కడుసి.

8 మగిలా ప్రతీ మనమ పొందివొ, కుజ్జులాటకు మిలివొ, తలుపు మరిలాటకు తలుపు కడివొ.

9 పో రొట్టెకు మగినె పొత్తొ దిల్లా బో తొంబిత్తరె కేసన్నా అచ్చెనా?

10 నీనే మచ్చొ మగినె సప్పొకు కేసన్నా దూసేనా?

11 దుస్టులైలా తొమె తొం పిల్లానుకు బొల్తొంచ దిమ్మాసిబులికిరి తెలుసు నీనా! ఈనె సాటబెల్లె పరలోకంరొ తొం బో తాకు మగిలాలింకు బొల్తొంచ దిన్నీనా? తప్పకుండా దూసి.

12 ప్రతీ వినయంరె పొదరలింకె తొముకోసం కిర కొరిమాసిబులి తొమె ఆసింఁచులీసా తొమె పొదరలింకు కోసం సాకిరాక కొరిమాసి. ఎడ మోసే దర్మసాస్తంరె, యింకా ప్రవక్తానె యాకిరి కొయిలా అర్థం యెడాక.

ఇరుకు బట్టొ

(లూకా 13:24)

13 నాసనముకు జెల్లా బట్టొ యిరుకుగా తాసి. సే బట్టొ విసాలంగా అచ్చి. బడేలింకె సే బట్టొతీకిరి ప్రవేసింఁచునె.

14 ఈనె నిత్యజీవముకు జెల్లా బట్టొ కస్తంగా రొవ్వొ. సే బట్టొ ఇరుకుగా రొసి. కుండిలింకె మాత్రమాక నడకు కనుగునునె. యెడ గమనించొండి ఇరుకు తల్లా బట్టరాక ప్రవేసింఁచొండి.

గుటె గొచ్చొ నడరొ పొగలానె

(లూకా 6:43,44)

15 సొరొప్రవక్తానె వినయంరె జాగర్తగా తాండి. తంకె గొర్రి సొమ్మొనె పనా కొన్నానె గుడిగీకిరి తొం పక్కు అయివె. ఈనె బిత్తరె క్రూరమైలా తోడేల్లు పనికిరి రొవ్వె.

16 తంకు కలిగిల పలము దిక్కిరి తంకు తొమె గుర్తించి గలిగిమాసి. కొంటానె గొచ్చొ తీకిరి ద్రాళ్ళ పొగలానుకు, పల్లెరు గొచ్చొనె తీకిరి అంజూరొ పొగలానుకు కట్టివురొ సాద్యమాకనా?

17 బొల్ల గొచ్చొకు బొల్ల పొగలానె కాసివొ. పుల్ల పొగలానె కాసిలా గొచ్చొకు పుల్ల పొగలానాక కాసుసి.

18 బొల్ల గొచ్చొకు పుల్ల పొగలానె కాసినింతె. ఈనె పుల్ల పొగలానె కాసిలా గొచ్చొకు బొల్ల పొగలానె కాసిని.

19 బొల్ల పొగలానె నాదిల్లా గొచ్చొకు అనికిరి నియ్యరె పొక్కదూసి.

20 సడకాక తంకె తంకు కలిగిల పలాలుకు దిక్కిరి తొమె తంకు గుర్తించి గలిగివాసి.

తొమె మెత్తె తెలిసిని

(లూకా 13:25-27)

21 మెత్తె ప్రబూ! ప్రబూ! బులి డక్కిలెత్తె మాత్రాన పురువురొ రాజ్యం బిత్తురుకు జొంచొబులికిరి బులిగితెనాండి. ఈనె మో బో ఇస్తప్రకారం సల్లాలింకె మాత్రమాక జేపారె.

22 సే తీర్పుదిన్రె బడేలింకె మెత్తె దిక్కిరి, ప్రబూ! ప్రబూ! తో నారె అమె సువార్త ప్రకటించించొ? బుత్తోనుకు సాడదిపించించొనీనా? బడే అద్బుతానె కొరిలానింతొనా? బులి బులుసా.

23 సెల్లె మియి తంకదీకిరి తొమె కేసెవొ మెత్తె తెలిసిని. సెడ్డలింకైలా తొమె మో అగరెతీకిరి బాజాండి బులి స్పష్టంగా కొయిమి.

గొరొనె బందితల్లా దీలింకు గురించి

(లూకా 6:47-49)

24 ఈనె మో కొతానె సునికిరి సడకు ఆచరించిలా ప్రతి మనమ పొత్తొ ఉంపరె తా గొరొ బందిగిల్లా బుద్ధిమంతుడుకు పొలికిరచ్చి.

25 సే గొరొ రాతి పొత్తొ ఉంపరె బందిలాట. ఈనె బొర్స పొడినన్నా, వరదానె అయికిరి తుపాను బానే అయికిరి సే గొరొకు మరినన్నా సే గొరొ పొడ్చి.

26 ఈనె మో కొతానె సునికిరి సడకు నాఆచరించిలా ప్రతీ మనమ బల్లి ఉంపరె తా గొరొ బందిగిల్లా బుద్దిసీలాట దీకిరి సమానము.

27 బొర్స అయికిరి, వరదానె అయికిరి, తుపాను బానే అయికిరి సే గొరొకు మర్నే సే గొరొ కూలిజేసి సడ పతనం బయంకరమైలాట.

యేసుకు రొల్లా అదికారం

28 సెల్లె యేసు యే కొతానె కొయికిరి ముగించిలాబెల్లె, మనమానె తా బోద సునికిరి ఆచ్చర్యపాడిసె.

29 సెయ్యె తంకు సాస్త్రీనె పనికిరి నీకుంటా, అదికారం రొల్లాపనికిరి తంకు బోదించిసి.

8

యేసు జోసుకు బొలికొరువురొ

(మార్కు 1:40-45; లూకా 5:12-16)

1 యేసు పొరొతో ఉంపరె దీకిరి వొల్లిలాబెల్లె మనమానె గుంపునె గుంపునెగా తా పొచ్చాడె అయిసె.

2 కుస్తురోగం రొల్లా మనమ జొనె అయికిరి తా అగరె మోకరించికిరి, “బో, తొత్తె ఇస్తమైనె మెత్తె బొలుకొరుపారు” బులిసి.

3 “మెత్తె ఇస్తమాక” యేసు తా అత్తో చాపికిరి తాకు సూగీకుంటా, “తొత్తె బొలైమంచి బులి కోరిగిల్లనా, ఈనె బొలైను” బులి కొయిసి. ఎంట్రాక తా కుస్తురోగం తీకిరి బొలైజిసి.

4 సెల్లె యేసు తా దీకిరి, ఏ సంగతి గురించి కాకు కొయితెనా ఈనె యాజకుడు పక్కు జేకిరి తో దే దిగదీకిరి, తొత్తె బొలైలపనికిరి తంకు రుజువయితె మోసే ఆజ్ఞాపించిలా కానుక చెల్లించు బులి కొయిసి.

యేసు రోమా అదికారిరొ ఫైటితాకు బొలికొరువురొ

(లూకా 7:1-7)

5 యేసు కపెర్నహూము బుల్లా గాకు అయిలాబెల్లె రోమా అదికారి జొనె తా పక్కరకు అయికిరి, తాకు సహాయం మగిసి.

6 “బో! మో సేవకుడు పక్కువాతం సంగరె గొర్రె మొంచరె కదిలినారుకుంటా పొడికిరి అచ్చి. సెయ్యె బడే బాదపొడిలీసి బులి కొయిసి.”

7 యేసు, “మియి అయికిరి తాకు బొలికొరుంచి” బులి కొయిసి.

8 ఈనె అదికారి, “బో! నా, తూ మో గొర్రె గొడ్డో లొగితే కూడా మియి అర్లుడుని. ఈనె తువ్వు కొతాబుల్నే చాలు, మో సేవకుడుకు బొల్లెజివో.

9 కిరకుబుల్నే, మియి కూడా అదికారి నె తొల్లె తల్లాటాక. మో తొల్లె కూడా సైనికునె అచ్చె. మియి యే సైనికుడు సంగరె ‘జా’ బుల్నే జిసి; సే సైనుకుడు ఆయి బుల్నే ఆసి. మో సేవకుడు దీకిరి ‘యెడ కొరు’ బుల్నే కొరువో” బులి కొయిసి.

10 యేసు యెడ సునికిరి ఆచ్చర్యపొడిసి. సెయ్యె తా పొచ్చాడె అయిలాలింకె దిక్కిరి, యెడ సొత్తాక. ఎత్తె గొప్ప విస్వాసము తల్లా మనమ మెత్తె ఇస్రాయేలురె కేసె దిగిదిల్లానింతె.

11 మియి కొయిలాట కిరబుల్నే, తూర్పు దీకిరి, పడమర దీకిరి, బడేలింకె మనమానె ఆసె. అయికిరి, అబ్రాహాము, ఇస్సాకు, యాకోబు దీకిరి మిసికిరి పురువు రాజ్యంరె జరిగిలా విందురె మిసిగివ్వె.

12 ఈనె తా రాజ్యో వారసునెగా తవ్వొలిసిలాలింకె నానమ్మిలందరె తంకు వొందారె బిత్తరె పొక్కుదివ్వె. సెట్టె తంకె కందానె, దంతోనె కమిడిగీకుంటా బాదకు అనుబవింతునె.

13 యేసు సతాదివతి సంగరె, తువ్వు “జా! విస్వాసింబిలపనాక జరుగుసి” బులి కొయిసి.

సే గడియరె తా సేవకుడుకు బొల్లెజిసి.

యేసు బడేలింకు బొలికొరువురొ
(మార్కు 1:29-34; లూకా 4:38-41)

14 యేసు పేతురు గొరొకు అయికిరి తా సను జొరొ సంగరె మొంచ దరికిరి రొల్లాట దిగిసి.

15 యేసు తా అత్తొకు సూగిత్తల్లాబెల్లె, జొరొ తాకు నడదీకిరి బాజేసి. సెయ్యె ఉటికిరి పరిచర్య కొరువురొ మొదలు కొరిసి.

16 మనమానె సొంజైతల్లాబెల్లె, బుత్తోనె దరిలా బడేలింకు యేసు పక్కు డక్కిగీకిరి అయినె. సెయ్యె గుటె కొత సంగరె బుత్తోనుకు సొడిపించిసి. జబ్బానె సంగరె రొల్లలింకల్లా బొలికొరిసి.

17 సడకాక “సెయ్యె అమె బాదలకు తావుంపరె పొగ్గీకిరి అమె రోగునుకు బరించిసి” ఈనె యెసయా ప్రవక్త సంగరె పలికిలా ఏ కొతానె సొత్తయితె యాకిరి జరిగిసి.

యేసుకు సిస్యనెగా తవ్వరొ
(లూకా 9:57-62)

18 యేసు తా చుట్టు తల్లా మనమానె గుంపునెకు దిక్కిరి, గలిలయ సొంద్రొ తెనాడె పొక్కు జాండిబులి కొయిసి.

19 సెల్లె దర్మసాస్త్ర పండితుడు జొనె అయికిరి, “బోదకా! తువ్వు కేటికి జెన్నే మియి సెట్టుకు అయిమి” బులి కొయిసి.

20 యేసు, “నక్కానె నుచ్చుపొడుతందుకు గత్తోనె అచ్చె. బారె ఉడిల్లా పక్సీనె రొయితందుకు గూడినె అచ్చె. ఈనె మనమరొ పొ ముండొ వాల్చిగితై కూడ సోటునీ” బులి తాసంగరె కొయిసి.

21 ఇంకా జొనె సిస్యడు, “ప్రబూ! అగరె మో బో కు బుజ్జదీతే అనుమతి దే బులి కొయిసి.”

22 ఈనె యేసు తాసంగరె, “మొరిజిల్లాలింకు బుజ్జదీతె మొరిజిల్లాలింకె అచ్చెదె తువ్వు మో సంగరె ఆయి” బులి కొయిసి.

యేసు తుపానుకు ఆపువురొ
(మార్కు 4:35-41; లూకా 8:22-25)

23 యేసు పడవ ఉటిలాబెల్లె సిస్యనె తాసంగరె జేనె.

24 సెత్తెలె అకస్మాత్తుగా గుటె బొట్ట తుపాను సే సొంద్రొ ఉంపరకు అయిలందరె సే పడవ అలానె వల్లరె బుడ్డిజెల్లాపనికిరి అచ్చి. ఈనె సే సమయంరె యేసు గుమ్ముకుంటా అచ్చి.

25 సిస్యనె తాపక్కు అయికిరి తాకు ఉడదీకుంటా, “ప్రబూ! రక్సింఛు మొరిలాపనికిరి అచ్చొ!” బులిసె.

26 యేసు, తోముకు యెత్తె అల్పవిస్వాసం? కిరుకు దొరొపొడిలిసో? బులికిరి ఉటికిరి బాకు, అలలకు సాంతించుబులికిరి ఆజ్ఞాపించిసి. సడ సాంతించిసి.

27 తంకె ఆచ్చర్యపొడికిరి, “ఎయ్యె కేటవో? బా, అలానె కూడా ఆ కొత సునిలీసె” బులి కొయిగిచ్చె.

యేసు బుత్తోనె దరిలా దీలింకు బొలికొరువురో

(మార్కు 5:1-20; లూకా 8:26-39)

28 యేసు, సొంద్రొ తెనిపొక్కరె తల్లా గదరేనీయునె దెసాకు చేరిగిచ్చె. బుత్తోనె దరిలా మనమానె దీలింకె సమాదులు దీకిరి అయికిరి తాకు మిసిగిచ్చె. అంకె క్రూర ప్రవర్తన వల్లరె సే బట్టోదీకిరి కేసె జెన్నారిలీసె.

29 సే బుత్తోనె, పురువురో పో! అముకు కిరకొరిమంచి బులి అయిసు? తగిలా సమయం నాయిలా అగరాక అముకు సిక్కించిమాసి బులికిరి ఎట్టికి అయిసునా? బులి గట్టిగా దొందరికుంటా బులిసె.

30 తంకు కుండె దూరె గుటె గుసిరీనె గుంపు మేసికుంటా అచ్చె.

31 సే బుత్తోనె యేసుకు దిక్కిరి, “తూ అముకు పొడిదిపీమంచి బులి బులిగిన్నే సే గుసిరీనె గుంపు బిత్తరకు పొడిదిపే” బులి బతిమాలిగిచ్చె.

32 సెయ్యె సడికిరి, “బాజాండి!” బులి కొయిసి. సడకు సడనె దొరకు అయికిరి సే గుసిరీనె బిత్తరకు బాజీసె. సే గుసిరీనె గుంపు సొబ్బి అగరె తల్లా పొరొతొ ఉంపరెతీకిరి దొమిడి జేకిరి సొంద్రొ బిత్తరె పొడికిరి మొరిజీసె.

33 సే గుసిరీనె జొగిలాలింకె సెట్టె దీకిరి దొముడుకుంటా గా బిత్తరకు జేకిరి జరిగిలాటల్లా కొయికిరి, సే బుత్తో దరిలాలింకు కిరైసా సొబ్బి కొయిసె.

34 సెల్లె యెడ సునికిరి సే గా అల్లా యేసుకు మిసితె అయిసె. తంకె తాకు దిక్కిరి తంకె రొల్ల ప్రాంతం సడదీకిరి బాజా బులికిరి బతిమాలిగిచ్చె.

9

గొడ్డత్తో పొడిజిల్లా మనమకు యేసు బొలికొరువురో
(మార్కు 2:1-12; లూకా 5:17-26)

¹ యేసు పడవ ఉటికిరి సొంద్రొ దాటికిరి సెయ్యె రొల్లా గాకు అయిసి.

² కుండిలింకె మనమానె మొంచదరిలా జొనె పక్సవాత రోగికు సొప్పంపరె యేసు పక్కు దరిగీకిరి అయిసె. యేసు తంకె విస్వాసం దిక్కిరి సే పక్సవాతవ రోగిసంగరె, మో పో “దైర్యంగా రో, తో పాపొనె క్షమించబొడిసి” బులి కొయిసి.

³ ఎడ సునికిరి కుండిలింకె దర్మసాస్త్ర పండితులు తంకె బిత్తరె తంకె “ఎయ్యె పురువుకు దూసించువురో కొరిలీసి” బులి కొయిగిచ్చె.

⁴ తంకె కిరబులిగిల్లీసెవో యేసుకు బుజ్జికిరి సెయ్యె తంకెసంగరె, “తొ హ్రుదయంబిత్తరకు సారొలోచనానె క్షేంకి అయిపించిలీసా?”

⁵ ఉటికిరి సలు ‘తో పాపొనె క్షమించించి’ బులి కొయివురో సులువునా?

⁶ పాపొనె క్షమించితె మనమరొ పోకు బూమంపరె అదికారం అచ్చిబులికిరి తంకు నిరూపించిమంచిబులి” పక్సవాత రోగిసంగరె, సడకు “పుటు! తో సొప్ప దరిగీకిరి గొరుకు జా!” బులి కొయిసి.

⁷ పక్సవాతం సంగరె తల్లా మనమ ఉటికిరి గొరుకు జేసి.

⁸ ఎడ దిక్కిరి సెట్టెరొల్ల మనమానుకు డొరొమొందిసి. మనమానుకు యెడపనా అదికారందిల్లా పురువుకు తంకె స్తుతించిసె.

యేసు మత్తయికు డక్కువురో
(మార్కు 2:13-17; లూకా 5:27-32)

⁹ యేసు సెట్టిదీకిరి బయిలుదేరికిరి జేతన్నుగా, మత్తయి బుల్లా మనమ బొసిరీకిరి పన్నునె వసూలు కొరువురో దిగిసి. యేసు తాదీకిరి, “మో పొచ్చాటె ఆయి” బులిసి. మత్తయి ఉటికిరి తా పొచ్చాడె జేసి.

¹⁰ యేసు, మత్తయి గొరె బత్తోకైతె బొసికిరి తల్లాబెల్లె, బడేలింకె పన్నునె వొసులుకొరిలాలింకె, పాపొనె అయిసె, తంకల్లా యేసుదీకిరి, తా సిస్యునెదీకిరి మిసికిరి బత్తో కైతె బొసిరిసె.

11 పరిసయ్యునె ఎడ గమనించికిరి యేసు సిస్యునె సంగరె, “తొ బోదకుడు, పన్నునె వసూలుకొరిలాలికె సంగరె, పాపొనె సంగరె మిసికిరి కిరుకు కద్ది కయితె బొసిరిసి?” బులి పొచ్చురిసె.

12 యేసు ఎడ సునికిరి బొల్లెరొల్లాలింకు వైద్యుడు అవసరంనీ. జబ్బుదీకిరి తల్లలింకాక వైద్యుడు అవసరం తాసి.

13 లేకనాత్రె కిడచ్చో జేకిరి పరిసిలింబొడి మియ్యి పాపొనెకు డక్కితె అయింబి గని, నీతిమంతునెకు డక్కితె అయిలానీ. మీ దయకాక కోరిలింబి గాని, జంతు బలినె కోరిలాటనీ.

ఉపాసం గురించి ప్రస్నించువురొ
(మార్కు 2:18-22; లూకా 5:33-39)

14 సే తరవాతరె బాప్టీసం దిల్లా యోహానురొ సిస్యునె యేసు పక్కు అయికిరి, “అమె, పరిసయ్యునె కెబ్బుకూ ఉపాసం కొరిలింబొ ఈనె తొ సిస్యునె ఉపాసం కిరుకు కొర్నింతే?” బులి పొచ్చురిసె.

15 యేసు, యాకిరి జవాబు దీసి. “బొర్రొ తంకసంగరె తల్లాబెల్లె బ్యా గొరిలింకె కిరకు ఉపాసం కొరువె? ఈనె బొర్రొకు తంకుపక్కరెతీకిరి కొనిబాజెల్లా సమయం ఆసి. సెత్తెలె తంకె ఉపాసం కొరుసె” బులిసి.

16 కేసెయినెను “చిరిజిల్లా పుర్న కొన్నాకు నోకొన్న సంగరె మాసిక పొగినింతె. సాకిరి కొర్నే సే అతుకు చిరిజోసి. సెత్తెలె నోకొన్న సే కన్నంకు యింకా బొట్టకొరుపూసి.

17 సాకిరాక నోట్టెలా ద్రాక్సరసంకు పుర్న సొమ్మొసంచిరె నుచ్చినింతె. సాకిరి కొర్నే సే సొమ్మొసంచి చిరిజికిరి సే ద్రాక్సరసము నాసనమైజివొ. సెత్తాకనీకిరి సే సొమ్మొసంచి కూడా నాసనమైజివ్వొ. సడకు నోట్టెలా ద్రాక్సరసముకు నో సొమ్మొసంచిరాక నుచ్చికిరి రొయిదిమ్మాసి. సాకిరి కొర్నే దీటా బద్దంగా తాసె” బులి యేసు కొయిసి.

అదికారి జ్యోకు, రొగొతో జబ్బు మొట్టకు యేసు బొలికొరువురొ
(మార్కు 5:21-43; లూకా 8:40-56)

18 ఈనె యేసు యాకిరి కొతలగితల్లాబెల్లె యూదుల సమాజమందిరముకు అధికారిగా తల్లా జొనె అయికిరి, తా అగరె మోకరించికిరి, “మో జో ఉంచినాక మొరిజీసి. ఈనె తూ అయికిరి తో అత్తో తా ఉంపరె లొగినే సెయ్యె జూసి” బులి కొయిసి.

19 సెల్లె యేసు, తా సిస్యనె ఉటికిరి తా పొచ్చాడె జేసె.

20 తంకె జేతల్లాబెల్లె పన్నెండు బొచ్చొరోనెతికిరి రొగొతో జబ్బుసంగరె బాద పొడిలా జొనె మొట్ట పొచ్చాడెదీకిరి అయికిరి తా కొన్నా అంచుకు సూగిచ్చి.

21 సెయ్యె, “మియి తా కొన్నకు సూగిన్నే చాలు మెత్తె బొల్తెజీవొ” బులి మనసురె బులిగిచ్చి.

22 యేసు పొచ్చాడుకు బులికిరి తాకు దిక్కిరి, మో జ్యో దైర్యంగా రో! తో విస్వాసమాక తొత్తె బొలికొరిసి బులి కొయిసి. సే కొయిలా ఎంట్రాక సెయ్యె బొల్తెసి.

23 యేసు సే అధికారి గొరొబిత్తురుకు జేతల్లాబెల్లె, సెట్టె బజన కొరిలాలింకె గోల తవ్వరొ దిగిసి.

24 తంకె సంగరె, “బాజండి, సే జ్యో మొరిజిల్లాని గుమ్మిలీసి” బులి కొయిసి. తంకె తాకు బచ్చిసె.

25 సెయ్యె తంకు పొడదిపీకిరి బిత్తురుకు జేకిరి సే పిల్లరొ అత్తో సూగిచ్చి సెయ్యె ఎంట్రాక ఉటిసి.

26 ఏ సంగతి సే ప్రాంతమల్లా తెలిసి.

యేసు దిగానీలా దీలింకు బొలికొరువురొ

27 యేసు సెట్టెదీకిరి బయలుదేరికిరి జేతల్లాబెల్లె దీలింకె అంకినె నీలాలింకె, “దావీదురొ పో! అమంపరె దయ దిగదే!” బులి కేకానె పొక్కుంటా తాకు అనుసరించిసె.

28 యేసు గొరొ బిత్తురుకు జేతల్లాబెల్లె దీలింకె అంకినె నీలాలింకె తా పక్కరకు అయిసె. సెయ్యె తంకు సంగరె, “ఎడ మియి కొరిపారిబులి తొమె నమ్మిలీసానా?” బులి పొచ్చురిసి. “వై ప్రబూ!” బులి తంకె సమాదానం కొయిసె.

29 సెల్లె సెయ్యె తంకె అంకినె నూగీకుంటా, “తొముకు కెత్తె విస్వాసం తన్నే సెత్తె పలం మిలుసి” బులిసి.

30 తాకు అంకినె దిగదీసె. యేసు, “ఏ సంగతి కాకు నాతెలిసికుంటా జాగర్త పొడండి” బులి తంకు గట్టిగా కొయిసి.

31 ఈనె తంకె జేకిరి తా గురించి సే “ప్రాంతమల్లా” సాటిపీసె.

కొతానీలా మనమకు యేసు బొలికొరువురో

32 తంకె దోరకు జేతల్లాబెల్లె కుండె మనమానె బుత్తో దరిలా మూగమనమకు యేసు పక్కు కొడిగీకిరి అయిసె.

33 యేసు బుత్తోకు సొడిపించిలా ఎంట్రాక సే మూగమనమ కొతలగివురో మొదలు దీసి. సెట్టెదీకిరి మనమానల్లా ఆచ్చర్యపొడికిరి, “యెడపనా సంగతి ఉంచినెజాంక ఇస్రాయేలురె కెబ్బే జరిగిలాని”బులిసె.

34 ఈనె పరిసయ్యునె, “సెయ్యె బుత్తోనో అదికారి సహాయం సంగరె బుత్తోనుకు సొడిపించిలీసి”బులిసె.

యేసు మనమానె కోసం కనికరం పొడివురో

35 యేసు యూదునెరో సబాస్థలంరె బోదకొరుకుంటా బొట్ట గానె, సన్ని గానె బుల్లికిరి పురువురో రాజ్యం గురించి సువార్త కొర్లీసి. సొబ్బి రకానె జబ్బానె, బాదానెకు బొలికొరిసి.

36 ఈనె యేసు సెట్టె తల్లా మనమానుకు దిక్కిరి, జొగులొతా నీలా గొర్రీనె పనికిరి అలసిజేకిరి, చెదిరిజేకిరి తవ్వరో దిక్కిరి తంకంపరె జాలిపొడిసి.

37 సే తరవాతరె తా సిస్యునె సంగరె, బిల్లో బొల్లె పచ్చిసి ఈనె కూర్చితందుకు, పైటిలింకె కుండెలింకె అచ్చె.

38 ఈనె “యజమానుడుకు ప్రార్థన కొరొండి సెల్లె సెయ్యె బిల్లో కట్టితె పైటిలింకు పొడదూసి” బులి కొయిసి.

10

యేసు పొడదిల్లా పన్నెండుమంది
(మార్కు 3:13-19; లూకా 6:12-16)

¹ యేసు తా పన్నెండు మంది సిస్యనెకు డక్కికిరి బుత్తోనుకు సొడిదీతందుకు, సొబ్బిరకానె జబ్బునెకు, బాదానెకు బొలికొరితె తంకల్లా అదికారం దీసి.

² సే పన్నెండులింకె అపోస్తలునె బులి నా లొగిసి, సీమోను బుల్లాటకు, పేతురు బులి డక్కితవ్వె. తా బై అంద్రెయ. జెబెదయి పో యాకోబు, తా బయి యోహాను.

³ పిలిప్పు, బర్తొలోమయి, తోమా, పన్నునె వొసులుకొరిలా మత్తయి, అల్ఫయి పో యాకోబు, తద్దయి.

⁴ కనానీయుడైలా సీమోను, యేసుకు ద్రోహం కొరిలా యూదా ఇస్కరియోతు.

పన్నెండుమందిరొ పైటి
(మార్కు 6:7-13; లూకా 9:1-6)

⁵ సే పన్నెండు మందికి మనమానె పక్కు పొడిదికుంటా, తంకు యేసు యాకిరి ఆజ్ఞాపించిసి, “యూదునె నీలాలింకు పక్కరకు గాని, సమరయ దెసారొ పట్టనమునెకు గాని జేతెనాండి”

⁶ సడకు బదులుగా నసించిజితల్లా ఇస్రాయేలు మనమానె పక్కు జాండి. తంకె తప్పిజెల్లా గొర్రీనె పనికిరి అచ్చె.

⁷ ఈనె జేకుంటా, “పురువురొ రాజ్యం పక్కరాక అచ్చి” బులి ప్రకటన కొరొండి.

⁸ జబ్బునె సంగరె తల్లాలింకు బొలికొరండి. మొరిజిల్లాలింకు ఉడిదేండి, కుస్తురోగీనెకు సుద్ది కొరొండి. బుత్తోనుకు పొడదిపెండి. తొమె సుచ్చరాక పొందిలాట సుచ్చరాక దేండి.

⁹ సున్న గాని, వెండి గాని, రాగి పలియానె తొమె సొమ్మొసంచినెరె లొగ్గీకిరి జేతెనాండి,

10 తొమె ప్రయానం కొరితల్లాబెల్లె పలియనంచినె గాని, కొన్నానె గాని, జోడానె గాని, అత్తోబడ్డిగాని, తొం పొచ్చాడె యింగుటె కిచ్చి నీజితెనాండి. పైటి కొరిలాలింకు కూలి మిలుసి నీనా!

11 తొమె కే గాకు జెల్లీసావో, సే గారె కేసె తొముకు ఇస్తపొడికిరి డక్కిలీసెవో సే చోటు సడదిల్లా జాంక తా గొరొ బిత్తరాక తాండి.

12 తొమె సే గొరొబిత్తరకు జెల్లాబెల్లె సే గొరె సమాదానం కలుగుమాసి బులి కోడి.

13 సే గొరొలింకె యోగ్యులైసే తొం కొయిలా సమాదానం సే గొరొబిత్తరాక కలుగుసి. నీనెమాను సే సమాదానం తొముకాక బుల్లికిరి ఆసి.

14 ఈనె ఈనెమాకు, తొముకు కేసె స్వాగతం నాకొయినె సే గొరొకు గాని ఈనె సే గాకు గాని సడిదికిరి జెల్లా అగరె తొం గొడ్డోనై *దుల్లి దులిప్పొండి.

15 యెడ సొత్తాక, తీర్పు తీర్చిలా దినొరె తొమె సడదిల్లా గానెరొ స్థితికన్నా సాదోమ, గొమ్మెర్రా పట్టనమూనె దయ పొందిగివ్వె బులి కచ్చితంగా కొయిలించి.

అయితల్లా హింసానె

(మార్కు 13:9-13; లూకా 21:12-17)

16 నునొండి తోడేల్లు మొజుకు గొర్రీనుకు పొడిదిల్లాపనికిరి తొముకు పొడిదిల్లించి. ఈనె సప్పొనె పనికిరి తెలివిగా, పావురాలుపని నిన్నుపటంగా తాండి.

17 ఈనె, మనమానె వినయంరె జాగర్తగా రోండి. తంకె తొముకు దరిగీకిరి, బందించికిరి పక్కరె తల్లా న్యాయసబకు అప్పగించునె. తంకె యూదునెరొ సబాస్తలంరె కొరడా మడ్డోనె మరివె.

18 మో వల్లరె తొముకు సాక్సంగా పాలకులు అగురుకు, రొజానె అగురుకు కొనిగిజోసె సెల్లె తంకు, యూదునె నీలాలింకు మో సువార్త ప్రకటించుసా.

* 10:14 యూదునెరె తంకనంగరె మిసికిరి పురువురొ రాజ్యంకు నాఅంగీకరించిలాంకె

19 తంకె తొముకు అదికారిനെకు అప్పగించిలాబెల్లె, కే విదంగా కొతలగిమంచో? కిరకొయిమంచో? బులి చింతించితెనాండి. తొమె కిర కొతాలగిమంచో సే సమయంరె తొముకు తెలియపర్చివో.

20 కిరుకు బుల్నే కొతాలగిలాట తొమ్మెనీ. తో బోరో ఆత్మ తొబిత్తరెదీకిరి కొతలగువో.

21 అన్నబయి అన్నబయికు, బో పోకు మొర్నుకు అప్పకొయివె. పిల్లనె తంకె మా, బోనుకు ఎదురు బుల్లికిరి తంకు మొరదూసె.

22 మనమానల్లా మో నా కారనంగా తొముకు ద్వేసించివె. ఈనె చివర జాంక సహనం సంగరె తల్లాట రక్సింఱుబొడివో.

23 తొముకు గుటె గారె హింసించినె తప్పించిగీకిరి యింగుటె గాకు పొలిజాండి. యెడ సొత్తాక. తొమె ఇస్రాయేలు గానల్లా నాబుల్లిలా అగరాక మనమరొ పో ఆసి.

24 “సుక్కిగిల్లా సిన్యనె గురువులుకన్నా గొప్పలింకెనింతె; సాకిరాక పైటికొరిలలింకె యజమానికన్నా గొప్పలింకెనింతె.”

25 సిన్యడు తా గురువు పనికిరి తమ్మంచి. సాకిరాక పైటికొరిలాలింకె యజమానుడు పనికిరి తన్నే చాలు. గొరొ యజమానికి †బయెల్జెబూలు బులి బుల్నే సే గొరొలింకు యింకెత్తో నానె లొగివేయో.

కాకు డొరుమాసి
(లూకా 12:2-7)

26 “ఈనె తొమె మనమానుకు డొరితెనాండి. రహస్యమైలాట పొదరెపొడివో. నుచ్చిదిల్లాట నాతెలిసికుంటారొన్నీ.”

27 మియి రహస్యంగా కొయిలా కొతానె బాహటంగా పొదరిలింకు కోండి. తొమె కన్నొరె కొయిలా కొతానె గొరొ ఉంపరె ఉటికిరి ప్రకటించొండి

28 తంకె దేకు మొరదీపారె ఈనె ఆత్మకు మొరదిన్నారె. తంకు గురించి డొరితెనాండి. దేకు, ఆత్మకు నరకంరె పొక్కిరి నాసనం కొరిలా పురువుకు డొరొండి.

† 10:25 సాతానుడుకు తల్లా గుటె నా

29 గుటె పైసాకు దీట పిచ్చుకానె బిక్కునె. ఈనె తొం “బోకు” నా బుజ్జాకుంటా బూమి ఉంపరె గుట్టంకా పొడ్డి.

30 తొం ముండొ ఉంపరె తల్లా బల్లోనంకా కెత్తో గొనికిరి అచ్చె.

31 సడకు డొరితెనాండి. బడే పిచ్చుకానె కన్నా తొమె విలువైలలింకె.

క్రీస్తుకు ఒప్పిగివురో ఇంకా నాఒప్పిగివురో
(లూకా 12:8,9)

32 మెత్తె మనమానె సమక్సంరె వొప్పిగిల్లా ప్రతి మనమా పరలోకంరె రొల్ల మో బో అగరె మియి తాకు వొప్పిగిమ్మి.

33 ఈనె మనమానె సమక్సంరె మెత్తె తీరస్కరించిలాలింకు మియి పరలోకంరె రొల్ల మో బో అగరె జన్నీ బులి కొయిమి.

సాంతాక నీ, విబేదాలంకా తాసి
(లూకా 12:51-53; 14:26,27)

34 మియి బూమింపరకు సాంతికు దన్నైతె అయింబి బులిగితెనాండి. కత్తికు దన్నైతె అయింబి గాని సాంతికి నీ.

35 కిరుకుబుల్నే మియి, బోనుకు పోనుకు మొజిరె, మానుకు తా జోనుకు మొజిరె, ససుకు బూనెకు మొజిరె, విబేదం లొగితె అయింబి.

36 గుటె గొరుకు చెందిలాలింకాక సే గొరొ బిత్తరెలింకు సత్తుమానె ఊసె.

37 తా మా బోకు మో కన్నా ఎక్కువగా ప్రేమింబిలా మనమ మెత్తె సిస్యడు ఈనారి. తా పోకు ఈనన్నా, జోకు ఈనన్నా మోకన్నా ఎక్కువగా ప్రేమింబిలాట మెత్తె సిస్యడు ఈని.

38 మెత్తె వెంబడింబిలా మనమ మో సిలువకు బొయికిరి మెత్తె నాఅనుసరించినె మో సిస్యనె యీతె యోగ్యునె ఈనింతె.

39 పొర్నొకు కాపాడిగిల్లా మనమ సడకు వొరదీగివ్వొ. ఈనె మో కోసం జిక్కు వొరదీగిల్లా మనమ సడకు సంపాదించిగునుసి.

ప్రతిపలం
(మార్కు 9:41)

40 తొముకు అంగీకరించులలింకె మెత్తె అంగీకరించునె. మెత్తె అంగీకరించులలింకె మెత్తె పొడిదిల్లాటకు అంగీకరించులపనాక.

41 జొనె మనమ ప్రవక్త ఈలందుకు తాకు చేర్చిగిల్లా మనమకు సే ప్రవక్త పొందిలా పలం పొందుసి. ఈనె జొనె మనమ నీతిమంతుడు ఈలందుకు తాకు చేర్చిగిల్లా మనమ నీతిమంతుడు పొందిలా పలం పొందుసి.

42 తొమె మో సిస్యనె యీలందుకు, తంకు కేసె గుటె గిన్నె పని దూసెవో తంకు ప్రతిపలం మిలుసి బులి కచ్చితంగా కొయిలించి.

11

బాప్టీసం దిల్లా యోహాను తీకిరి కబురు దన్నెలాలింకె
(లూకా 7:18-35)

1 యేసు తా పన్నెండు మంది సిస్యనెకు తంకె కొరివలిసిలా పైటీనె గురించి కొయికిరి, సే తరవాతరె సెయ్యె సెట్టి దీకిరి బయలుదేరికిరి బోదించుకుంటా ప్రకటించుకుంటా సుట్టూ తల్లా బడి గానెకు జేసి.

2 చెరసాలరె తల్లా యోహాను క్రీస్తు కొరిలా పైటీనె గురించి సునిసి. సెయ్యె కుండిలింకె సిస్యనెకు యేసు పక్కరకు పొడిదీసి.

3 తంకె జేకిరి, యోహాను “ఆసి బులి కొయిలాట తువ్వకనా? నీనే యింకాజొనె కోసం అమె ఎదురు దిగిమంచినా?” అం సంగరె కోబులి పొచ్చురిసె.

4 సడకు యేసు తంకె సంగరె యాకిరి కొయిసి. “తొమె జేకిరి సునిలాంచకు, దిగిలాంచకు, యోహానుకు కోండి.

5 అంకీనె నిలాలింకె దిగిలీసె, నాసల్లాలింకె సలిపార్లీసె, కుస్తురోగీనె బొల్లెలీసె, కల్లొలింకె సునిపారిలీసె, మొరిజిల్లాలింకె జీకిరి అయిలీసె, సువార్త పేదలింకు ప్రకటించిబొడిలీసి.

6 మో వినయంరె అబ్బంతరం నాపొడిలాట దన్యుడు.”

7 యోహాను సిస్యనె జేతల్లాబెల్లె, యేసు యోహాను గురించి సెట్టె తల్లా మనమానె సంగరె యాకిరి కొతాలగివురొ మొదలు దీసి, పొరొతో

ప్రాంతం కిర దిగిమంచి బులి జేసా? బాకు పిట్టిగిల్లా గసాకు దిగిమంచి బులి జెల్లీసానా?

8 ఈనె కిర దిగిమంచి బులి జేసా? విలువైల కొన్నానె పిందిగిల్ల మనమకు దిగిమాబులి జేసానా? విలువైలా కొన్నానె పిందిగిల్లలింకె రొజా బవనాలై తానె.

9 ఈనె, కిర దిగిమంచి బులి జెసా? ప్రవక్తకునా? తొమె దిగిలాట ప్రవక్త కన్నా గొప్పిట బులి మీ కొయిలించి.

10 తా గురించి యాకిరి రాసికిరి అచ్చి తో కన్నా అగరె మో సలాదికు పొడదూంచి, నెయ్యె తో కన్నా అగరె జేకిరి తో బట్టో సిద్దం కొరుసి.

11 తిల్లొంటకు జొర్నైలాలింకె బిత్తరె బాష్టిసం దిల్లా యోహాను కన్నా గొప్పిట జొన్నన్నా నీబులి తొ సంగరె కచ్చితంగా కొయిలించి. ఈనన్నా పురువురొ రాజ్యంరె తగ్గించిగిల్లాట యోహాను కన్నా గొప్పిట ఊసి.

12 బాష్టిసం దిల్లా యోహాను కలొనె దీకిరి, ఎత్తె జాంక పురువురొ రాజ్యం బలవంతంగా ఆక్రమించిగిల్లినె. ఈనె బలం తల్లాలింకె సడ బిత్తురుకు అయిలీనె.

13 యోహాను కలొజాంక ప్రవక్తనె, మోసే దర్మసాస్త్రము పురువురొ రాజ్యం గురించి కొయికుంటా అయినె.

14 తంకె కొయిలాట విన్నవించినె, యోహానుకు అయితల్లా ఏలీయా బులి తొముకు కొయికిరి అచ్చి.

15 సునితె కన్నొనె తల్లాలింకె సునొండి.

16 ఉంచినె “ఏ తరంలింకు కిడసంగరె పొల్పిమంచి? తంకె సొంత నెయ్యానై బొసికిరి గట్టిగా కొతానె లగ్గిత్తల్లా పిల్లానె సంగరె సమానంగా అచ్చె.

17 ‘అమె పిల్లనగ్రోవి పుంకినన్నా; సాకిరాక తొమె నచ్చిలీనింతో, అమె విసాదమైలా గిత్తో గయినన్నా, తొమె దుక్కించిలానింతో.’

18 కిరుకుబుల్నే యోహాను కయికిరి, పీకిరి అయిలానీ. ఈనె సొబ్బిలింకె తాకు బుత్తో దరిగిచ్చి బులి కొయినె.

19 మనమరొ పో కైకుంట, పీకుంటా అయినె. ఈనె

సొబ్బిలింకె, 'ఎయ్యో కద్దికారి, పీకారి ఈనె పన్నునె వొసూలు కొరిలాలింకు, పాపొనెకు జట్టుకారి' బులి కొయినె. పురువురొ జ్ఞానం నే పైటినె వల్లరె తీర్పు పొందువొ బులిసి."

**పురువుకు నానమ్మిలా పట్టనమూనె
(లూకా 10:13-15)**

20 ఈనె బడే అద్భుతానె కొరినెను కుండె గానెరె మారుమనుసు పొందిలానింతె. ఈనె యేసు సడకు విమర్శించిసి.

21 అయ్యో! కొరాజీనా! అయ్యో! బేత్సయిదా పట్టనమూనె! తొముకు బడే స్రమ. మియి తొ బిత్తరె కొరిలా అద్భుతానె తూరు, సీదోను గానె కొరికిరి తన్నే తంకె కెబ్బో పాపొనె సడిదీకిరి గోనిసంచి, పొసా మక్కిగీకిరి, మారుమనుసు పొందిగీకిరి తైతవ్వె.

22 ఈనె మియి కొయిలాట కిర బుల్నే తీర్పు కొయిలా దినొరె తూర్పు, సీదోను పట్టనమూనె మనమానె తొ కన్నా దయపొందిలా స్థితిరె తాసె.

23 "ఈనె, ఓ కపెర్నహూము బుల్లా గా! తువ్వు మెగొకు ఉడిజెమ్మా బులిగిల్లునా? సాకిరి జరిగినీ! తువ్వు పాతాలలోకం బిత్తరె పొడిజెవ్వు. తో బిత్తరె కొరిలా మహాత్యాలు సాదోమ నగరంరె కొరికిరి తన్నే సడ ఉంచిసె మిగిలికిరి రొయిత.

24 ఈనె మియి తొముకు కొయిలాట కిరబుల్నే తీర్పు కొయిలా దినొ సాదోమ పట్నం కన్నా తొమె నాబరించిలా స్థితిరె తాసా."

**మో పక్కు అయిండి విస్త్రాంతి దూంచి
(లూకా 10:21,22)**

25 సే సమయంరె యేసు యాకిరి బులిసి, "బో" మెగొకు బూమికి ప్రబువైలా తొత్తె స్తుతించిలించి. కిరకుబుల్నే, తువ్వు సడకు తెలివిగల్గొలింకు, తెలివిలింకె మరుగుకొరికిరి పామరులుకు తెలిసిలా పనికిరి కొరిసు.

26 వై బో! తువ్వు యాకిరి కొరువురొ తొత్తె బడే ఇష్టం.

27 మో బో మెత్తె సాబ్బి అప్పగించిసి. బోకు తప్ప పో గురించి కాకు తెలిసిని. పోకు తప్ప బో కేసా కాకు తెలిసిని. పో బచ్చిగిల్లాటకు సాబ్బి తెలియపర్చుసి.

28 బారం బోయిగీకిరి అలసిజిల్లాలింకల్లా మో పక్కరకు అయిండి. మియి తొముకు విస్త్రాంతి దూంచి.

29 మీ దిల్లా కాడికు బోయిగీకిరి, సడకు దిక్కిరి సుగ్గిండి. ఈనె మియి సాత్వికుడు, దీన మనుసు గల్లాట. సడకు తొ ఆత్మకు విస్త్రాంతి మిలుసి.

30 ఈనె మియి దిల్లా కాడికు బోయివురో సులువుగా, మియి దిల్లా బారం తేలిగ్గా తాసి.

12

విస్త్రాంతి దినో గురించి ప్రస్న
(మార్కు 2:23-28; లూకా 6:1-5)

1 గుట విస్త్రాంతి దినె యేసు, తా సిస్యనె సంగరె మిసికిరి బిల్లోనై సలికుంటా జెల్లీసి. తా సిస్యనె బొక్కొ సంగరె రొల్లందరె ఎన్నూనె చిండిగీకిరి కయివురో మొదలు కొరిసె.

2 పరిసయ్యునె ఎడ దిక్కిరి యేసు సంగరె, దిగూ “విస్త్రాంతి దినోరె తో సిస్యనె నాకొరివలిసిలాపైటి కొరిలీసె” బులి పొచ్చరిసె.

3 సెత్తెలె యేసు తంకసంగరె యాకిరి కొయిసి. దావీదుకు తా అనుచరూనెకు బొక్కొలాబెల్లె కిరకొరిసో తొముకు తెలిసినీనా?

4 సెయ్యె పురువురో మందిరముకు జేకిరి యాజకులాక తప్ప సెయ్యెన్నా తా సంగరె తల్లాలింకైనన్నా నాకైవలిసిలాంచ పురువుకు అర్పించిలా సముకపు రొట్టిసె సెయ్యె తా అనుచరూనె కైసె.

5 సెత్తాకనీ, గుడిరో యాజకూనె విస్త్రాంతి దినె పైటి కొరిసేబుల్లా వియం దర్మసాస్త్రంరె అచ్చి. సడ తంకె సాకిరి కొరికిరి దర్మసాస్త్రంకు తప్పిజిల్లీసె ఈనన్నా తూ తంకు తప్పు నాదర్నే తప్పాకనీనా. బులి దర్మసాస్త్రంరె రాసికిరి అచ్చినీనా?

6 మియి కొయిలాట కిరబుల్నే మందిరం కన్నా గొప్పమనమా ఎట్టె అచ్చి.

7 ఈనె మీ కనికరముకాక కోరిలించి గాని బలి కోరిలాట నీ బుల్లా వాక్యంరొ అర్థం తొముకు తెలిసికిరి తన్నే తొమె నిర్దోసునెకు తీర్పు తీర్చినారొ.

8 ఈనె “విస్తాంతి దినొకు మనమరొ పో ప్రబువు ఈకిరి అచ్చి” బులి కొయిసి.

అత్తో పొడిజిల్లా మనమకు బొలికొరువురొ
(మార్కు 3:1-6; లూకా 6:6-11)

9 ఈనె సెయ్యె సెట్టెతీకిరి బయలుదేరికిరి యూదునెరొ ఆరాదన చొటుకు జేసి.

10 సెట్టె అత్తో పొడిజిల్లా మనమ జొనె అచ్చి. తంకె యేసు ఉంపరె తప్పు మోపుమాసి బులి ఎదురుదిగితల్లా పరిసయ్యునె, తాకు, “విస్తాంతి దినొరె బొలికొరువురొ న్యాయమాకనా?” బులి తాకు పొచ్చురినె.

11 సడకు యేసు, “తొం బిత్తరె కే మనమకైనన్నా, గుటె గొరితన్నే సడ విస్తాంతి దినొరె గత్తోరె పొడిజిన్నే సడకు దరిగీకిరి తొమె ఉంపురుకు జింకినింతొనా?”

12 ఈనె మనమ గొరికన్నా బడే రెట్లునె విలువైలాట నీనా? సడకు విస్తాంతి దినొరె బొలికొరువురొ దర్మమాకనీనా” బులి కొయిసి.

13 సాకిరి సే అత్తో పొడిజిల్లా మనమ దీకిరి, “తో అత్తో చాపు బులిసి.”

సెయ్యె అత్తో సాపిసి. అత్తో పుర్తిగా బొలైజీకిరి దీటో అత్తో పనికిరి ఈసి.

14 ఈనె పరిసయ్యునె దోరకు జేకిరి, యేసుకు మొరదీతె పన్నాగం పన్నినె.

పురువు బచ్చిగిల్లా సేవకుడు

15 ఈనె యేసు సే సంగతి తెలిసిగీకిరి సెట్టిదీకిరి బాజేసి. బడేలింకె పురువు పొచ్చాడె జేసె. పురువు జబ్బానె దీకిరి రొల్లలింకల్లా బొలికొరిసి.

16 సెయ్యె తా గురించి కాకు కొయితెనా బులి తంకు ఆజ్ఞాపించిసి.

17 యెసయా ప్రవక్త సంగరె పురువు కొయిలా యే కొతానె సొత్తయిలాపనికిరి యే విదంగా జరిగిసి,

18 సెయ్యె మో సేవకుడు! తాకు మీ బచ్చిగించి.

తా ఉంపరె మెత్తె యిస్తమచ్చి సెయ్యె మో ఆత్మకు బడే ఆనందం కలిగించిసి.

మో ఆత్మ తా ఉంపరకు అయిపించుంచి.

సెయ్యె యూదునె నీలాలింకు న్యాయం కొరిపారి బులిసి.

19 సెయ్యె కొలి లగినీ, కేకానె పొగినీ,

సెయినై తా దొందరానె కాకు సుందిన్నీ.

20 న్యాయం కొరిలా జాంక నలిగిజిల్లా రెల్లుకు సెయ్యె బంగిని.

నుగిజితల్లా బొత్తి సెయ్యె నుగిదిన్నీ.

21 తా నారె యూదునె నీలాలింకు నిరీక్సన కలుగుసి.

యేసు, బయెల్లెబూలు

(మార్కు 3:20-30; లూకా 11:14-23)

22 సే తరవాతరె కుండెలింకె, బుత్తో దరిలా గుడ్డి మోపాకు, కొతానె నాఅయికుంటతల్లా జొనెకు యేసు పక్కరకు డక్కిగీకిరి అయిసె. యేసు తాకు బొలికొరిసి. సే కొతానె నాఅయిల మోపాకు కొతా, అంకినె అయిసె.

23 మనమానల్లా యెడ దిక్కిరి ఆచ్చర్యపొడికిరి “ఎయ్యె దావీదు పో ఈకిరి తాసి” బులిసె.

24 పరిసయ్యునె యెడ సునుకిరి, “బుత్తోనె అదికారి బయెల్లెబూలు సహాయం దీకిరి ఎయ్యె బుత్తోనుకు సొడిపించిలీసి” బులిసె.

25 తంకె ఆలోచనానె యేసుకు బుజ్జికిరి. తంకు సంగరె యాకిరి కొయిసి. తాకు సెయ్యార్క, విరోదంగా తల్లా రాజ్యం నసించిజెవ్వొ. తాకు విరోదంగా తల్లా కే పట్నం ఈనన్నా, గొరొ ఈనన్నా కూలిజోసి.

26 సాతాను సాతానుకు గొడ్డదిన్నె సెయ్యెటారినారి. సెల్లె తా రాజ్యం క్యాకిరి టారుసి?

27 మియి బయెల్లెబూలు దీకిరి బుత్తోనుకు సాడిపించినె తొలింకె కావల్లరె సాడిపించిలీసే? ఈనె తంకాక తొముకు తీర్పు తీర్పుసె.

28 బయెల్లెబూలునీ ఈనె మియి పురువురో ఆత్మ దీకిరి బుత్తోనుకు పొడిదిన్నె పురువురో రాజ్యం తొముకు అయిలాపనాక!

29 సాకిరాక అగరె బలం తల్లా మనమకు నాబందికుంటా తా గొరొబిత్తరకు జేకిరి తా వస్తువానె కేసే చొరినారె. సే బలం తల్లా మనమకు బందిలా తరవాతరాక గొరొకు చొరిపారె.

30 మో సంగరె నాతల్లా మనమ మెత్తె విరోదంగా తాసి. మో సంగరె మిసికిరి నాతల్లా మనమ చెదిరిజోసి.

31 సడకు మీ కొయిలాట కిరబుల్నే మనమ కొరిలా పాపోనె సొబ్బిటికు, దేవదూసనకు పురువు క్కమించుసి. ఈనె పురువురో ఆత్మకు వ్యతిరేకమైలా దూసనకు క్కమాపన మిల్చీ.

32 మనమరో పోకు దూసించికిరి కొతలగిలాలింకు పురువు క్కమించుసి. ఈనె పవిత్రాత్మకు దూసించికిరి కొతాలగిలాలింకు ఉంచినె యింకెబ్బుకూ క్కమించిని.

గుటె గొచ్చొ సడరో పొగలానె

(లూకా 6:43-45)

33 “తొముకు బొల్ల పొగలానె కావాలబులిగిన్నే, గొచ్చుకు బొల్లెకిరి కొరుమంచి. తో గొచ్చొ బొల్ల నీనే సడకు బొల్ల పొగలానె కాసిని. గొచ్చొకు సడరో పొగలానె వల్లరె గుర్తించిమాసి.

34 తొమె సప్పొపనాలింకె. దుష్టులు బొల్ల కొతానె క్యాకిరి కొయిపారో. హ్రుదయం బిత్తరె రొల్లాటాక తుండో కొతాలగుసి.

35 బొల్ల మనమరె బొల్ల తాసి. సాకిరాక తా బిత్తరె దీకిరి బొల్ల బయలుకు ఆసి. దుష్టుడురె చెడు తాసి గనక తా దీకిరి చెడు బయలుకు ఆసి.

36 ఈనె మియ్యి కొయిలాట కిరబుల్నే మనమానె పలికిలా సొబ్బి వ్యర్థమైలా కొతకు తీర్పు కొయిల దినో లెక్క కొయివురో ఊసి.

37 కిరుకుబుల్నే తో కొతానె వల్లరాక తొమె నిరపరాదులువో, అపరాదులువో తీర్పు పొందును” బులి కొయిసి.

అద్భుతం కోసం మగువురొ

(మార్కు 8:11,12; లూకా 11:29-32)

38 సే తరవాతరె కుండిలింకె సొస్తీనె, పరిసయున్యె తా సంగరె, “బోదకా! తువ్వు గుటె అద్భుత కార్యము కొరిమంచి బులి పొచ్చిరిసె.”

39 ఈనె ఉంచినె దుష్టులు, పురువుకు నా జనిలాలింకె తాకు అద్భుతం కొరుబులి పొచ్చిరిసె. యోనా ప్రవక్త కోసం దిగదిల్లా అద్భుతం తప్ప యింకా కే అద్భుతం తొముకు దిగదిన్నీ బులిసి.

40 కిరుకుబుల్నే, యోనా బొట్ట మచ్చొ పెట్టొరె తింట రత్తి దూసునె గడిపిసి. సాకిరాక మనమరొ పో తింట రత్తి దూసునె బూగర్బంరె తాసి.

41 నీనెవె మనమానె యోనా కొయిలా చాటింపు సునికిరి మనుసు మార్చిగిచ్చె గనక తీర్పు కొయితల్లా దినె తంకె ఏ తరంలింకు సంగరె సహా టారికిరి ఏ తరంలింకె నేరస్తులుబులి నిర్మయించినె. గాని ఉంచినె యోనా కన్నా గొప్పమనమ ఎట్టె అచ్చి.

42 దక్కిన దిక్కురె తల్లా సీబా దెసో రాని సొలోమోను జ్ఞానముకు దిగిమంచి బులికిరి బడే దూరు దీకిరి అయిసి. ఈనె తీర్పు కొయిల దినో సెయ్యె పొదరెలింకె వుంపరె నేరం మోపిలీసి. ఈనె ఉంచినె సొలోమోను కన్నా బొట్ట మనమ ఎట్టె అచ్చి.

అపవిత్రాత్మ బుల్లికిరి అయివురొ

(లూకా 11:24-26)

43 “అపవిత్రాత్మ జొనె మనమకు నడికిరి బాజెల్లా తరవాతరె సడ విస్త్రాంతి కోసం కుజ్జగికుంటా పనినీలాచోటురె బుల్లిలీసి. ఈనె సడకు విస్త్రాంతి మిల్లాని.

44 సెల్లె ‘మియి సడికిరి బారైలా మో గొరుకు యింకా బుల్లికిరి జోంచి’ బులి కొయిగిచ్చి. సడ బుల్లికిరి అయికిరి, సే గొరై కేసే నీవురొ సొబ్బి జడికిరి తల్లాట దిగిసి.

45 సెల్లె సడ జేకిరి తాకన్నా, దుష్టులైలా సత్త బుత్తోనుకు డక్కిగీకిరి అయిలీసి. సొబ్బీ మిసికిరి సే గొరొబిత్తరకు జేకిరి రొయితె అయిసి. సెల్లె సే మనమ గతి అగరెకన్నా బడే అద్దానంగా తాసి. ఏ నాబొత్తైలా తరంలింకు సాకిరాక తాసి” బులి కొయిసి.

యేసురొ మా, అన్నబయినె

(మార్కు 3:31-35; లూకా 8:19-21)

46 యేసు మనమానె సంగరె యింకా కొతలక్కుంటా అచ్చి. సెల్లె తంక మా, అన్నబయినె తా సంగరె కొతలగిమంచి బులి అయికిరి బయిలై టారిసె.

47 జొనె మనమ యేసు సంగరె, తో మా, అన్నబయినె తో సంగరె కొతలగిమంచి బులి బయిలై టారికిరి అచ్చె! బులి కొయిసి.

48 యేసు సమాదానం కొయికుంటా, “కేసె మో మా? కేసె మో అన్నబయినె?” బులి కొయిసి.

49 తా సిన్యునె ఆడుకు దిగిదీకుంటా, “ఇదిగొ మో మా, ఇదిగొ మో అన్నబయినె బులి కొయిసి.

50 కేసె పరలోకంరె తల్లా మో బోరొ ఇన్టరె సలివేయో సెయ్యాక, మో మా సెయ్యాక మో అన్నబయి మో అప్పబొయిసి” బులి కొయిసి.

13

విత్తనాలు జల్లిలాటరొ ఉపమానం

(మార్కు 4:1-9; లూకా 8:4-8)

1 సే దినై యేసు గొరొ దీకిరి జేకిరి సొంద్రొ ఒడ్డురె బొసికిరి అచ్చి.

2 తాచుట్టూ బడే మనమానె గుంపు కూడికిరి అచ్చె. సడకు సెయ్యె బోదకొరితె పడవ ఉటికిరి బొసిరిసి. మనమానె సొంద్రొ ఒడ్డురె టారికిరి అచ్చె.

3 సెయ్యె తంకు బడే వినయోనె ఉపమానాలు పనికిరి బోదించిసి.

జొనె రైతు విత్తనాలు జల్లితె జేసి.

4 సెయ్యె విత్తనాలు జల్లిలాబెల్లె కుండె విత్తనాలు బట్టో పక్కరె పొడిసె. పక్కినె అయికిరి సడకు కైపీసె.

5 ఈనె కుండె విత్తనాలు మట్టి బూతునీలా పొత్తో బూమి ఉంపరె పొడిసె. సెట్టె మట్టి నీలందరె సెరోనె బిత్తురుకు నాటిలానీ.

6 ఈనె సూర్యోదయం యీలా తరవాతరె సే మొక్కానె వాడిజీసె. సడ సెరోనె నాబోడిలందరె ఎంట్లాక సుక్కిజేసి.

7 ఈనె కుండె విత్తనాలు కొంటానె తుప్పానె మొజిరె పొడిసె. యే కొంటానె తుప్పానె బోడికిరి మొలకలుకు అనిసిపేసె.

8 ఈనె కుండె విత్తనాలు సారవంతమైలా మట్టి ఉంపరె పొడిసె. సడబిత్తరె కుండె సోయి వొంతానె పచ్చిసి, కుండె అరవై వొంతానె పచ్చిసి, కుండె ముప్పై వొంతానె పచ్చిసి.

9 సునితె కన్నోనె తల్లాలింకె సునుసె! యేసు బోద కొరితె ఉపమానాలు ఉపయోగించిసి.

ఉపమానంరొ అర్థం

(మార్కు 4:10-12; లూకా 8:9,10)

10 సిస్యూనె అయికిరి యేసుకు, “తువ్వు మనమానె సంగరె ఉపమానాలు ఉపయోగించికిరి కిరుకు కొతలగిలీను?” బులి పొచ్చరిసె.

11 సెయ్యె యాకిరి సమాదానం కొయిసి, పురువు రాజ్యంరొ రహస్యంకు తెలిసిగిల్లా జ్ఞానం తొముకు దీసి. ఈనె తంకు దిల్లాని.

12 ఈనె కాకు బూతు దీసో తాకు ఇంకా బూతు దూసి. నీలాలింకె పక్కరె దీకిరి తల్లాటంకా కడిగునుసి.

13 మియి తంకె సంగరె ఉపమానాలు దీకిరి కిరుకు కొతాలగిలించి బుల్చే, తంకె దిగిలాలింకె పనికిరి అచ్చెగాని దిగినింతె. సునిలా పనికిరి తాసె గని అర్థం కొరిగిన్నింతె, గ్రహించినింతె.

14 సాకిరాక యెసయా ప్రవక్త యంకోసం కొయిలా ప్రవచనం కొతానె సొత్తాక ఊసి,

అంకె తప్పకుంటా సునుసె, ఈనె అర్థం కొరిగిన్నింతె.

తంకె తప్పక దిగుసె ఈనె గ్రహించినింతె.

15 తంకె అంకినెదీకిరి దిక్కిరి, కన్నోనెదీకిరి సునికిరి, హ్రుదయం సంగరె అర్థం కొరిగీకిరి మో ఆడుకు

బుల్లినె మియి తంకు బోలుకొరిమి.
 ఈనె సాకిరి జరిగినాసి బులి యే మనమానె
 హుదయమునె కటిసము యాలందరె తంకు
 బొల్లకిరి సుందిన్నీ తంకు తంకె అంకినె బుజ్జగిచ్చె.

16 ఈనె తొం అంకినె దిగిపారిలీసె సడానె దన్యమైలాంచ. తొం
 కన్నోనె సునుపార్లీసె సడానె దన్యమైలాంచ.

17 ఎడ సొత్తాక కొయిలించి. కుండెలింకె ప్రవక్తానె, నీతిమంతునె
 తొమె దిగిలాంచ దిగిమంచిబులికిరి ఆసపొడిసె. ఈనె దిగినారిసె.
 తొమె సునిలాంచ సునిమ బులికిరి ఆసపొడిసె. ఈనె సున్నారిసె.

యేసు విత్తనాలు జల్లిలా ఉపమానం గురించి వివరించువురో
 (మార్కు 4:13-20; లూకా 8:11-15)

18 ఈనె విత్తనాలు జల్లిలా రైతు ఉపమానం కోసం బోదించిలీసి.

19 కుండెలింకె పురువురో రాజ్యం కోసం సునిసె. ఈనె అర్థం
 కొరిగిన్నింతె. సాట హుదయం బిత్తరె నాటిజెల్లా దైవ సందేసంకు
 దుష్టుడు అయికిరి దరిగికిరి బాజోసి. యంకు బట్టో పొక్కరె పొడిలా
 విత్తొనె సంగరె పొల్చుగివొచ్చు.

20 దైవ సందేసంకు సునికిరి ఎంత్రాక ఆనందం సంగరె
 అంగీకరించుసె. పొత్తో మట్టి ఉంపరె పొడిలా విత్తొనె సంగరె
 పొల్చువొచ్చు.

21 సడ సెరోనె బిత్తరకు నాజెవురో వల్లరె సందేసం కెత్తోకలో
 జీని కొన్టానె కాని హింసానె కాని అయిలబెల్లె తంకె ఎంత్రాక సడకు
 సడిదిపీవె.

22 దైవ సందేసముకు సునికిరి జీవితంరె కొన్టానుకు, పలియ వల్లరె
 కలిగిలా మోసంకు నిస్సహాయులైజీకిరి యింకెబ్బుకూ, తంకు కొంటానె
 మొక్కలరె పొడిలా విత్తనాలు సంగరె పొల్చువొచ్చు.

23 ఈనె దైవ సందేసముకు సునికిరి సడకు అర్థం కొరిగిల్లాలింకు
 బొల్లబూమిరె పొడిలా విత్తనాలు సంగరె పొల్చువొచ్చు. తాండ్రె కుండె
 సోయి మోతానె పలించివె, కుండె అరవై మోతానె పనికిరి కుండెలింకె
 ముప్పై మోతానె పలించుసె.

కలుపు మొక్కానెరొ ఉపమానం

24 యేసు తంకు యింగుట ఉపమానం కొయిసి, పురువురొ రాజ్యంకు బొట్ట విత్తోనె బిల్లోరె నాటిల మనమ సంగరె పొల్చువొచ్చు.

25 ఈనె గుట రత్తిరె తావుంపరె నాపొడిలాలింకె అయికిరి గోదుము విత్తనాలు మొజిరె కలుపు విత్తోనె జల్లిపీకిరి బాజెసి.

26 గోదుములు బొడిలాబెల్లె సడసంగరె పాటు గసొ మొక్కానె కూడా దిగదీసి.

27 సెల్లె పైటిలింకె, తంకె బొడొమనమానె పక్కు అయికిరి బో! తో బిల్లోరె బొట్ట విత్తోనె నాటిసునీనా; ఈనె కలుపు మొక్కానె క్యాకిరి బొడిసె? బులి పొచ్చురిసె.

28 యెడ నాపొడిలాలింకె కొరిలా పైటి బులి సే యజమాని సమాదానం కొయిసి. అమె జేకిరి సడకు జింకికిరి పొదిమొనా బులి పొచ్చురిసె.

29 సడకు సెయ్యె నా! ఉంచినె తొమె కలుపు మొక్కానె కడినె గోదుమ మొక్కానె కూడా జింకిపొక్కుదిల్లా అవకాసం అచ్చి.

30 ఈనె కట్టిలాకలో అయిలా జాంక దీటాకూడా బొడిమురొండి. సెల్లె మియి కట్టిలాలింకె సంగరె, అగరె కలుపు మొక్కానె కట్టికిరి, పుడ్డిపీతె సడకు బిడ్డానె పని బందండి. సే తర్వాతరె గోదుమ గింజలుకు పొగుకొరికిరి మో దన్నొకొట్టురె రొయిదేండి బులి కట్టిలాలింకె సంగరె కొయిమి బులి కొయిసి.

ఆవగింజరొ ఉపమానం

(మార్కు 4:30-32; లూకా 13:18,19)

31 సెయ్యె తంకు యింగుట ఉపమానం కొయిసి, పురువు రాజ్యంకు గుట ఆవగింజ సంగరె పొల్చువొచ్చు. జొనె మనమ గుట ఆవగింజ విత్తో తా తొటరె నాటిసి.

32 సడ విత్తోనె సొబ్బిటికన్న సన్నీట, బొడిలాబెల్లె మొక్కానె సొబ్బిటికన్న బొట్టగా బొడికిరి గుట గొచ్చొవూసి. పక్కినె సే కొమ్మానె ఉంపరె గూడినె బందిగివ్వె.

పులిసిలా పిండిరో ఉపమానం
(లూకా 13:20,21)

33 యేసు తంకు యింగుట ఉపమానం కొయిసి, “పురువు రాజ్యం పులిసిజెల్లా పిండివనాట. జొనె మొట్ట పులిసిలాట కుండెపిండి కడిగీకిరి బడె పిండిరె మిసిలాబెల్లె సే పిండల్లా పుల్లగా యీజేసి.”

యేసు ఉపమానాలు ఉపయోగం
(మార్కు 4:33,34)

34 యేసు మనమానెకు సొబ్బి సంగతీనె ఉపమానాలు సంగరాక కొయిసి. ఉపమానం నీకుంటా తంకు కిచ్చి కొయిలాని.

35 సడకు ప్రవక్త సంగరె సెయ్యె కొయిల కొతానె సొత్తాక ఊసి,
“మియి ఉపమానాలు సంగరె కొతాలక్కిరి,
లోకొ ఆరంబంతీకిరి నుచ్చిలా సొబ్బి కొయించి.

కలుపు మొక్కానెరో ఉపమానం అర్థం కొయివురో

36 సె తరవాతరె సెయ్యె మనమానుకు సడదీకిరి గొరొబిత్తరకు జేసి. సెయ్యె సిన్సునె అయికిరి తా బిల్లొరె కలుపు మొక్కానె ఉపమానం గురించి అముకు వివరంగా కోడి” బులి పొచ్చరిసె.

37 యేసు యాకిరి సమాదానం కొయిసి, బొల్ల విత్తోనె నాటితల్లా మోపో మనమరొ పో.

38 ఏ లొకొ బిల్లొ సంగరె పొల్చిసి. బొల్ల విత్తోనె పురువు రాజ్యంరె తల్లా మనమానదీకిరి పొల్చువురో ఈసి. బిల్లొరె కలుపు మొక్కానె దుస్టుడు సంబందూనె సంగరె పొల్చుసి.

39 సడకు నాటిల సత్తువు సాతాను సంగరె పొల్చిసె. కట్టిలాకలో యుగాంతం సంగరె పొల్చిసె. కట్టిలాలింకె దేవదూతనె సంగరె పొల్చువురో ఈసి.

40 కలుపు మొక్కానెకు జింకిపీకిరి నియ్యరె పొక్కిరి పుడ్డిలాపనికిరాక యుగాంతంరె కూడా సాకిరాక ఊసి.

41 మనమరొ పో తా దూతానెకు పొడిదీకిరి, తా రాజ్యంరె తల్లా పాపొనెకు, సెడ్డపైటినె కొరిపించిలాళింకు పోగు కొరుసి. సాకిరి పొగుకొరికిరి

42 తంకు నియ్యగుండంరె పోదూసె. సెట్టె తంకె కందికుంట దంతోనె కముడుకుంటా బాద అనుబవించుసె.

43 సే తరవాతరె నీతిమంతునె తంకె బోరొ రాజ్యంరె సూర్యుడు పనికిరి ప్రకాసించుసె. కన్నోనె రొయికిరి సున్నాలింకె అర్థం కొరుగుచ్చె.

నుచ్చిగిల్లా పలియా కోసం ఉపమానం

44 పురువు రాజ్యం బిల్లోరె నుచ్చిదిల్లా నిది పనాట. గుటె మనమ సే నిదికి కనిగిచ్చి. ఈనె వెంట్రాక నడకు నుచ్చిదీసి. సే తరవాతరె ఆనందంగా జేకిరి తా పక్కరె రొల్లాంచ సొబ్బి బిక్కిపేకిరి సే బిల్లోకు గినిసి.

ముచ్చాలు గురించి ఉపమానం

45 పురువురొ రాజ్యం బొల్ల ముచ్చాలు గురించి కుజ్జల మనమ పనికిరి అచ్చి.

46 జొనె బిక్కిగిల్లాట బొల్ల విలువైలా గుట్టె ముత్యం కనిగిసి. సె తరవాతరె జేకిరి తా పక్కరె రొల్లాటల్లా బిక్కిపేకిరి నడకు గినిసి.

వల కోసం ఉపమానం

47 ఈనె “పురువురొ రాజ్యం సోంద్రొ బిత్తరె పొక్కిరి సొబ్బి రకాలు మచ్చొనె దరిలా గుటె వలకు పోలికిరి అచ్చి.

48 వల మచ్చొనెదీకిరి పూరిజెల్లాబెల్లె మచ్చురిలింకె నడకు ఒడ్డుకు జింకికిరి బొల్ల మచ్చొనుకు బుట్టిరె పొక్కిరి నాపైటికైయిలా మచ్చొనుకు బిసురుదూసె.

49 సాకిరాక యుగాంతంరంకా దేవదూతనె అయికిరి బొల్లలింకె దీకిరి చెడ్డలింకు వేరుకొరుసి.

50 ఈనె నానుగిజిల్లా నియ్యగుండమురె పోదుసే. తంకె దుక్కొపొడుసె, బాదకు అనుబవించుసె, దంతోనె కముడుసె.”

నో సత్యం ఇంకా పుర్న సత్యం

51 “తొముకు సే సొబ్బీ అర్థమైసినా?”

బులి యేసు పొచ్చరిసి. తంకె వై బులిసె.

52 సడుకు సెయ్యె తంకసంగరె, “పురువురో రాజ్యం గురించి ఉపదేశం పొందిలా ప్రతీ దర్మసాస్త్ర పండితుడు తా కజానా తీకిరి జొనెమోపొ పుర్నాంచకు, నోంచకు పొదురుకు దన్నెలా గొరొయజమాని పనికిరి అచ్చి” బులిసి.

యేసుకు నజరేతురె తునికరించువురో
(మార్కు 6:1-6; లూకా 4:16-30)

53 యేసు ఏ ఉపమానాలు కొయిలా తరవాతరె, సే చోటు సడికిరి బాజేసి.

54 సెయ్యె తా సొంత గాకు అయిసి. సెట్టె యూదునెరో ఆరాదన చోటురె బోదించువురో మొదలు దీసి. తంకె సే బోదానె సునికిరి బడే అచ్చర్మపొడికిరి, యే జ్ఞానం, యే అద్భుతానె యెడల్లా యాకు కేటెడికిరి అయినె?

55 యెయ్యె వడ్డంగిరో పో నీనా? తా మారో నా మరియు నీనా? తా అన్నబయినె యాకోబు, యోసేపు, సీమోను, యూదా నీనా?

56 తా అప్పబొయినీనె సొబ్బిలింకె అంసంగరె తల్లీసె నీనా? ఈనె యాకు యెడానల్లా కేటెతీకిరి అయినె? బులి కొయిగిచ్చె.

57 సాకిరి కొయిగీకిరి తాకు త్రునీకరించినె. సెల్లె యేసు తంకసంగరె, “కొయికుంటా, ప్రవక్తకు తా దెసారె తా గొరె తప్ప సొబ్బిలింకె గొరవించునె” బులి కొయిసి.

58 తాకు తంకె విస్వసించిలానింతె గనక సెయ్యె సెట్టె బడే అద్భుతానె కొరిలాని.

14

బాప్టీసందిల్లా యోహానురో మొర్నొ
(మార్కు 6:14-29; లూకా 9:7-9)

1 సే కల్త్రె గలిలయకు అదికారియాలా హేరోదు యేసు గురించి సునిసి.

2 సెయ్యె తా అదికారినె సంగరె, “సెయ్యె బాప్టిసం దిల్లా యోహాను మొర్రో దీకిరి జీకిరి అయిసిబులి మో నమ్మకం. కాబట్టి అద్భుతానె కొరిలా సక్తి తా బిత్తరాక అచ్చి” బులి తా సేవకునెకు కొయిసి.

3 సాకిరి కిరుకు బులిసి బుల్నే కుండెకలోనె అగరె హేరోదు యోహానుకు బందించికిరి చెరసాలరె పొగిపించిపీసి. యాకిరి జరిగితే కారనం హేరోదియ. ఎయ్యె హేరోదు బయిలా పిలిప్పుకు నెయిపో.

4 యోహాను హేరోదుదీకిరి, “తూ హేరోదియా సంగరె మిసికిరి రొపురొ న్యాయుని!” బులి పొచ్చిరిసి.

5 యే కారనంగా హేరోదు యోహానుకు మొరదిమ్మంచిబులిగిచ్చి. ఈనె మనమానె యోహానుకు జొనె ప్రవక్తగా దిగిలీసె కాబట్టి హేరోదు తంకు దిక్కిరి డొరిజేసి.

6 హేరోదు జొర్నెలా దినే పొరువొ జరిగిసి. సేదిసె హేరోదియ జో సబరె నచ్చికిరి హేరోదుకు మెప్పించిసి.

7 సడకు సెయ్యె తా జోకు మగిలాట దూంచిబులికిరి కొతా దీసి.

8 సెయ్యె తా మా ప్రొత్సాహం వల్లరె, “బాప్టిసం దిల్లా యోహాను ముండొకు గుటె పల్లెంరె లోక్కిరి మెత్తెదెండి” బులి మగిసి.

9 యెడ సునికిరి రొజాకు బాద కలిగిసి. ఈనె అతిదులు అగరె కొతా దిల్లందరె, తా కోరిక తీర్పు బులి ఆజ్ఞాపించిసి.

10 ఎంట్రాక బటులుకు పొడిదీకిరి చెరసాలరెతల్లా యోహాను ముండొ అనిపించిపీసి.

11 జొనె బటుడు యోహాను ముండొకు గుటె పల్లెంరె దరిగీకిరి అయికిరి తాకు దీసి. సెయ్యె సడకు తా మా పక్కు దరిగీజేసి.

12 యోహాను సిస్సునె అయికిరి తా దేకు దరిగిజేకిరి సమాది కొరిసె. సే తరవాతరె జేకిరి యేసు సంగరె కొయిసె.

పాట వెయ్యిలింకు బంటదివ్వురొ

(మార్కు 6:30-44; లూకా 9:10-17; యోహాను 6:1-14)

13 సెల్లె యోహానుకు జరిగిలా సంగతి సునికిరి యేసు జొన్నాక పడవ ఉటికిరి కేసేనీలా చోటుకు జేసి. సెయ్యె జెల్లాట

పట్నాలైతల్లాలింకల్లా సునికిరి మనమనె గుంపునె గుంపునెగా గానైతీకిరి అయికిరి సలికుంటా తా పొచ్చాడెజేసి.

14 యేసు పడవరెతీకిరి వొల్లికిరి మనమానె గుంపునె గుంపునెగా సెట్టె రొప్పురొ దిగిసి. తంకంపరె సెయ్యె జాలిపొడిసి. తంకె బిత్తరె జబ్బూనెదీకిరి తల్లాలింకు సెయ్యె బొలికొరిసి.

15 సొంజయిలాబెల్లె సిస్యనె తా పక్కు అయికిరి, “యే చోటు బొనొరె అచ్చి, ఈనె ఉంచునుకు బడేసొంజైజేసి. అంకు పొడదీపెండి. గానెబిత్తరకు జేకిరి కిరైనా కడ్ది గినిగీకిరి కాసె” బులిసె.

16 యేసు, “తంకె జేతె అవసరంని. కైతె తొమె కిరైనా దేండి.” బులి తంకె సంగరె కొయిసి.

17 “అం పక్కరె పాట రొట్టెనె, దీట మచ్చొనె మాత్రమాక అచ్చి” బులి తంకె సంగరె సమాదానం కొయిసె.

18 “సడకు ఎట్టికి దరిగిరి అయిండి” బులి యేసు కొయిసి.

19 సే తరవాతరె మనమానె సెట్టెరొల్ల గసొ బయల్లరె బొసొండిబులి కొయిసి. సే పాట రొట్టెనె, దీట మచ్చొనె దరిగీకిరి మెగొ ఆడుకు దిక్కిరి పురువుకు స్తోత్రం కొయిసి. సే రొట్టెనె బంగికిరి తా సిస్యనెకు దీసి. సిస్యనె మనమానుకు బంటదీసె.

20 సొబ్బిలింకె పెట్టొపూరు కయిసె. సే తరవాత సిస్యనె మిగిల్లా ముక్కలుకు పన్నెండు బుట్టినెపూరు పూరిదీసె.

21 మొట్టానె, పిల్లనె నీకిరి ఇంచుమించు పాటవెయ్యి మంది జాంక వొడ్డపొనె సే దినె సెట్టె కడ్దినె కయిసె.

యేసు పనంపరె సలివురొ

(మార్కు 6:45-52; యోహాను 6:15-21)

22 సే తర్వాతరె యేసు తా సిస్యనె సంగరె పడవ ఉటికిరి మోకన్నా అగరె తెనాడె ఒడ్డుకు జాబులి కొయిసి. సెయ్యె సెటె రొయికిరి మనమానుకు పొడిదిపీసి.

23 మనమానుకు పొడదిల్లాతర్వాతరె యేసు జొన్నాక ప్రార్థనకొరితె పొరొత్తో ఉంపరకు జేసి. సొంజయిసి ఈనె సెయ్యె జొన్నాక సెట్టె రొయిజేసి.

24 ఒడ్డుకు పడవ బడే దూరె అచ్చి. ఎదురు బా పొగిలందరె కెరటాలు సే పడవకు మరిలీసె.

25 సొక్కలెపైలా జామురె తింట తీకిరి సొగంటబెల్లె యేసు సొంద్రొ ఉంపరె సలికిరి సిస్యనె పక్కు జేసి.

26 సెయ్యె సొంద్రొఉంపరె సలివురొ దిక్కిరి సిస్యనె, బుత్తో బులి కొయిగీకిరి డొరిజేకిరి బొట్టానె దొందరానె దొందిరిసె.

27 యేసు ఎంట్రాక, “మియ్యాక! డైర్యంగా తాడి! డొరితెనాండి!” బులి కొయిసి.

28 పేతురు, “ప్రబూ తువ్వయినె, సొంద్రొఉంపరె సలిను. మియ్యంకా సొంద్రొ ఉంపరె సలితందుకు అనుమతిదే! బులి కొయిసి.

29 పేతురు ఆయి బులి యేసు కొయిసి. నెల్లె పేతురు పడవ వొల్లికిరి పని ఉంపరె సలికిరి యేసు పక్కు జేసి.

30 ఈనె బా పొగివురొ గమనించికిరి డొరికిరి పనిబిత్తరె బుడ్డిజీకుంటా, ప్రబూ, మెత్తె కాపాడు!” బులి దొందరిసి.

31 యేసు ఎంట్రాక తా అత్తో చాపికిరి తాకు దరిగీకిరి, “అల్పవిస్వాసి, కైంకి సందేహించులీను?” బులి పొచ్చిరిసి.

32 తంకె పడవ ఉటిలా తరవాతరె బా తగ్గిజేసి.

33 పడవరెతల్లాలింకె యేసుకు మొక్కికిరి, “తువ్వ సొత్తాక పురువురొ పో!” బులి ఆచ్చర్యపొడిసె.

గెన్నేసరెతురె రోగులుకు బొలికొరువురొ
(మార్కు 6:53-56)

34 తంకె సొంద్రొ దాటికిరి గెన్నేసరెతు ఒడ్డుకు ఆయిసె.

35 సే గాలింకె యేసుకు గుర్తించికిరి చుట్టూ రొల్లా గానై రొల్లలింకల్లా కబురు కొయికిరి. మనమానె జబ్బులునెదీకిరి తల్లాలింకె తా పక్కు డక్కిపించిసె.

36 “తంకె తో కొన్నా అంచుకు ఈనెను సూగిపించు” బులి బతిమాలిగిచ్చె. తాకు సూగిల్లాలింకల్లా బోలైజీసె.

15

పూర్వీకులురొ బోద
(మార్కు 7:1-13)

1 నెల్లె కుండెలింకె పరిసయ్యునె, సాస్తీనె యెరూసలేము దీకిరి అయికిరి యేసుకు పొచ్చిరిసె.

2 “తో సిస్యనె కడ్డికైలా అగరె అత్తోనె కిరుకు దొయిగినింతె? బోడిలింకె లొగిలా ఆచారమూనె తంకె కిరుకు నిర్లక్యం కొరిలీసె?” బులి పొచ్చిరిసె.

3 నడకు యేసు యాకిరి సమాదానం కొయిసి, తొ ఆచారమూనె కోసం పురువురొ ఆజ్ఞానెకు కిరుకు యాకిరి నిర్లక్యం కొరిలీసో?

4 పురువు మా, బోకు గొరవించు బులిసి. నెత్తాకనీ మా, బోకు దూసించెలాలింకు మొర్నొసిక్కు పొగిమాసి బులి కొయిసి.

5 ఈనె జొనె తా బోకైనా మాకైనా సహాయం కొరితె దిల్లాట యెడ పురువురోట బులి కొయికిరి బోదించిలీసె.

6 తొమె తొ పారంపర్యాచారము కోసం పురువురొ కొతానుకు పొక్కురె దీపిలీసా. నడ వల్లరె తంకె మాబోనుకు గొరవించినార్లీసె.

7 తొమె మోసంకొర్లాలింకె. యెసయా తొ గురించి అగరె కొయిలాట సొత్తాకనీనా.

8 యే మనమానె మెత్తె కొతానె సంగరె గొరవించునె.

ఈనె తంకె మనుసూనె మెత్తె దూరుగా తాసి.

9 తంకె ఆరాదనలు వ్యర్థం!

తంకె బోదానె మనమానె కొరిలా ఆజ్ఞానె సంగరె సమానం బులి కొయిసి.

మనమకు అపవిత్రం కొరిలాంచ
(మార్కు 7:14-23)

10 సెల్లె యేసు మనమానుకు తా పక్కరకు అయిబులి డక్కికిరి తంకెదీకిరి, “సునికిరి అర్థం కొరిగిండి.

11 మనమ తుండొబిత్తరెకు జెల్లాట కిరనెను తాకు అపవిత్తం కొరిని. తా తుండొదీకిరి అయిల కొతానె తాకు అపవిత్తం కొరివొ” బులి కొయిసి.

12 సే తరవాత సెయ్యె సిస్యనె అయికిరి, “తా కొయిలాట సునికిరి పరిసయ్యునె రగొపొడిసె బులి తొత్తె తెలిసినినా?” బులి పొచ్చిరిసె.

13 యేసు, పరలోకంరె తల్లా మో “బో” నానాటిలా ప్రతి మొక్క సెరోనె సంగరె కడికిరి పొక్కదూసి.

14 తంకు జోలుకు జేతేనాండి. తంకె నాయికులు గుడ్డిలింకె. ఈనె తంకె పొదరలింకు బట్టొ దిగదీకిరి రొసి. గుడ్డిమనమ గుడ్డిమనమకు బట్టొ దిగదినే దీలింకె గత్తోరె పొడుసె బులిసి.

15 పేతురు, “సే ఉపమానంకు అముకు విడమరికిరి కోండి” బులి పొచ్చిరిసి.

16 యేసు తంకసంగరె యాకిరి కొయిసి. తొముకూడా అర్థం యిలాసీనా? పొదర్లింకన్నా తెలివినీలాలింకెపనికి అచ్చొ.

17 కిరైనన్నా తుండొ బిత్తరుకు జెల్లాట పెట్టొబిత్తరకు జేకిరి సెల్లె “దే” దీకిరి బయలుకు జెల్లీసిబులికిరి తొముకు తెలిసినినా.

18 ఈనె తుండొదీకిరి బయలుకు అయిలా కొతానె ప్రొదయం దీకిరి ఆసి. మనమకు అపవిత్తం కొరిలాట యెడాక.

19 కిరుకుబుల్వే, చెడు ఆలోచన, హత్య, దర్పిపైటీనె, లైంగిక దుర్మితి, సొరొపైటీనె, సొరొసాక్సీనె, దైవదూసనానె ప్రొదయంతీకిరి ఆసె.

20 యెడ కారనంగా మనమ అపవిత్తం ఈలీసి. ఈనె అత్తోనె నాదొయికిగుంటా బత్తో కైయిలెత్తె మాత్రంరె అపవిత్తం ఈని బులిసి.

తిల్లాంటరో విస్వాసం

(మార్కు 7:24-30)

21 యేసు సే చోటుకు సడదీకిరి తూరు, సీదోను ప్రాంతమూనెకు జేసి.

22 సే ప్రాంతంరె తల్లా కనాసుమొట్ట యేసు పక్కు కందికుంటా అయికిరి, “ప్రబూ! దావీదురొ పో! మో ఉంపరె దయ దిగదే. మో జోకు బుత్తో దరిగీకిరి బడే బాద పొడిలీసి” బులి తాదీకిరి కొయిసి.

23 యేసు కిచ్చి సమాదానం కొయిలాని. సడవల్లరె సిస్యనె అయికిరి, “సెయ్యె గట్టిగా దొందరికిరి అం పొచ్చాడె అయిలీసి. తాకు పొడదీపేండి” బులి విజ్ఞప్తి కొరిగిచ్చె.

24 యేసు “తప్పెజెల్లా ఇస్రాయేలు వంసమురె వొరిజెల్లా గొర్రీనె కోసం మాత్రమాక మెత్తె పొడదీసి” బులి కొయిసి.

25 సే మొట్ట అయికిరి యేసు అగరె ముడుకూనె పొక్కిరి, “ప్రబూ! మెత్తె సహాయం కొరండి!” బులి మగిసి.

26 యేసు, “పురువురో పిల్లానుకు చెందిలా బత్తో కడికిరి కుక్కురొనుకు పొగువురో నాయ్యంనీ” బులి సమాదానం కొయిసి.

27 “సొత్తాక ప్రబూ! ఈనె, కుక్కురొనె కూడా తా యజమానిరొ బల్లంపరె దీకిరి పొడిలా ముక్కలుకు కైవెనీనా?” బులి సెయ్యె బులిసి.

28 సెల్లె యేసు, “మా! తోబిత్తరె తల్లా విస్వాసం బొట్ట. తూ కోరిలాపనాక జరుగుసి” బులి సమాదానం కొయిసి. సే గడియరాక తా జ్యోకు బొలియిజిసి.

యేసు బడేలింకు బొలికొరువురొ

29 యేసు సెట్టెదీకిరి బయిలుదేరికిరి గలిలయ సొంద్రొ ఒడ్డురెదీకిరి జేసి. పొరొతో ఉంపరకు జేకిరి బొసిరిసి.

30 మనమానె గుంపునె గుంపునెగా సెట్టికు అయిసె. తంకె తా పొచ్చడె సొట్టలింకె, అంకీనె నీలాలింకె, గొడ్డత్తొనె పొడిజెల్లలింకె, కొతానె నాయిలలింకె యింకా బడే రకాలు రోగోనె రొల్లాలింకు దరిగీకిరి అయికిరి తా గొడ్డొనె అగరె పోదీసె. సెయ్యె తంకు బొలికొరిసి.

31 కొతానె నిలాలింకు కొతానె అయిసి. గొడ్డొనె అత్తొనె పొడిజెల్లాలింకె బొల్తెజిసె. కుంటిలింకె సలిసె. అంకీనె నీలాలింకు అంకీనె అయివురొ మనమానల్లా దిక్కిరి ఆచ్చర్యపొడికిరి ఇస్రాయేలు పురువుకు స్తుతించిసె.

చారవేయిమందికి కద్ది దివ్యురొ
(మార్కు 8:1-10)

32 యేసు తా సిస్యనెకు డక్కికిరి తంక సంగరె, “అంక ఉంపరె మెత్తె బడే జాలి కలిగిలీసి. తంకె తిందినెదీకిరి మోపక్కరాక అచ్చె. తంక పక్కరె కైతే కిచ్చినీ. తంకు బొక్కొరె పొడదీతె మెత్తె ఇస్టంనీ. సాకిరి పొడదినే తంకె బట్టరె ముండొబించికిరి పొడుజూసె” బులి కొయిసి.

33 తా సిస్యనె యేసుకు, “యే మారు మూల గానె సొబ్బిలింకు సారిపొడిలా రొట్టినె కేటె మిలుసి?” బులి కొయిసె.

34 “తొ పక్కరె కెత్తె రొట్టినె అచ్చె?” బులి యేసు పొచ్చిరిసి.

“సత్ర రొట్టినె, కుండె నన్ని మచ్చొనె అచ్చె” బులి తంకె సమాదానం కొయిసె.

35 యేసు మనమానెకు నేలంపరె బొసిరొండి బులి ఆజ్ఞాపించిసి.

36 సే తరవాత సత్ర రొట్టినె, మచ్చొనె కడిగిరి పురువుకు క్రుతజ్ఞతలు కొయికిరి సడకు బంగికిరి సిస్యనెకు దీసి. సిస్యనె సడానె మనమానుకు బంటదీసె.

37 సొబ్బిలింకె సంత్రుప్తిగా కైలా తరవాతరె సిస్యనె మిగిలిజిల్లా ముక్కలల్లా సత్ర బుట్టినె పూరదీసె.

38 మొట్టానె, సన్ని పిల్లానె నీకిరి చారవేయిమంది వండ్ర పొనె సేదినె సెట్టె కద్దినె కైసె.

39 సెల్లె యేసు మనమానుకు పొడదిపేకిరి పడవ ఉటికిరి మగదాను ప్రాంతం జేసి.

16

అద్భుతానె కొరుబులి పొచ్చిరివురొ

(మార్కు 8:11-13; లూకా 12:54-56)

1 సెల్లె పరిసయ్యునె, సద్ధూకయ్యునె యేసుకు పరీక్షించిమాసి బులి అయికిరి, పురువు తొత్తె పొడదీసి బులి అముకు

తెలివైలాపనికిరి“మెగో తీకిరి గుటె అద్భుతంకు అముకు దిగదె”
బులి పొచ్చిరిసె.

² ఈనె యేసు యాకిరి కొయిసి. “సొంజెబెల్లె మెగో గొర్రయికిరి తన్నే
సే దినె వాతావరనం బొల్లెతాసిబులి తొమె బులిగిల్లీసో.

³ సొక్కలె మెగో గొర్రయికిరి తైకిరి, మెగో మబ్బునె తన్నే సే దినె బొర్సొ
ఆసి బులి బులిగిల్లీసో. మెగో ఆడుకు దిక్కిరి తొమె వాతావరనంకు
సూచనకొయిపారో ఈనె యే కలొ దిగదిల్లా అద్భుతంకు అర్థం
కొరిగిన్నింతె.

⁴ దుష్టులు, బక్సీనీలాలింకె యే తరంలింకె అద్భుత కార్యాలునె
దిగదెబులికిరి మగుసె. పురువు యోనా ప్రవక్తకు కొరిలా అద్భుతం
తప్ప మరి కే అద్భుతం దిగదిల్లాని.”

బులి కొయికిరి సడకు యేసు తంకు సడదీకిరి బాజేసి.

పరిసయ్యునె సద్దూకయ్యురొ పులిసిలా పిండి
(మార్కు 8:14-21)

⁵ సిస్యునె సొంద్రొదాటికిరి జెల్లాబెల్లె, అగరె తంకె నందిగిల్ల రొట్టినుకు
దరిగిజెప్పురొ పసిరిజేసె.

⁶ యేసు తంకెదీకిరి, “జాగర్త! పరిసయ్యునె కారనంగా,
సద్దూకయ్యునె కారనంగా పులిసిలా పిండి విసయంరె దూరుగా
టారించి” బులి తంకు కొయిసి.

⁷ యే విసయం గురించి తంకె బిత్తరె తంకె కొతలగ్గీకిరి, “అమె
రొట్టినె దన్నయిలానింతో బులి” సెయ్యె సాకిరి కొయిసి బులిగిల్లీసె.

⁸ తంకె బులిగివురొ యేసుకు బుజ్జిసి. తంకె, “తొబిత్తరె
అల్పవిస్వాసంలింకె రొట్టినె నీబులికిరి తొబిత్తరె తొమె క్షేంకి
కొతాలగ్గీసో?

⁹ తొముకు యింకా తెలిసినీనా? పాటవెయ్యి మందికి పాట రొట్టినె
బంటదిల్లాబెల్లె మిగిల్లా ముక్కలుకు తొమె కెత్తో బుట్టినె పూరదీసెవో
తొమె పసిరిజీసోనా?

10 ఈనె నత్త రొట్టినుకు చారవెయ్యి మందికి బంటిలాబెల్లె మిగిల్లా ముక్కలు తొమె కెత్తె బుట్టినె పూరూ పూరదీసెవో గురుతు నీనా?

11 మియి తొముకు కొయిలాట రొట్టినె కోసం నీబులి తొమె కిరుకు అర్థం కొరిగిన్నార్లీసో? పరిసయ్యునె, సద్దుకయ్యునె వల్లరె కలిగిలా పులిసిలాటకు దూరుగా టారింబి” బులి కొయిలీసి.

12 సెత్తెలె సెయ్యె రొట్టెలుకు ఉపయోగించిలా పులిసిల వినయంరె జాగర్త పొడుబులి బుల్లానీ గాని పరిసయ్యునె బోద వినయంరె, సద్దుకయ్యునె బోద వినయంరె జాగర్త పొడుబులి తంకు అర్థమైసి.

పేతురు యేసు గురించి కొయివురో

(మార్కు 8:27-30; లూకా 9:18-21; యోహాను 6:68,69)

13 యేసు కైసరియ పిలిప్పు పట్నం పక్కరె తల్లా గానె పక్కు అయిలాబెల్లె తా సిన్యునె సంగరె, “మనమరో పో గురించి మనమానె కిరబులి కొయిగిల్లీసె?” బులి పొచ్చరిసి.

14 తంకె “కుండె మనమానె బాప్టీసం దిల్లా యోహాను బులిసె. కుండె మనమానె ఏలీయా బులిసె. కుండె మనమానె యిర్మీయా బులిసె. ఇంకా కుండె మనమానె ప్రవక్తానెరె జొనైకిరి రొవ్వొచ్చు బులి బులిగిల్లీసె” బులి కొయిసె.

15 యేసు, ఈనె తొం వినయంకిర? మియ్యి కేసె బులి తొమె బులిగిలిసో? బులి తంకు పొచ్చరిసి.

16 సడకు సీమోను పేతురు, తువ్వు క్రిస్తు సజివుడైలా పురువురో పో బులి సమాదానం కొయిసి.

17 సడకు యేసు యాకిరి కొయిసి, “యోనా పో! సీమోనూ, తూ దన్యుడు! యే వినయంకు తొత్తె మనమానె కొయిలానింతె ఈనె పరలోకంరె తల్లా మో బోకా కొయిసి.

18 ఈనె తూ పేతురు బులి మియి కొయిలింబి. యే పొత్తో ఉంపరె మియి మో సంగంకు బండుంబి. నే సంగం అగరె పాతాలలోకం కూడా ఎదిరించినారి బులి కచ్చితంగా కొయిలింబి.

19 పురువురో రాజ్యంరె తాలమునె మియి తొత్తెదిమ్మి. యే బూమి ఉంపరె తూ నిరాకరించిలాలింకు పరలోకంరె కూడా నిరాకరించుంబి.

యే ప్రపంచంరె తూ అంగీకరించితాలింకు పరలోకంరె కూడా అంగీకరించుంచి” బులిసి.

20 సే తరవాతరె, సెయ్యో క్రీస్తు బుల్లా వినయం కాకూ కొయితెనా బులికిరి సిస్యనె సంగరె కొయిసి.

యేసురొ స్రమ, మొర్నొ

(మార్కు 8:31-9:1; లూకా 9:22-27)

21 సెత్తెలె దీకిరి యేసు తా సిస్యనె సంగరె సెయ్యో యెరూసలేముకు జెవ్వొలిసిల సంగతి గురించి, సెట్టె తల్లా బొడిలింకె, ప్రదానయాజకూనె, సాస్తీనె తాకు హింసించితాలి వినయం గురించి, సెయ్యో పొందివలిసిలా మొర్నొ గురించి, తింటో దినెరె జీకిరి అయితల్లాట గురించి కొయివురొ మొదలు కొరిసి.

22 పేతురు తాకు గుట పక్కు డక్కికిరి ప్రబూ సాకిరి కొతాలగితెనాబులి, “పురువు తాంపరె దయ దిగదిమంచె! సాకిరి కెబ్బుకు జరిగినాసి!” బులిసి.

23 యేసు పేతురు ఆడుకు బుల్లికిరి, సాతాను “మో అగరె దీకిరి బాజా, తువ్వు మెత్తె ఆటంకం కలిగించిలీను యే ఆలోచనానె మనమానె తీకిరి అయిలాంచ పురువుతీకిరి అయిలాంచనీ” బులి కొయిసి.

24 సెల్లె యేసు తా సిస్యనె సంగరె, “మో పొచ్చాడె అయిమాసిబులిగిల్లాట సొబ్బీ సడదీకిరి, మో సిలువకు బొయికుంటా మెత్తె అనుసరించిమంచి.

25 కేనన్నా తా పొర్నొకు కాపాడిగిమాసి బులిగిల్లాట సడకు వొరదగివ్వొ. ఈనె మో కోసం తా పొర్నొకు సడదగిల్లలింకె సడకు పొందిగివ్వొ.

26 లొకొ అల్లా జయించికిరి తా పొర్నొకు వొరదగిన్నే మనమకు కిర లవొ కలుగుసి? సే పొర్నొకు బుల్లికిరి పొందిగిత్తె సెయ్యో కిరదీపారి?

27 మనమరొ పో తా దేవదూతానె సంగరె మిసికిరి, బో మహిమ సంగరె అయిలీసి. సెత్తెలె సెయ్యో ప్రతి మనమకు కొరిలా పైటినె వల్లరె ప్రతివలం దూసి.

28 ఎట్టె టారిలాలింకె బిత్తరె కుండెలింకె మనమరొ పో తా రాజ్యం సంగరె అయిలాట దిగిలాజాంక జీకిరి తాసె” బులి కచ్చితంగా కొయిలించి బులిసి.

17

యేసు రూపం మారువురొ
(మార్కు 9:2-13; లూకా 9:28-36)

1 యేసు సో దినోనె తరవాతరె పేతురుకు, యాకోబుకు, యాకోబు బయిల యోహానుకు, గుటె ఎత్తెలాపోరొతంపరకు తా పొచ్చాడె ప్రత్యేకంగా డక్కిగీకిరి జేసి.

2 సెయ్యె సెట్టె తల్లాలింకగరె దివ్యరూపం పొందిసి. తా మూ సూర్యుడుపని మెరిసి. తా కొన్నానె హల్లో పనికిరి దగదగా మెరిసె.

3 సే గడియరె తంకగరె మోసే, ఏలీయా ప్రత్యక్షమైసె. తంకె యేసు సంగరె కొతలగివురొ సిస్యునె దిగిసె.

4 సెల్లె పేతురు యేసు సంగరె, “ప్రబూ, అమె ఎట్టె రొవ్వరొ బొట్ట. తొత్తె ఇస్టమైసె తింట పర్నసాలానె బందిపించుంచి తొత్తె గుటె, మోసే గుటె, ఏలీయాకు గుటె” బులి కొయిసి.

5 సెయ్యె యింకా కొతలగితల్లాబెల్లె గుటె కాంతివంతంమైలా మెగో సెట్టె టారిలాలింకు బుజ్జిపేసి. సెల్లె సే మెగో దీకిరి గుటె స్వరమైకిరి, “ఎయ్యె మో యిస్టమైలా పో, ఆ గురించి మీ ఆనందించిలించి, ఆ కొత సునొండి” బులి సుందీసి.

6 ఎడ సునికిరి సిస్యునె డొరొసంగరె బొల్లాపొడిజిసె.

7 యేసు అయికిరి తంకు సుగీకిరి “ఉటోండి, డొరితెనాండి” బులి కొయిసి.

8 ఈనె తంకె ఉటికిరి దిగిలాబెల్లె తంకు యేసుతప్ప యింకేసి దిగదిల్లానింతె.

9 తంకె పొరొతొ వొల్లికిరి తొల్లుకు అయితల్లాబెల్లె యేసు, “మనమరొ పో జీకిరి అయిలాజాంక తొమె దిగిలా యే దర్సనం గురించి కాకు కొయితెనాండి” బులి ఆజ్ఞాపించిసి.

10 సెల్లె తా సిస్యనె “అగరె ఏలీయా అయిమంచి బులి సాస్త్రినె కిరుకుబుల్లీనె” బులి పొచ్చిరినె.

11 సడకు యేసు యాకిరి సమాదానం కొయిసి, “ఏలీయా తప్పకుండా ఆసి. అయికిరి అగరాక సాబ్బీ సిద్ధపరిచివొ బుల్లా కొత సొత్తాక.

12 మియి కొయిలాట కిరబుల్లీ, ఈనె ఏలీయా అగరాక అయిసి. ఈనె తంకె తాకు గుర్తించినారికిరి తాకు తంకె ఇస్తమైలాపనికిరి కొరినె. సాకిరాక మనమరొ పో కూడా తంకవల్లరె ప్రమ అనుబవించుసి బులి కొయిలింబి.”

13 యేసు బాప్టిసం దిల్లా యోహాను గురించి కొయిసి బులి సిస్యనెకు సెల్లె అర్థమైసి.

బుత్తో దరిలా జొనె కుర్రకు యేసు బొలికొరివురొ
(మార్కు 9:14-29; లూకా 9:37-43)

14 సెల్లె తంకె మనమానె పక్కరెదీకిరి బుల్లికిరి అయిలాబెల్లె జొనె మనమ యేసు పక్క అయికిరి మోకరించిసి,

15 “ప్రబూ! మో పో ఉంపరె దయ దిగదె. సెయ్యె మూర్చజబ్బుసంగరె బడే బాదపొడిలీసి. కొతకొతకు నియ్యరె, పనిరె పొడిజెల్లీసి.

16 తాకు తొ సిస్యనె పక్కరకు దరిగీకిరి అయింబి. ఈనె తంకె తాకు బొలికొరినారిసె” బులి కొయిసి.

17 సెల్లె యేసు, “మూర్కులైలా తొబిత్తరె విస్వాసంనీ. మియి కెత్తె కలో తొనంగరె తమ్మంచి? కెత్తె కలో తొ కోసం ఓర్చిగిమ్మి? తాకు మో పక్కరకు డక్కిగీకిరి అయిండి” బులి కొయిసి.

18 యేసు సే బుత్తోకు బాజాబులికిరి గట్టిగా కొయిసి. సడ సే పిల్లాసాదీకిరి బయలుకు అయిసి. సే గడియరాక సే పిల్లాసుకు బొల్లెసి.

19 సిస్యనె సే తరవాతరె యేసు పక్కరకు ప్రత్యేకంగా అయికిరి, “అమె కిరుకు సడకు పొడదిన్నారించొ?” బులి పొచ్చిరినె.

20 యేసు, తొబిత్తరె ఆవగింజెత్తె విస్వాసం నీ గనుక తొమె సడకు పొడదిన్నారిసా. ఈనె ఎడ సొత్తాక.

21 తొబిత్తరె ఆవగింజెత్తె విస్వాసము రొన్నె చాలు. తొమె ఏ బొనో సంగరె సెటుకు జా బులి కొయినె జోసి. “తొముకు నాఅత్తరయిలాట తన్ని” బులి కొయిసి. ప్రార్థన వలరాక గానీ యింకా కిరసంగరె జెన్నీ బులి కొయిసి.*

యేసు యింగుటె బెల్లె తా మొర్నొ కోసం కొయివురో
(మార్కు 9:30-32; లూకా 9:43-45)

22 ఈనె సిస్యనె గలిలయరె యింకా మిసిగిల్లబెల్లె యేసు తంకెసంగరె, “మనమరొ పో మనమానెకు అప్పగించబొడుసి బులి కొయిసి.

23 తంకె తాకు మొరుదూసె. ఈనె తింటో దినై సెయ్యె మొర్నొ దీకిరి జీకిరి ఆసి” బులి కొయిసి. ఎడ సునికిరి సిస్యనె బడే దుక్కొపొడిసి.

మందిరంరొ పన్ను కోసం

24 యేసు, తా సిస్యనె కపెర్నహూముకు చేరిగిల్లాబెల్లె, సెట్టె మందిరంరొ పన్నునె వసూలు కొరిలాలింకె పేతురు పక్కరకు అయికిరి, “తొ బోదకుడు మందిరంరొ పన్ను చెల్లించిసినా?” బులి ప్రస్నించిసె.

25 “దూసి” బులి పేతురు సమాదానం కొయికిరి గొరొబిత్తరకు జేసి. సెయ్యె కిచ్చి నా కొతలగిలా అగరె యేసు, “సీమోను తూ కిరబుల్లిసు? రొజానె యే బూమి ఉంపరె పన్నునె కా పక్కరె వసూలుకొరెవె? తా స్వంత దేసాలింకె పక్కరె దీకిరినా? పొదర్లింకె పక్కరె దికిరినా?” బులి పొచ్చిరిసి.

26 “పొదర్లింకె పక్కరె” బులి పేతురు సమాదానం కొయిసి. యేసు సాకిరియినె పన్ను బందివలిసిలా అవసరం నీబులి కొత!

27 ఈనె తంకు ఇబ్బంది లొగివురో మెత్తె ఇన్ఱంనీ. సొంద్రొ పక్కరకు జేకిరి గేలం పొగు! అగరె దరిలా మచ్చొ తుండో పిటికిరి దిగినే అముకు సారిపొడిలా నానెం మిలివొ. నడకు దరిగీకిరి జేకిరి అం దీలింకె పన్ను బందివే! బులి కొయిసి.

* 17:21 ఎడ మూల గ్రంథాలరె నీ

18

కేసె గొప్పిట

(మార్కు 9:33-37; లూకా 9:46-48)

¹ సె తరవాతరె సిస్యనె యేసు పక్కరకు అయికిరి, “ఈనె పురువురో రాజ్యంరె సొబ్బిలింకె కన్నా గొప్పలింకె కేసే?” బులి పొచ్చరిసె.

² యేసు గుటె సన్ని పిల్లాసొకు పక్కరకు అయిబులి డక్కికిరి తాకు తంకె మొజిరి టారెదీకిరి యాకిరి కొయిసి,

³ “తోమె మారికిరి, తోమె మనుసూనె బిత్తరె సన్ని పిల్లానె పని నారొన్నే పురువురో రాజ్యంకు జెన్నారో” బులి కచ్చితంగా కొయిలించి.

⁴ సడకు ఎ సన్ని పిల్లసుకు తల్లా మనస్సు కలిగికిరి తగ్గించిగిల్లా మనమ పురువురో రాజ్యంరె సొబ్బిలింకె కన్నా గొప్పలింకెపని పరిగినింపబోడుసి.

⁵ సెత్తాకనీ యాట సన్ని పిల్లనెరె జోనుకు మో నారె చేర్చిగిన్నె మెత్తె చేర్చిగివ్వొ.

పాపం కొరితె సోదింపబోడివురో

(మార్కు 9:42-48; లూకా 17:1; 2)

⁶ ఈనె ఎ సన్ని పిల్లనె విస్వాసంకు కెసన్నా ఆటంకం కొరితె కారనం యాలకన్నా, బెక్కుకు తిరగలి పొత్తో బందికిరి లోతైల సోంద్రొరె పొక్కుదివురో బొట్ట.

⁷ అబ్యంతరములు వల్లరె ఏ లొకొకు స్రమ; అబ్యంతరముకు యివురో తప్పినీ. ఈనె కావల్లరె అబ్యంతరము ఆసొ సే మనమకు స్రమ.

⁸ తో గొడ్డో, తో అత్తో తొత్తె అబ్యంతరం కొర్నె సడకు అనికిరి పొక్కుదెండి. దీట గొడ్డోనె దీట అత్తోనె రొయికిరి కెబ్బుకు పుడ్డయితల్లా నియ్యరె పొడిలాకన్నా, సొట్టమోపాగ ఈనె గొడ్డోనె అత్తోనె నీలా మోపొ పనికిరి రొయికిరి నిత్యజీవం పొందిగివురో బొట్ట.

9 ఈనె అంకి తొత్తె అబ్బంతరం కొర్నె సడకు జింకికిరి పొక్కదెండి. దీట అంకి రొయికిరి నరకంబిత్తరె నియ్యరె పొడివురొకన్నా గుటె అంకి దీకిరి పరలోకం బిత్తురుకు జెవురొ బొల్ల.

వొరిజెల్లా గొరె

(లూకా 15:3-7)

10 ఏ సన్ని పిల్లానె కాకు సన్ని దిగా దిగితెనాండి. మియ్యి కొయిలాట కిరబుల్లె పరలోకంరె తల్లా యే దూతానె పరలోకంరె తల్లా మో బో మూకు కెబ్బుకు దిక్కికుంటా తాసె.

11 *

12 గుటె పక్కరె సోయి గొర్రెనె అచ్చెబులిగిండి. సడానె గుటె గొర్రె తప్పిజెన్నే, సెయ్యె సే తొబైతొమ్మిది గొర్రెనె బొనొ ఉంపరె సడదీకిరి, సె తప్పిజెల్ల గొర్రె కోసం కుజ్జినీనా? తొమె కిరబులుసో?

13 ఎడ సొత్తాక, సే గొర్రెమిల్లె సే తొబైతొమ్మిది గొర్రెనె కన్నా సెయ్యె సడవల్లరె బడే ఆనందించుసి.

14 సాకిరాక పరలోకంరె తల్లా మో బో ఎ సన్ని పిల్లానె కేసె తప్పిజెవురొ పరలోకంరె బో ఆనందించని.

పాపంరె తల్లా అన్నబయినె అప్పబొయినె

15 తొ బయి తొంపరె తప్పు కొర్నె తా పక్కరకు జేకిరి సెయ్యె కొరిలా తప్పు తాకు జొన్నే తల్లాబెల్లె కోండి. సెయ్యె తొ కొతా సున్నే తాకు తూ బుల్లికిరి సంపాదించిగిల్లాపనికిరాక.

16 సెయ్యె తొ కొత నాసున్నే, జొన్నె, నీనె దీలింకు సాక్సీనె తొ పొచ్చాడె దరిగి జాండి. కిరుకుబుల్లె ప్రతి వినయముకు నిర్నయించితె లేకనానె కొయిలా పనికిరి దీలింకె నీనె తిల్లింకె సాక్సం కొయిమంచి.

17 తొ కొతా సునితె సెయ్యె నాఅంగికరించినె జేకిరి తంకె సంగం కోండి. సెయ్యె సంగం కొయిలా కొతకూడ నాసున్నే తాకు తొమె పొదరెలింకెగా పన్నునె వొసులు కొరిలా పాపొనెగా బులిగిండి.

* 18:11 యే వాక్యం అసల్లెలా గ్రంథాలురె నీ

నిరాకరించువురొ, అంగీకరించువురొ

18 ఈనె యే బూమంపరె తొమె కిరకు బందించువోయె, సడ పరలోకంరె బందింపబొడివో; బూమంపరె తొమె కిరకు పిటివోయె, సడ పరలోకంరె పిటుసి బులి తొ దీకిరి కచ్చితంగా కొయిలించి.

19 సడాకనీ, మియ్యి కొయిలాట కిరబుల్నె తొబిత్తరె దీలింకె మిసికిరి బూమంపరె ఏకమైకిరి కిరగురించన్నా ప్రార్థించినె, నెల్లె పరలోకంరె తల్లా మో బో సడ తొముకు సొత్తాక అనుగ్రహించుసి.

20 కిరుకుబుల్నె మో నారె దీలింకె నీనే తిల్లింకె కేటె మిసికిరితన్నె మియ్యి నెట్టె తంకెదీకిరి తాంచి.

నాక్సమించిలా సేవకుడురొ ఉపమానం

(లూకా 17:3,4)

21 నెల్లె పేతురు యేసు పక్కరకు అయికిరి, “ప్రబూ! మో బయి మెత్తె పాపం కొర్నే మియ్యి కెత్తెబెల్లె తాకు క్సమించిమాసి? సత్తబెల్లెనా?” బులి పొచ్చరిసి.

22 సడకు యేసు యాకిరి సమాదానం కొయిసి. ఏడుసార్లునీ, డెబ్బది ఏడు సార్లు క్సమించిమాసి బులి కొయిలించి.

23 ఈనె పురువురొ రాజ్యం తా సేవకునె సంగరె లెక్కలు పరిస్కరించిగిమ్మంచి బుల్లా జొనె రొజా సంగరె పోల్చికిరి అచ్చి.

24 సే రొజా లెక్కలు దిగివురొ మొదలు లొగిలాబెల్లె వేలకొలది సున్న నానేలు అప్పు తల్లా జొనె మనమకు బటులు రొజా పక్కరకు డక్కిగీకిరి అయినె.

25 ఈనె అప్పు తల్లా మోపొ పక్కరె అప్పు తీర్చితె పలియనీ. సడకు సే రొజా తాకు, తా నెయివుకు, తా కుటుంబంకు, తాపక్కరె తల్లా సొరుకోనె సొబ్బి బిక్కిపీకిరి అప్పు తీర్చు బులికిరి ఆజ్ఞాపించిసి.

26 సే సేవకుడు రొజా అగరె ముడుకూనె పొక్కిరి, కొద్ది కలో దే, తొత్తె దివ్వలిసిలా పలియ సొబ్బి దీపించి బులి బతిమాలిగిచ్చి.

27 రొజా సే సేవకుడు ఉంపరె దయసంగరె కనికరంపొడికిరి క్సమించికిరి తాకు విడుదల కొరిసి. సడ వుంపరె తాకు అప్పు కూడా నాదీకుంట కొరిసి.

28 సే సేవకుడు బయలుకు జేకిరి, తాదీకిరి మిసికిరి పైటికొరిలా సేవకుడుకు దిగిసి. తాకు వెయ్యి వెండినానేలు అప్పుతల్లా మొపొరొ బెక్కి దరిగీకిరి, మో అప్పు తీర్చు బులి వేదించిసి.

29 అప్పుతల్లా సేవకుడు ముడుకూనెపొక్కిరి, కొద్ది కలొ గడువు దే తో అప్పు తీర్చుపూంచి బులి బతిమాలిగిచ్చి.

30 ఈనె అప్పుదిల్లా మోపొ సడకు అంగీకరించిలాని. ఈనె జేకిరి తా అప్పు తీర్చిల జాంక సె అప్పుతల్లా మొపొకు చెరసాలరె పొగిపించిసి.

31 తా సంగరె తల్లా సేవకుడు జరిగిలాట దిగిసి. తంకు బడె బాదపొడిసి. తంకె జేకిరి జరిగిలాటల్లా తంకె రొజా సంగరె కొయినె.

32 సెల్లా సే రొజా సే సేవకుడు డక్కికిరి, రగొ సంగరె దుర్మార్గుడా! తువ్వ మెత్తె బతిమాలందుకు తో అప్పు అల్లా క్షమించించి.

33 ఈనె మియ్యి తో ఉంపరె దయ దిగదిల్లవని తాకు తోసంగరె తల్లా సేవకుడు ఉంపరె దయ దిగదిమ్మాసినినా? బులిసి.

34 సే తరవాతరె రొజా బడె రగొసంగరె తా అప్పు అల్లా తీర్చిలా జాంక సిక్కు లొగు బులికిరి సే సేవకుడుకు బలులుకు అప్పగించిసి.

35 సడకు యేసు, తొం బిత్తరె ప్రతిజొనె తొం బయికు మనసార నాక్సమించినె పరలోకంరె తల్లా మో బో తొం పట్ల సే రొజా పనాక కొరివో.

19

విడాకులు గురించి యేసు బోదించివురో
(మార్కు 10:1-12)

1 యేసు కొతలగివురో ఈజిల్లా తరవాతరె గలిలయ సడదీకిరి యెర్దాను వొడ్డుతెనాడె తల్లా యూదయ ప్రాంతంకు జేసి.

2 మనమానె గుంపునె గుంపునెగా తా పొచ్చాడె జేసె. సెయ్యె తంకు బొలికొరిసి.

3 కుండెలింకె పరిసయ్యునె తాకు పరీక్షించిమాసి బులి తా పక్కు అయికిరి, “వొండ్రపో తా నైపోకు కే కారనం దిగదీకిరి విడాకులు దివ్వొచ్చునా?” బులి పొచ్చిరిసె.

4 నెయ్యె, “అగరె స్రుష్టకర్త వొడ్డపోకు, తిట్టాంటకు కొరిసి బులి తొమె లేకనానెరె చదివిలానింతోనా? బులిసి.

5 సడవల్లరె వొడ్డపో తా మా, బోకు సడికిరి తా నైపో సంగరె గుట్టెవూసి. తంకె దీలింకె మిసికిరి గుట దే గా జూసె.

6 సీ కారనంరె తంకె యింక అగరె దీలింకెగా నీకుండా జొన్నెపనికిరి తాసె! పురువు ఏకం కొరిలాలింకు మనమానె వేరుకొరినాసి” బులి సమాదానం కొయిసి.

7 “ఈనె వొడ్డపో యిడాకులు పత్రం తా నైపోకు దీకిరి తాకు పొడదిపించువొచ్చు బులికిరి మోసే కిరుకు ఆజ్ఞాపించిసి?” బులి పరిసయులు పొచ్చురిసె.

8 యేసు, సీ “కొయిలా కొతానె తొమె సునిలానింతో గనక తో నైపోకు విడాకులుదీతె మోసే తొముకు అనుమతి దీసి. ఈనె అగరెదీకిరి యాకిరినీ.

9 ఈనె మియ్యి కొయిలాట కిరబుల్నే, కే మనమైనా తా నైపోరొ దర్పిపైటి వినయంరె తప్ప నైపోకు విడాకులుదీకిరి యింగుటె మొట్టకు బ్యాకొరిగిన్నే తాదీకిరి దర్పిపైటి కొరిలాపని ఊసి.” బులిసి.

10 సిస్యనె తాకు, “విడాకులుదీతె యడాక కారనం కావలసియినె బ్యా నాకొరిగీకుంటా రొవ్వరొ బొట్ట”బులిసి.

11 యేసు, “తూ కొయిలా యే బోద సొబ్బిలింకు సాద్యంనీ. ఈనె పురువు అనుగ్రహించిలాలింకు మాత్రమాక.

12 బ్య నా కొరిగితే బడే కారనాలు తాసె. కుండిలింకె మా పెట్టాక నపుంసకులుగా జొరైసె. ఈనె బ్య కొరిగిన్నింతె. ఈనె కుండిలింకె పొదరలింకు నపుంసకులుగా కొరుసె. ఈనె బ్య కొరిగిన్నింతె. ఈనె కుండిలింకె పురువురొ రాజ్యం గురించి బ్య కొరిగిన్నింతె. ఎ బోదకు అంగీకరించిలాలింకె అంగీకరించొడి” బులి సమాదానం కొయిసి.

యేసు సన్నిపిల్లానుకు ఆసిర్వదించివురొ
(మార్కు 10:13-16; లూకా 18:15-17)

13 నెల్లె యేసు తా అత్తోకు నన్ని పిల్లనెరో ముండొంపరె లొక్కిరి తంకోసం ప్రార్థన కొరిమంచిబులి కుండిలింకె మనమానె తంకు దరిగి అయినె. ఈనె సే డక్కిగీకిరి అయిలలింకు సిస్యనె గద్దించినె.

14 ఈనె యేసు, “పురువురో రాజ్యం తంకపనాలింక్ష్వాక. తంకు మో పక్కు అయిమురోండి తంకు ఆపితెనాండి” బులి కొయినె.

15 తంకె ముండొంపరె అత్తోలొక్కిరి ఆసిర్వదించిలా తరవాతరె యేసు నెట్టెదీకిరి బాజేసి.

పలియతల్లా బెండకుర్ర

(మార్కు 10:17-31; లూకా 18:18-30)

16 గుటెబెల్లె జొనె బెండకుర్ర యేసు పక్కరకు అయికిరి, “బొదకుడా! నిత్యజీవం పొందిమంచిబుల్నే మియి కిర బొల్ల పైటి కొరిమంచి?” బులి పొచ్చిరిసి.

17 నడకు యేసు, “బొల్ల గురించి మెత్తెకిరుకు పొచ్చిరిలీను? బొల్ల మనమ జొన్నాక అచ్చి. తూ నిత్యజీవం పొందిమంచిబుల్నే ఆజ్ఞానెకు పాటించిమంచి” బులి నమాదానం కొయినె.

18 “కే ఆజ్ఞానె?” బులి సే బెండకుర్ర పొచ్చిరిసి. యేసు, “మనమకు మొరదినాసి, దర్పిపైటి కొరినాసి, సారొపైటి కొరినాసి, సారొ సాక్సం కొయినాసి.

19 మాకు బోకు గొరవించిమాసి. తోపనికిరాక తో పొరుగులింకు ప్రేమించిమంచి” బులి కొయినె.

20 సే బెండకుర్ర, “మియి ఏ ఆజ్ఞలల్లా పాటించిలించి. యింకా కిరకొరిమంచి?” బులి పొచ్చిరిసి.

21 నడకు యేసు, “తూ పరిపూర్నుడు ఈమాసి బులిగిన్నే, జేకిరి తో పక్కరె తల్లాట బిక్కికిరి నీలాలింకు దే! సాకిరి కొర్నే తొత్తె పరలోకంరె పలియ మిలుసి. సే తరవాతరె మెత్తె అనుసరించు” బులి నమాదానం కొయినె.

22 సే బెండకుర్ర పక్కరె బడే పలియ తల్లందరె యేసు కొయిలాట సునికిరి విచారంసంగరె బాజేసి.

23 సే తరవాతరె యేసు తా సిస్యునెసంగరె, పలియ తల్లలింకె పురువురొ రాజ్యంబిత్తురుకు అయివురొ బడేకొస్తా బులి మియి కచ్చితంగా కొయిలించి.

24 మియి యింకా కొయిలించి. పలియతల్లాట పురువురొ రాజ్యంబిత్తురుకు జెవురొకన్నా, ఒంటి సూదిబెజ్జంతీకిరి దూరిజెవురొ సులువు బులి కొయిసి.

25 సిస్యునె ఏ కొత సునికిరి బడే ఆచ్చర్యపొడిసె, “ఈనె కేసె రక్సన పొందుపారె?” బులి పొచ్చిరిసి.

26 సెల్లె యేసు తంకాడుకు దిక్కిరి, “అడ మనమకు అసాద్యమాక ఈనె పురువుకు సొబ్బి సాద్యమాక” బులి కొయిసి.

27 సెల్లె పేతురు, “తో పొచ్చాడె అయితె అమె సొబ్బి నడదిపించో. ఈనె, అముకు కిర మిలివో?” బులి పొచ్చిరిసి.

28 యేసు, నో ప్రవంచంరె మనమరొ పో తేజోవంతుడుయికిరి సింహాసనమంపరె బొసురుసి. మో పొచ్చాడె అయిలా తొమ్మంకా పన్నెండు సింహాసనాలు ఉంపరె బొసిరికిరి ఇస్రాయేలు మనమానెబిత్తరె పన్నెండు గోత్రాలులింకు తీర్పుకొయిసో బులి కచ్చితంగా కొయిలించి.

29 మో నా కోసం గొరొనెకన్నా, అన్నబయినెకన్నా, అప్పుబొయినెకన్నా, మా, బోకన్నా, పిల్లానుకు, బిల్లోనెకన్నా నడిదిగిల్లాలింకె నడకు సోయి వంతులు వలం నిత్యజీవం కూడా పొందిగివ్వె.

30 ఈనె అగరె తల్లాలింకె బిత్తరె బడేలింకె పొచ్చుకు జూసె. పొచ్చాడె తల్లాలింకె బిత్తరె బడేలింకె అగురుకు ఆసె! బులి కొయిసి.

20

ద్రాక్ష తోటరొ పైటిలింకె కోసం

1 పురువురొ రాజ్యో యాకిరి అచ్చి. గుటె ద్రాక్షతోట యజమానిసంగరె పొలికిరి అచ్చి. గుటెబెల్లె తోటరె పైటి కొరితె పైటిలింకు డక్కిమంచి బులి సొక్కలాక ఉటికిరి జేసి.

2 సే దినె పైటి కొరిలాలింకు గుటె వెండినానెం దూంచిబులి ఒప్పిగీకిరి తంకు తా ద్రాక్సతోటకు పొడదీసి.

3 సెయ్యె సొక్కలె తొమ్మిదిగంటలకు యింకా సొంతకు జేసి. సెట్టె కుండె మనమానె సుచ్చరాక టారికిరి రొవ్వరొ దిగిసి.

4 సెయ్యె తంకెసంగరె తొమె కూడా జేకిరి ద్రాక్సతోటరె పైటి కొరొండి. తొముకు కూడ సమానంగా కూలి దూంచి బులి కొయిసి.

5 తంకె సడకు అంగీకరించికిరి జేసె. సెయ్యె పన్నెండు గంటలయిలాబెల్లె, ఈనె తినిగంటలయిలబెల్లె కూడా జేకిరి యింకా సాకిరాక డక్కిసి.

6 సెయ్యె ఇంచుమించు పాట గంటలయిలాబెల్లె జేకిరి యింకా కుండె మనమానె సెట్టె టారికిరి తవ్వరొ గమనించిసి. సెయ్యె తంకెసంగరె తొమె దినొల్లా కిచ్చినాకొరుకుంటా కిరుకు ఎట్టె టారిసా? బులి పొచ్చిరిసి.

7 అముకు పైటికొరితె కేసే డక్కిలానింతె బులి తంకె సమాదానం కొయిసె. సెల్లె సెయ్యె తంకదీకిరి తొమె కూడా మో ద్రాక్సతోటరె పైటి కొరొండి బులి కొయిసి.

8 సొంజెలాబెల్లె సే ద్రాక్సతోటరొ యజమాని తా అదికారి సంగరె పైటిలింకల్లకు డక్కికిరి చివరకు దీకిరి అయిలలింకె సంగరె మొదలుకొరికిరి కూలి దీపో బులి కొయిసి.

9 పంచ గంటయిలబెల్లె పైటి మొదలు లొగిల పైటిలింకె అయిసె. తంకు గుటె వెండినానెం దీసి.

10 అగరె పైటి మొదలు లొగిలలింకె అయికిరి తంకు బడేకూలి ఆసి బులికిరి ఆసపొడిసె. ఈనె తంకు కూడా గుటె వెండినానెం మిలిసి.

11 తంకె కూలి కడిగీకిరి అదికారి ఉంపరె సొనిగ్గిల్లెసె,

12 కొరకు బరించికిరి దినల్లా పైటికొరిల అముకు, గుటె గంట పైటి కొరిలాలింకు సమానంగా కిరుకు దిగిలీసు?

13 ఈనె సెయ్యె జొనె కూలిపైటిమనమ సంగరె, స్నేహితుడా సును తొత్తె కిచ్చి అన్యాయం కొరిలాని. గుటె దినొకు గుటె వెండినానెం కు పైటి కొరుంచొ బులి తువ్వ ఒప్పిగిచ్చునీనా.

14 తో కూలి కడిగీకిరి బాజా! మో ఇన్ఱం తొత్తెదిల్లా కూలి అంకా పొచ్చాడె అయిలాలింకు కూడా దిమ్మాబులిగించి.

15 మో పలియ మో ఇన్ఱంమైలవనికిరి కర్చుకొరిలా అదికారం మెత్తె నీనా? మియి బొల్ల యివురో తువ్వు వోదర్చినారిలిసునా? బులి కొయిసి.

16 “యారక పొచ్చాడె రొల్లాలింకె అగురుకు ఆసె; అగరె రొల్లాలింకె పొచ్చాడుకు జోసే” బులి కొయిసి.

యేసు తా మొర్నోకోసం తింటోసారి కొయివురో

(మార్కు 10:32-34; లూకా 18:31-34)

17 యేసు యెరూసలేముకు జెమ్మాసి బులిగిల్లాబెల్లె పన్నెండు మంది సిస్యనెకు పక్కరకు డక్కికిరి యాకిరి కొయిసి.

18 అం సొబ్బిలింకె యెరూసలేముకు జెల్లింఱొ. నెట్టె మనమరొ పో ప్రదానయాజకూనెకు, దర్హసాస్త్ర పండితునెకు అప్పగింపబొడువొ. తంకె తాకు మొర్నొసిక్స పొక్కిరి,

19 తాకు యూదునెనీలాలింకు అప్పగించుసె ఇంకా హేలన కొరికిరి, కొరడా మడ్డోనె మరికిరి సిలువకు పొగుసె. ఈనె తింటొదిన్తె సెయ్యె సజీవంగా ఉటికిరి ఆసి.

గుటె మారొ విన్సపం

(మార్కు 10:35-45)

20 సే తరవాత జెబెదయి నైపో తా దీలింకె పోనె మిసికిరి యేసు పక్కు అయికిరి తా అగరె ముడుకూనె పొక్కిరి గుటె కొతా దేబులికిరి కోరిసి.

21 యేసు, “తొత్తె కిర కావాలి?” బులి ఎంట్టాక పొచ్చురిసి. సెయ్యె, తో రాజ్యంరె, మో దీలింకె పోనుకు జోనుకు తో బత్తోకైలా అత్తో పొక్కరె యింకజోనుకు తో బాఅత్తో ఆడుకు తల్లాపనికిరి కొతా దే బులి మగిసి.

22 సడకు యేసు, “తొమె కిడ పొచ్చురిలీసా తొముకు తెలిసిని. మో గిన్నెరె పురువురో కస్తానె పూరికిరి మియ్యి పీతందుకు సిద్దంగా అచ్చి.

తోమె పీపారోనా?” బులి పొచ్చిరిసి. పీపారో బులి తంకె సమాదానం కొయిసి.

23 నెయ్యె తోమె గిన్నెరొట పీపారో ఈనె మో బత్తోకైల అత్తో ఆడుకు, బా అత్తో ఆడుకు బోసరదివురో మో వనమురెనియ్యి. మో బో కా కోసం సిద్ధపరిచివోయె తాకాక నడ మిలివో బులి కొయిసి.

24 మిగిల్లా దొస్థలింకె సిస్యనె ఎడ నునికిరి నెటెరొల్ల దీలింకె బయినె ఉంపరె రగ్గొపొడిసె.

25 యేసు తంకు పక్కు డక్కికిరి, “యూదునెనీలాలింకె రొజానె పనికిరి తంకె మనమ ఉంపరె అదికారం చెలాయించుకుంటా తాసె బులి తొముకు తెలుస్సు.

26 ఈనె తోమె సాకిరి తన్నాసి. తొబిత్తరె గొప్పమనమా ఈమాసిబులిగిల్లాట తొముకు సేవకుడుగా తమ్మంచి.

27 తొబిత్తరె ముక్కుడుగా తమ్మాసిబులిగిల్లామనమ దాసుడుగా తమ్మంచి.

28 సాకిరాక మనమరొ ‘పో’ సేవ కొరిపించిగిత్తె అయిలాని గాని, సేవకొరితె అయిసి. సొబ్బిలింకు యిడిపించితె కోసం తా పొర్నొకు గుటె వెలగా చెల్లించితె అయిసి” బులిసి.

యేసు అంకిసె నీలా దీలింకు బొలికొరువురో
(మార్కు 10:46-52; లూకా 18:35-43)

29 యేసు, తా సిస్యనె యెరికో పట్నం తీకిరి బయలుదేరికిరి జేతల్లాబెల్లె బడే మంది మనమానె తా పొచ్చాడెజేసే.

30 బట్టో పొక్కరె బొసిరిలా దీలింకె గుడ్డిలింకె యేసు సే బట్టరె అయిలీసే బులి సునికిరి, “దావీదు పో ప్రబూ అముకు కరునించు” బులి గట్టిగా కేకానె పొగిసె.

31 మనమానె తంకు సూతురోండి బులికిరి కొయిసె. ఈనె సే గుడ్డిలింకె యింకా గట్టిగా, “ప్రబూ! దావీదు పో! అమంపరె దయ దిగిపించు!” బులి బొట్ట కేకానె పొగిసె.

32 యేసు టారికిరి సే గుడ్డిలింకు డక్కికిరి, “మీ తొముకు కిర కొరిమాసిబుల్లీసో?” బులి పొచ్చిరిసి.

33 ప్రబూ! అముకు అంకినె దిగదిమ్మంచి! బులి తంకె సమాదానం కొయినె.

34 యేసు తంకె ఉంపరె దయ కలిగికిరి తంకె అంకినె సూగిచ్చి ఎంట్లాక తంకు అంకినె దిగదీసె ఈనె తంకె తాకు వెంబడించినె.

21

యెరూసలేముకు విజయోత్సవం సంగరె జెవురో

(మార్కు 11:1-11; లూకా 19:28-40; యోహాను 12:12-19)

1 యేసు, తా సిస్యనె యెరూసలేముకు జేకిరి ఒలీవ బొనొ పక్కరె బేత్సగే బుల్లా గాకు చేరిగిచ్చె. యేసు తా సిస్యనె బిత్తరె దీలింకు సే గాకు పొడిదికుంటా తంకు యాకిరి కొయినె,

2 గాబిత్తురుకు జాండి నెట్టె దోరె బందిలా గుటె గొడ్డొ, నడ పిల్లకు దిగివొ. సడానుకు పిటికిరి మో పక్కు వొడిగీకిరి అయిండి.

3 కేసన్నా పొచ్చిరినే, అడ ప్రబువుకు కావాలిబులి కోండి; నడ అవసరం తీరిలా ఎంట్లాక బుల్లికిరి పొడదూ బులి కోండి.

4 ప్రవక్త కొయిలా కొతా సొత్తెయితె యాకిరి జరిగినె,

5 దిగూ “తో రొజా దీనుడైకిరి గొడ్డొ,

గొడ్డొపిల్ల ఉటికిరి అయిలీసె”

బులి సీయోను జో దీకిరి కోండి.

6 నెల్లె సిస్యనె జేకిరి యేసు ఆజ్ఞాపించిలాపనికిరి కొరిసె.

7 గొడ్డొకు, గొడ్డొపిల్లకు కొడిగి అయికిరి నడ ఉంపరె తంకె కొన్నానె యించినె యేసు నడంపరె ఉటికిరి బొసిరిసె.

8 నెటెతల్లా తంకెదీకిరి బడేమంది తంకె కొన్నానుకు, గొచ్చొనొ కొమ్మానె బట్టొరె యించినె.

9 తాకు అగరె, పొచ్చాడె నలిలా మనమానె యాకిరి కేకానె పొగినె. దావీదు పోకు మహిమ! ప్రబువు నారె అయిలాటకు సర్వోన్నతమైలా చోటానె జయం బులి పురువుకు స్తుతించినె.

10 యేసు యెరూసలేమునకు జేసి. సే గాఅల్లా ఆందోలన చెలరేగినె, “ఎయ్యె కేసె?” బులి మనమానె పొచ్చురిసె.

11 “ఎయ్యో యేసు, గలిలయరె తల్లా నజరేతు గాకు చెందిలా ప్రవక్త” బులి తా పొచ్చాడె తల్లాలింకె సమాదానం కొయిసె.

యేసు మందిరంబిత్తురుకు జెవురొ

(మార్కు 11:15-19; లూకా 19:45-48; యోహాను 2:13-22)

12 యేసు మందిరంబిత్తురుకు జేకిరి, సెట్టె బిక్కిగిల్లాలింకు, గినిగిల్లాలింకు దోరకు పొడిదీపిసి. పలియ మార్చిలాలింకు బల్లానుకు, పావురాలు బిక్కిలాలింకురొ పిటముకు పొక్కదీసి.

13 సెయ్యో తంకు, యెడ “ ‘మో మందిరం సొబ్బిలింకూ ప్రార్థనాలయం’ గా తాసి బులిసి. ఈనె తొమె సడకు దోచిగిల్లా సారొనె గొరొపనికిరి మార్చిపీసా” బులి కొయిసి.

14 అంకినె నిలాలింకె, కుంటిలింకె మందిరంరె తల్లా తా పక్కరకు అయిసె. సెయ్యో తంకు బొలికొరిసి.

15 ప్రదానయాజకూనె, సాస్తీనె సెయ్యో కొరిలా అద్భుతానె దిగిసె. మందిరం అగరె తల్లా పిల్లానె, “దావీదు పోకు జయం” బులి కేకానె పొగివురొ నునిసె. తంకు రగ్గొ అయిసి.

16 “సన్ని పిల్లానె కిరబుల్లీసెవొ తువ్వు సునుసునా?” బులి తంకె యేసుకు ప్రస్నానె పొగిసె. సడకు యేసు, “సునించి, సన్నిపిల్లానె, పసిపిల్లానె కూడా తొత్తె స్తుతించిలాపని కొరు! బులి లేకనాలె రాసికిరి అచ్చి. ఎడ తొమె కెబ్బే చదివిలానింతోనా?” బులి కొయిసి.

17 సెయ్యో తంకు సడదీకిరి, పట్నం బయలె రొల్లా బేతనియ గాకు జేకిరి సే రత్తిల్లా సెట్టె గడిపిసి.

యేసు అంజూరొ గొచ్చొకు సపించివురొ

(మార్కు 11:12-14,20-24)

18 సొక్కలెపైలా తరవాతరె సెయ్యో బుల్లికిరి పట్నం బిత్తరకు అయితన్నుగా తాకు బొక్కిసి.

19 యేసు బట్టొ పక్కరె తల్లా గుటె అంజూరొ గొచ్చొకు దిక్కిరి సడ పక్కుజేసి. ఈనె తాకు ఆకూనె తప్ప యింకా కిచ్చి మిల్లానీ. సెయ్యో సే

గొచ్చి సంగరె, యింకా కెబ్బుకు పొగలానె దిన్నారు బులిసి. ఎంట్రాక సే అంజూరో గొచ్చి సుక్కిజేసి.

20 సిస్యనె నడ దిక్కిరి బడే ఆచ్చర్యపొడిసె, “అంజూరో గొచ్చి ఎత్తెబేగ క్యాకిరి సుక్కిజేసి?” బులి పొచ్చిరిసి.

21 యేసు, “ఎడ సొత్తాక తొమె అనుమానం నాపొడుకుంటా విస్వసించినె మియి అంజూరో గొచ్చికు కొరిలాపని తొమ్మంకా కొరిపారొ. సెత్తె మాత్రమాక నీ, ఏ బొనుకు, తువ్వు ఉటికిరి సొంద్రొరె పొడుబుల్తే; నడ సాకిరాక ఊసి.

22 పురువు తొమె పొచ్చిరిలాంచ దూసి బులి విస్వాసం సంగరె ప్రార్దన కొరండి. సెల్లె తొమె కిరమగినె నడ మిలుసి” బులి కొయిసి.

యేసు అదికారం గురించి ప్రస్నించివురో
(మార్కు 11:27-33; లూకా 20:1-8)

23 యేసు మందరంరె బోదించితల్లాబెల్లె ప్రదానయాజకూనె, బొడిలింకె అయికిరి, కే అదికారం సంగరె తువ్వు ఏ పైటినె కొరిలీసు? తొత్తె అదికారం కేసె దీసె? బులి పొచ్చిరిసి.

24 యేసు సమాదానం కొయికిరి, “మియ్యి తొముకు గుటె ప్రన్న పొచ్చరుంచి. తొమె కొయినె మియి ఎడ కే అదికారం సంగరె కొరిలింఛొ కోంచి.

25 బాప్టీసం దిల్లా యోహానుకు కేసె పొడదీసే? పురువునా? మనమానె నా?”బులి పొచ్చిరిసి.

తంకె, “పురువు” బులి కొయినె తాకు కిరుకు నమ్మిలానింతో? బులి పొచ్చిరివొ.

26 మనమానె బులి కొయినె మనమనల్లా యోహాను జొనె ప్రవక్త బులి నమ్మినె. ఈనె తంకె కిర కొరుసెవొ బులి డొరొసంగరె జొనుకు జొనె కొతలగ్గిచ్చె.

27 నడకు తంకె, “అముకు తెలిసిసీ” బులి కొయినె. ఈనె, తొముకు మియి కే అదికారం సంగరె కొరిలింఛివొ కొయిసీ బులిసి.

దీలింకె పొనెరో ఉపమానం

28 ఉంచినె ఆలోచించికిరి కోండి. జొనుకు దీలింకె పోనె రొయితవ్వె. సెయ్యె బొడు పో పక్కరకు అయికిరి, పో! ఆజి జేకిరి ద్రాక్సతోటరె పైటి కొరుబులి కొయిసి.

29 సెయ్యె, మెత్తె ఇష్టంనీబులి కొయిసి. ఈనె ఎంట్రాక మనుసు మార్చిగీకిరి జేసి.

30 సెల్లె బో తా దీటో పో పక్కరకు అయికిరి సే వినయం కొయిసి. సే పో జెమ్మి బులి కొయికిరి జెల్లాని.

31 సే దిలింకె బిత్తరె కేసె బో కొత సునుసే? బులి యేసు పొచ్చిరిసి. తంకె బొడు పో బులిసె.

యేసు తంకె సంగరె యాకిరి కొయిసి.

మియి తొముకు సొత్తె కొయిలించి. సుంకరీనె, దర్సినె తొం కన్నా అగరె పురువురో రాజ్యంకు జోసే.

32 యోహాను నీతిరో బట్టో దిగదీతె అయిసి. తొమె తాకు నమ్మిలానింతో. ఈనె సుంకరీనె, దర్సినె తాకు నమ్మిసె. సడకు దిక్కిరంకా తొమె మనుసుమారిలానీ, విస్వసించిలానింతో.

ద్రాక్స తోట పైటిలింకెరో ఉపమానం

(మార్కు 12:1-12; లూకా 20:9-19)

33 యింగుటె ఉపమానం సునొండి. జొనె యాజమాని రొయితవ్వె. సెయ్యె గుటె ద్రాక్సతోట నాటికిరి చుట్టూ గోడ బందిపించికిరి ద్రాక్సరసం కడితె గానుగ తొట్టుకు బందిపించిసి. జొగులో జొగితె గుటె మంచె కొరుపించిసి. తరవాతరె తోట రైతులుకు దీకిరి దూరు ప్రయానంకు బాజేసి.

34 కట్టిలాదినో అయిలాబెల్లె తా సేవకునెకు సే రైతులు పక్కరకు జేకిరి వాటా దరిగి అయిబులి పొడిదీసి.

35 సే రైతులు, సే సేవకుడుకు దరిగీకిరి జొనుకు మరిసె, జొనుకు మొరిదీసె, జొనుకు పొత్తొనె సంగరె మరిసె.

36 ఆసామి యేసారి అగరె కన్నా బడేలింకు సేవకునెకు పొడిదీసి. తంకు కూడా సాకిరాక కొరిసె.

37 సే ఆసామి ఆకరువురె తా పోకు గౌరవించుసెబులి బులిగీకిరి ఆకరువురె తా పోకు తంకె పక్కరకు పొడిదీసి.

38 ఈనె సే రైతులునె తా పోకు దిక్కిరి ఎయ్యె వారసుడు. యాకు మొరదీకిరి తా ఆస్తికు కడిగిమంచి బులిగిచ్చె.

39 సే తరవాతరె పోకు దరిగీకిరి మొరిదీకిరి ద్రాక్షతోట పొచ్చాడె పొదిపీసె.

40 “సే ద్రాక్షతోట యజమానుడు అయికిరి సే రైతులుకు కిర కొరువో?”బులి పొచ్చిరిసి.

41 యజమాని సే దుష్టులుకు కచ్చితంగా మొరిదిపీవో. పచ్చకలొరె తా బాగంకు తాకు దిల్లాలంకు సే ద్రాక్షతోటకు దూంచి బులి కొయిసి.

42 యేసు తంకె దీకిరి యాకిరి కొయిసి గొరొ బందిలంకె తిరస్కరిచిలా పొత్తొ సడకు ముక్కవైల పొత్తొహాసి.

సడ ప్రబూ వల్లరె కలిగిలాట బులి సడ అంకినెకు

ఆచర్యవైలాటబులి తొమె కెబ్బె

లేకనానె కొయిలాపని కెబ్బే చదివిలానింతోనా?

43 సడకు మియ్యి కొయిలాట కిరబుల్నే పురువు తా రాజ్యంకు తొమె పక్కరదీకిరి కడిగికిరి, సే రాజ్యంకు బొట్ట పలం పలించిలాలంకు దూసి.

44 *ఈనె యే పొత్తొ ఉంపరె పొడిలాలంకె ముక్కలు ఈజుసి. కా అంపరె యే పొత్తొ పొడివోయో సెయ్యె నలిగిజివ్వొ.

45 ప్రదానయాజకూనె, పరిసయ్యునె యేసు కొయిలా ఉపమానం సునికిరి సెయ్యె తంకె గురించి కొతలగిలపనికిరి గ్రహించినె.

46 సెల్లె తంకె తాకు బందించితె సమయం కుజ్జిలీసె. ఈనె మనమానె తాకు జొనె ప్రవక్త బులిగిచ్చె గనక మనమానుకు దిక్కిరి డొరిజీసె.

22

బ్యా కద్దినెరొ ఉపమానం

(లూకా 14:15-24)

1 యేసు ఉపమానాలు ఉపయోగించికిరి యాకిరి కొయిసి.

* 21:44 యే వచనం లేకనాల్రె సి

2 పురువురొ రాజ్యంరె జొనె రొజా తా పోరొ బ్యా సందర్భంగా కద్దీనె కొరిలాటకు పోలికిరి అచ్చి.

3 సే రొజా కద్దీనెకు ఆహ్వానించెలాలింకు డక్కితె తా సేవకునె పొడిదీసి. ఈనె తంకె అయితె ఇస్టపొడిలనింతె.

4 సే రొజా కుండిలింకు సేవకునెకు పొడదీకిరి డక్కిలాలింకు కద్దీనె సిద్ధంగా అచ్చి బులి కోండి. ఎద్దునెకు, బొల్లే బలిసిలా పసువునుకు కట్టికిరి సొబ్బి తయారు కొరించొ బులి కొయిసి.

5 ఈనె డక్కిలాలింకె లెక్క కొరిలానింతె. జొనె తా కొలకు, యింకాజొనె వ్యాపారంకొరిగితె బాజీసె.

6 మిగిల్లాలింకె సేవకునెకు దరిగీకిరి అవమానం కొరికిరి మొరిదీసె.

7 సే రొజాకు బడే రగ్గొ అయికిరి తా సైన్యముకు పొడదీకిరి సే హంతకులుకు నాసనం కొరికిరి, తంక పట్నంకు పుడ్డిపేసి.

8 సే తరవాతరె సేవకునె సంగరె, బ్యాకద్దీనె సిద్ధంగా అచ్చి గాని మియి డక్కిలాలింకె అర్దులు నీ.

9 ఈనె సెయినంట జేకిరి తొముకు దిగిదిల్లాలింకల్లాకు బ్యాకద్దీనెకు డక్కిండి బులి తా సేవకునె సంగరె కొయిసి.

10 సే సేవకునె సెయినె మొజుకు జేరికి తంకు దిగిదిల్ల బొల్లలింకు, చెడ్డలింకు, సొబ్బిలింకు డక్కిగీకిరి అయినె. సే గొరొల్లా బ్యా విందుకు అయిలాలింకు సంగరె పూరిజేసి.

11 రొజా చుట్టాలకు దిగితె అయిసి. సెట్ రొల్లాలింకె బిత్తరె జొనె బ్యా కొన్నానె నాపొగ్గికుంటా బొసికిరి తల్లాట సెయ్యె దిగిసి.

12 స్నేహితుడా! బ్యా కొన్నానె నాపిందిగీకుంటా బిత్తరుకు క్యాకిరి అయిసు? బులి రొజా తాకు పొచ్చిరిసి. సే మనమ కిచ్చి నాకొతలక్కుంటా సూతిరికిరచ్చి.

13 ఎంట్రాక సే రొజా తా సేవకుల సంగరె, తా గొడ్డోనె, అత్తోనె బందికిరి మొందారె పొక్కదేండి. సెట్టె సెయ్యె కందికుంటా, దంతోనె కముడుకుంటా బాదకు అనుబవించుసి బులి కొయిసి.

14 “పురువు బడేలింకు ఆహ్వానించిసి. ఈనె బచ్చిగిల్లాలింకె కుండేలింకె మాత్రమాక” బులి కొయిసి.

పన్నునె బందివురో కోసం ప్రస్నించివురో
(మార్కు 12:13-17; లూకా 20:20-26)

15 సీ తరవాతరె పరిసయునె జేకిరి తాకు తా కొతానె తప్పుదరిగిమంచి బులి ఆలోచన సంగరె యేసుకు ప్రస్నించినె.

16 సెల్లె తంకె పరిసయులురో సిస్యనెకూ, హేరోదురో మనమానుకు కుండేలింకు పొడదీకిరి “బోదకుడా తూ సత్యవంతుడు బులి, పురువురో బట్టో తల్లాట తల్లాపనికిరి కొయిలీను బులి అముకు తెలుస్సు. పొదరిలింకె కొతానె లెక్క కొరును బులి మొగమాటం దిగిపించునూబులి అముకు తెలుస్సు.

17 ఈనె రోమా చక్రవర్తికు పన్నునె బందివురో అం నియమం ప్రకారం దర్మంనా? నీనా? తో అబిప్రాయం కో” బులి పొచ్చిరిసి.

18 యేసుకు తంకె ఆలోచన బుజ్జికిరి, వేసం పొగ్గిల్లాలింకె! మెత్తె కిరుకు పరీక్షించిలీసో? బులి కొయిసి.

19 తొమె కే నానెం సంగరె పన్నునె బందిలీసెవొ మెత్తె దిగదేండి బులి కొయిసి. తంకె గుటె కాసు దన్నయికిరి తాకు దీసె.

20 సెయ్యె, ఎడ ఉంపరె రొల్లా “ఏ బొమ్మ, అక్సరాలు కాట?” బులి తంకు పొచ్చిరిసి. తంకె “సడ రోమా చక్రవర్తిరోట” బులి కొయిసి.

21 సెల్లె సెయ్యె వెంట్రాక, “సాకిరియినె చక్రవర్తిరోట చక్రవర్తికు, పురువురోట పురువుకు చెల్లించొండి” బులి తంకసంగరె కొయిసి.

22 యెడ సునికిరి బడే ఆచ్చర్వపొడికిరి తాకు సడిదీకిరి బాజీసె.

మొర్నొదీకిరి జీకిరి అయివురో కోసం ప్రస్న
(మార్కు 12:18-27; లూకా 20:27-40)

23 సీ దినాక, సద్దూకయునె యేసు పక్కు అయికిరి మొరిజిల్లాలింకె జీకిరి అయినంతె బులి వాదించిలాలింకు యాకిరి కొయిసి.

24 “బోదకా! జొనెమొట్ట పిల్లానె నీకిరి మొరిజిన్నే, తా బయి సే వితంతువుకు బ్యా కొరిగీకిరి మొరిజిల్లా అన్నకు సంతానం కలిగించిమాసిబులి మోసే కొయిసినీనా బులి పొచ్చరిసె.

25 అంబిత్తరె ఏడుగురు బయినె గుటె కుటుంబంరె అచ్చె. అగరె రొల్లట బ్యా కొరిగీకిరి పిల్లానె నీకుంటా మొరిజేసి. ఈనె సే వితంతువుకు మొరిజిల్లాటరొ బయి బ్యా కొరిగీసి.

26 సాకిరాక అగరొట, తింటొట, ఏడుగురు కూడా సాకరాక తాకు బ్యా కొరిగీకిరి పిల్లానెనీకుంటా మొరిజేసె.

27 చివరకు సే మొట్ట కూడా మొరిజేసి.

28 ఈనె ఉంచినె సే ఏడుగురు సే మొట్టకు బ్యా కొరిగిచ్చెనీ, ఈనె పునరుత్తానం తరవాతరె సెయ్యె సే ఏడుగురె కాకు నైపోగా తాసి?”

29 యేసు తంకె సంగరె “తొముకు లేకనానె గాని పురువురొ సక్తి గాని నాజనికిరి అపార్థం కొరిగిల్లీసా.

30 పునరుత్తానంరె బ్య కొరిగివురొ గాని, నాకొరివురొ గాని తన్నీ. తంకె పరలోకంరె దేవదూతానెపనికిరి తాసె.

31 ఈనె మొరిజిల్లాలికె జీవురొ కోసం పురువు తొముకు కిర కొయిసివొ తొమె చదివిలానింతోనా? బులి సెయ్యె పొచ్చరిసి.

32 ‘మియ్యి అబ్రాహాముకు పురువు, ఇస్సాకుకు పురువు, యాకోబుకు పురువు’ బులి కొయిసి. మియి మొరిజిల్లాలింకు పురువు నీ, జీలాలింకాక మియి పురువు.”

33 సెల్లె యే బోద సున్దాలింకల్లా ఆచ్చర్యపొడిసె.

గొప్ప ఆజ్ఞ

(మార్కు 12:28-34; లూకా 10:25-28)

34 సెల్లె యేసు సద్దాకయ్యునెరొ తుండొ బుజ్జిపించిసి బులి పరిసయ్యునె సునికిరి పక్కరకు అయినె.

35 తంకె బిత్తరె జొనె దర్మసాస్త్రపండితుడు తాకు పరిక్కించిమాసిబులి ప్రస్నించిసి,

36 బోదకా! దర్మసాస్త్రమురె అజ్ఞానెరె కే అజ్ఞ ముక్కుమైలాట బులి పొచ్చిరిసి.

37 యేసు “తో బొట్ట ప్రాదయం సంగరె, తో బొట్ట అత్మ సంగరె, బొట్ట బుద్ధి సంగరె తో ప్రబువైలా పురువుకు ప్రేమించొండి.

38 ఎడ సొబ్బి అజ్ఞలకన్నా ఏ అజ్ఞ గొప్పిట ముక్కుమైలాట.

39 దీబొ అజ్ఞ కూడా సాటకా, ‘తోపనాక తో పొరుగుతాకంకా ప్రేమించెమంచె.’

40 మోసే దర్మసాస్త్రంరె ఈనె ప్రవక్తానెరొ బోదానల్లా యే దీట అజ్ఞనె ఉంపరె ఆదారపొడికిరి అచ్చి.”

క్రీస్తు కోసం ప్రస్తు

(మార్కు 12:35-37; లూకా 20:41-44)

41 యింగుటె సారి పరిసయ్యునె కూడిగీకిరి, యేసు పక్కు అయిలాబెల్లె తంకు యాకిరి పొచ్చిరిసి,

42 “తోమె క్రీస్తు గురించి కిర బులిగిల్లీసా? సెయ్యె కా పో?” బులి పొచ్చిరిసి. “దావీదు పో” బులి కొయిసి.

43 యేసు తంకె దీకిరి ఈనె దావీదు పురువు అత్మసంగరె కొతలక్కిరి ప్రబూ బులి కిరుకు డక్కిసి?

44 ప్రబువు, *మోప్రబువు సంగరె తో సత్తువునె తో గొడ్డో అగరె పొయిదిల్లాజాంక,

మో కైయిలత్తో ఆడుకు

బొసురొసి బులి కొయిలానీనా.

45 ఈనె దావీదు తాకు ప్రబూ బులి డక్కితల్లాబెల్లె సెయ్యె తాకు క్యాకిరి పో ఊసి? బులి తంకు పొచ్చిరిసి.

46 కేసె కిచ్చి కొయినారిసె. సే దినోదీకిరి తాకు కే ప్రస్నానె పొచ్చిరితందుకు కాకు దైర్యం చాల్లానీ.

* 22:44 క్రీస్తు గురించి కొయివురొ

23

పరిసయులుకు, సాస్తీనెకు యేసు గద్దించివురో

(మార్కు 12:38,39; లూకా 11:43-46)

¹ సే తరవాతరె యేసు మనమానె గుంపుసంగరె, సిస్యనె సంగరె యాకిరి బులిసి,

² సాస్తలూనె, పరిసయునె మోసే దర్మసాస్తంకు తంకాక బోదించితె అదికారం అచ్చిబులి కొతలగ్గిలీసె.

³ సడకు తంకె తొముకు కొయిలాటల్లా సునికిరి విదేయత సంగరె కొరొండి. ఈనె తంకె బోదించిలాట తంకె ఆచరించినింతె గనక తంకె కొరిలంచ కొరితెనాండి.

⁴ నాబొయినాల్లా గొబిరీనె తంకె మనమానెరో కందొనె ఉంపరె లొగునె, ఈనె తంకె సే గొబిరికు సిటికినంగిలిసంగరంకా సాయం కొర్పింతె.

⁵ తంకె మనమానె దిగిలాపనికిరి పైటినె కొరుతోసె పురువురో బొట్ట వాక్యమునె రాసిగీకిరి ముండొకు అత్తోనుకు రక్కరేకునె బందిగుచ్చె, బొట్ట అంచు యీల కొన్నానె పిందిగివ్వె.

⁶ కద్దీనె, సబాస్తలాలె ముక్యమైలా చోటునె బొసివురోబుల్నే తంకు బడే ఇన్టం.

⁷ సొంతసెయీనై, మనమానె తంకు ఉలంగదిమ్మంచిబులి, ఈనె గురువు బులి డక్కిపించిగివురో తంకు ఇన్టం.

⁸ తొమె మాత్రం గురువు బులి డక్కిపించిగితెనాండి. తొమల్లా అన్న బయినె గనక “తొ సొబ్బిలింకు బోదకుడు జొన్నాక.”

⁹ ఈనె యే బూమంపరె కాకు తొమె “బో” బులి డక్కితెనాండి. పరలోకంరె తల్లా పురువు జొన్నాక తొ బో.

¹⁰ సాకిరాక తొమె నాయకుడు బులి డక్కిపించిగితెనాండి. క్రీస్తు జొన్నాక నాయకుడు.

¹¹ తొబిత్రరె గొప్పిట తొముకు సేవకుడుపని తమ్మంచి.

¹² తాకు సెయ్యె గొప్ప కొయిగిల్లాలింకు పురువు తగ్గించిపివో. తగ్గించిగీకిరి తల్లాలింకు పురువు గొప్ప కొరుసి.

వేసదారులుకు యేసు గద్దించివురో
(మార్కు 12:38-40; లూకా 20:47)

13 వేసదారులైలా సాస్త్రులూనె, పరిసయ్యునె తొముకు బడేస్త్రమ.
పురువురో రాజ్యంకు మనమానె నాజనికుంటా బట్టో బుజ్జిపిలీసా.
తొమె జెన్నింతో, జమ్మా బులిగిల్లాలింకు జేపించిలీనింతో.

14 రండిలింకు తొముకుఅనుకూలంగా లోపర్చిగీకిరి తంకరో
గొరోనుకు దోచిగిల్లీసా, దీర్గ ప్రార్థనలు కొరికిరి మనమానుకు
మెప్పించిమాసిబులిగిల్లీసా గనక తొమంపరకు గొప్ప సిక్కు ఆసి.
*

15 వేసదారులైలా సాస్త్రీనే, పరిసయ్యునే, తొముకు సిక్కు తప్పినీ.
జొనెమోపుకు తొబిత్తరె మిసిగితై దెసానల్లా బుల్లికిరి తొప్రయత్నం
కొరిలీసా. తీరా సెయ్యె మిసిలాబెల్లె తొపనాక తాకంకా దీటొంతు
నరకముకు పాత్తుడుగా కొరిలీసా.

16 అంకినె నీకుంటా పొదర్లింకు బట్టోదిగదిమ్మంచిబులిగిల్లాలింకే,
తొముకు సిక్కు తప్పినీ. కేసైనా మందిరం ఉంపరె ఒట్టు లొగినె నస్తానీ,
గుడిబిత్తరె సున్నంపరె ఒట్టు లొగినె సే ఒట్టుకు కట్టుబొడికిరి తమ్మంచి
బులి తొమె కొయివో.

17 తెలివి నీలా గుడ్డిలింకె, కిర గొప్పా? సున్ననా సున్నకు పవిత్రం
కొరిలా గుడినా?

18 ఈనె బలిపీటం వుంపరె ఒట్టు లొగినె, నస్తానీ గని, సడంపరె
తల్లా కానుకంపరె ఒట్టు లొగినె సే ఒట్టుకు కట్టుబొడికిరి తమ్మంచి.
బులి తొమె బోదించిలీసా.

19 గుడ్డిలింకె, కిర గొప్ప? కానుకనా? సే కానుకకు పవిత్రం కొరిలా
బలిపీటంనా?

20 సడకు బలిపీటంమంపరె ఒట్టు లొగినె, సడంపరె తల్లా
సొబ్బిటంపరె ఒట్టు లొగిలాపనాకనీనా.

21 సాకిరాక మందిరం ఉంపరె ఒట్టు లొగినె, సడ ఉంపరె,
తాండ్రెతల్లా పురువుంపరె ఒట్టు లొగిలాపనాకనీనా!

* 23:14 ఏ వాక్యం మూల గ్రంథాలరె రాసికిరి నీ

22 సాకిరాక పరలోకమంపరె ఒట్టు లొగినె సెట్టె తల్లా సింహాసనమంపరె, నే సింహాసనమంపరె బొసికిరితల్లా పురువుంపరె ఒట్టు లొగిలాపనాకనీనా!

23 వేసదారులైలా సాస్త్రులూనె, పరిసయ్యునే, తొమె మోసం కొరిలాలింకె. తొముకు సిక్స తప్పినీ. తొమె పుదీనా, సోపు, జిలకర్ర సొబ్బిటిరె దసమబాగం దూసా. ఈనె దర్మసాస్త్రంరె తల్లా ముక్కమైలాంచ కిరబుల్నే న్యాయం, దయ, నమ్మకత్వం, యెడానె సొబ్బి నడదీసె. అగరె నడకు నాసడుకుంటా తొమె యెడకు కొరుమాసి.

24 అంకీనె నీకుంటా బట్టొదిగదిమ్మంచి బులిగిల్లాలింకె, దర్మసాస్త్రంరె అవసరం నీలా సన్నించకంకా తొముకు తొమ్మాక అనుసరించిలీసా, ఈనె అత్యవసరమైలాంచకు నాతెలిసిగీకుంటాక నడదిల్లీసా.

25 సాస్త్రులూనె, పరిసయ్యునే, తొమె మోసం కొరిలాలింకె. తొముకు సిక్స తప్పినీ. తొమె ముంతకు, పల్లెముకు దోరె బొలుకొరుసా, ఈనె బిత్తరె అత్యాస, స్వార్థము సంగరె అచ్చొ.

26 గుడ్డి పరిసయ్యునే, అగరె తొమె ముంతానెకు, పల్లెంకు బిత్తరె సుబ్రం కొరొండి. సెల్లె బయెల్రెంకా సుబ్రంగా తాసి.

27 సాస్త్రీనే, పరిసయ్యునే తొమె మోసం కొరిలాలింకె. తొముకు సిక్స తప్పినీ. తొమె సున్నొమరిలా సమాదులుపనాలింకె. నడ బయలుకు అందంగా దిగదూసి. ఈనె బిత్తరె మొరిజిల్లాలింకెరొ పియ్యెజిల్లా అడ్డోనె పనికిరి కల్మసం దీకిరి తాసె.

28 సాకిరాక తొమె బయలుకు నీతిమంతునెవని దిగదూసా. ఈనె బిత్తరె వేసదారన, పాపం సంగరె పూరికిరచ్చొ.

యేసు తంకు సిక్స గురించి అగుంతాక కొయివురొ

(లూకా 11:47-51)

29 వేసదారులైలా సాస్త్రీనే, పరిసయ్యునె తొముకు స్రమ. తొమె ప్రవక్తానె సమాదులు బందికుంటా, నీతిమంతునెరొ సమాదీనెకు అలంకరించిలీసా.

30 సెత్తాకనీకిరి, అమె తాత ముత్తాతనె కలొరె జీకిరి రొన్నే, తంకె దీకిరి మిసికిరి ప్రవక్తానెకు మొరదీకుంటా రొయితమ్మోనీనా.

31 ఈనె సొత్తాక తొమె ప్రవక్తానెకు మొరదిల్లా వంసముకు చెందిలాళికె బులి అంగీకరించికిరి తొముకు తొమ్మాక సాక్సం కొయిగిల్లీసా.

32 తొ తాత ముత్తాతలు మొదలు కొరిసె. తొమె ముగించొడి.

33 తొమె సప్పొ సంతానం పనికిరితల్లా ప్రమాదకరమైలా ద్రోహీనే, నరక సిక్స తీకిరి క్యాకిరి తప్పించిగిమాసిబులిగిల్లీసా?

34 తొమె పక్కు ప్రవక్తానెకు, తెలివిలింకెకు, దర్మసాస్త్ర బోదకునెకు పొడదిల్లించి. తంకబిత్తరె కుండెలింకు సిలువ పొగివొ. ఇంకుండెలింకు సబాస్థలం సొబ్బిలింకగరె కొరడా మడ్డోనె మరిపించువొ. కుండెలింకు గానె తీకిరి పొల్లిల్లాపనికిరి గొడ్డిమరుసా.

35 నీతిమంతుడైలా హేబెలు రొగొతో దీకిరి గుడికు బలిపీటముకు మొజిరె తొమె మొరిదిల్లా బరకీయ పో ఈలా జెకర్యా రొగొతో జాంక యే బూమంపరె నీతిమంతుడు వొల్లికించిలా రొగొతోకల్లా తొమ్మాక బాద్యులు.

36 యెడ సొత్తాక. యేతప్పల్లా యేతరంలింకంపరాక పొడుసి బులి కొయిలించి.

యేసు యెరూసలేముకు ప్రేమించువురో

(లూకా 13:34,35)

37 ఓ యెరూసలేము, యెరూసలేము తువ్వు ప్రవక్తానెకు మొరదీసు పురువు తోపక్కరకు పొడదిల్లాళింకు తూ పొత్తొనె సంగరె మరిసు. కూడ తా పిల్లానుకు తా రెక్కానె తొల్లె నుచ్చిలాపని మియ్యి తొ పిల్లానుకు నుచ్చిమా బులి కెత్తో సారులు ఆసించించి. ఈనె తువ్వు అంగీకరించిలాను.

38 ఇదిగొ దిగూ, పాడియిజిల్లా తో మందిరముకు పురువు కాలీగా తొముకు సడదీసి.

39 ఉంచినె తీకిరి “ప్రబువు నారె అయిలాట స్తుతించబొడుమాసి” బులి తొమె కొయిలా జాంక మెత్తె దిగినింతోబులి తొముకు కొయిలించి.

24

యేసు మందిరం పొడిజెవురొ గురించి కొయివురొ
(మార్కు 13:1,2; లూకా 21:5,6)

¹ యేసు మందిరంకి సడికిరి జేతల్లాబెల్లె తా సిస్యనె అయికిరి సే మందిరంకి బందిలాట గురించి తాకు దిగదీసె.

² సడకు యేసు, తొమె ఎడల్లా దిగిలీసానీ, ఎడ సొత్తాక. పొత్తొ ఉంపరె పొత్తొ నాతారుకుంటా తంకె సొబ్బీ పొడుజూసి బులీసి.

స్రమానె, హింసలు
(మార్కు 13:3-13; లూకా 21:7-19)

³ ఈనె యేసు ఒలీవపొరొత్తొ ఉంపరె బొసిరిసి. తా సిస్యనె తా పక్కరకు అయికిరి, “కోండి; ఎడ కెబ్బె కెబ్బుకు జరుగుసి? తూ అయిలా అగరె, యే యుగం అంతమైతె అగరె కిర ఆనవాలు దిగదూసి?” బులి పొచ్చురినె.

⁴ యేసు యాకిరి కొయిసి. తొముకు కేసే మోసం నాకొరికుంటా జాగర్తగా టారింది.

⁵ కిరుకు బుల్నే బడేమంది మో నారె అయికిరి మియ్యి క్రీస్తు బులి కొయికిరి బడేలింకు మోసం కొరివె.

⁶ యుద్ధాలు గురించి, యుద్ధాలు లగివురొ గురించి నుల్లాబెల్లె తొమె దిగులు పొడితెనాండి. ఎడ కచ్చితంగ వూసి. ఈనె అంతం ఉంచినాక అయిసి.

⁷ దెసా ఉంపరకు దెసా లగానెకు ఆసి. రాజ్యం ఉంపరకు రాజ్యం లగానెకు ఆసి. పల్లెగానె కరువునె, బూకంపాలు ఆసి.

⁸ ఈనె పిల్లానె జొర్నెలా బెల్లె అయిలా బొత్తానె పని తాసి.

⁹ సే తరవాతరె తంకె తొముకు అదికారింకు అప్పగించునె. సే అదికారిం తొముకు హింసలొక్కిరి మొరదూసె. మో నా కారనంగా దెసొనల్లా తొముకు ద్వేసింతునె.

¹⁰ సే సమయంరె బడేమంది యే విస్వాసం దీకిరి తొలుగుజునె. జొనుకు జొనె త్రునీకరించిగీకిరి, ద్వేసించిగివ్వె.

¹¹ సొరొప్రవక్తానె బడే మంది అయికిరి మనమానుకు మోసం కొరివె.

12 అదర్భము ఎక్కువైపురో వల్లరె బడేలింకెరో ప్రేమనీకుంటా యీజోనీ.

13 ఈనె విస్వాసంరె ఉంచినెతీకిరి అంతము జాంక సహించిగిల్లాటాకాక రక్తన మిలివో.

14 పరలోక రాజ్యో సువార్త మనమానుకల్లా సాక్సీగా దెసోనుకల్లా ప్రకటించబోడునీ. సెత్తెలె అంతం అయివో.

బయంకరమైలా హేయ వస్తువు

(మార్కు 13:14-23; లూకా 21:20-24)

15 ఈనె ప్రవక్త ఈలా దానియేలు సంగరె కొయిలాట బయంకరమైలా హేయవస్తువు పరిసుద్ధస్తలమురె టారిపురో తొమె దిగిలాబెల్లె చదివిలాట గ్రహించిమానీ.

16 సెల్లె యూదయ ప్రాంతంరె తల్లా మనమానె పొరొతంపరకు పొలిజిపురో బొల్ల.

17 మిద్దంపరె తల్లాట తా గొరొ బిత్తురుకు జేకిరి కిచ్చీ కడిగిన్నానీ.

18 బిల్లొరె తల్లాట తా కొన్నానుకు కడిగితై పొచ్చుకు జెన్నానీ.

19 అయ్యో, సే దినొరె పనిదీగిల్లాలింకె, పురటాలు మొట్టానుకు బడే బాధ కలుగుసినీ.

20 సే దినొరె బడే కొస్టొతానీ. ఈనె సిత్తోకలొరె గాని, ఈనె విస్త్రాంతి దినెరె గాని పొలిజివ్వలిసిలా గతయినాసే బులి ప్రార్దనకొరొండి.

21 స్రుస్తి ఆరంబం తీకిరి ఆజి జాంక సెత్తో కొస్టొనె కెబ్బే అయిలాని. యింకెబ్బుకూ యాని.

22 పురువు సే దినొ లెక్క. తక్కువ నాకొరినే, కేసే జీకిరి తయితెని. ఈనె పురువు సెయ్యె బచ్చిగిల్లాలింకె కోసం సే దినొ లెక్క తగ్గించునీ.

23 సే దినొరె తొంబిత్తరె కేసన్నా, ఇదిగొ దిగొండి క్రీస్తు ఎట్టె అచ్చి బులి గాని, నీనే, నెట్టె అచ్చి బులి గాని బుల్నే నమ్మితెనాండి.

24 కిరుకు బుల్నే సొరొ క్రీస్తునె, సొరొప్రవక్తానె అయికిరి క్రీస్తుబులికిరి, ప్రవక్తానెబులికిరి కొయికుంటా పురువు బచ్చిగిల్లా మనమానుకంకా మోసం కొరితె, బడే మహత్కార్యాలు, అద్భుతానె కొరికిరి దిగదూసె.

25 సునొండి సే కలొ నాఅయిలా అగరాక తొముకు కొయిలించి.

26 ఈనె తొమె సంగరె కేసన్నా అదిగొ సెయ్యె కేసేనీలా చోటురె అచ్చి బులి కొయినె సెట్టికు జేతేనాండి. ఈనె, ఎట్టె గదిరె అచ్చి బుల్నే నమ్మితేనాండి.

27 తూర్పురె జొర్నేకిరి పడమర దాకా మెగోరె మెరిసిలా మెరుపుపనికిరాక మనమరో పో ఆసి.

28 మొడ కేటె తన్నే రాబందునె సెట్టె పోగైవె.

మనమరో పో అయివురో

(మార్కు 13:24-27; లూకా 21:25-28)

29 సే కొస్టాకలో గడిచిల ఎంట్లాక సూర్యుడు వొందారో ఈజుసి. చంద్రుడు వెలుగు దిన్నీ. నక్సత్రాలు మెగొనెదీకిరి జొడిజివ్వె. మెగొన్రో సక్తులు కదిలిజివ్వె.

30 సెల్లె మనమరో పో అయిలీసి బులి సూచన మెగొరె దిగదూసి. బూమంపరె దెసొనల్లా దుక్కొపొడివె. మనమరో పో మహా మహిమసక్తి సంగరె, బడే తేజస్సు సంగరె మెగొనై అయివురో తంకె దిగుసె.

31 సెల్లె పురువు తా దూతానెకు గొప్ప బూర పుంకుకుంటా పొడదూసి. సే దూతలు బూమంపరె చారదిక్కుతీకిరి బుల్నే, సే చివర దీకిరి యేచివరదాకా బుల్లికిరి పురువు బచ్చిగిల్లాలింకు పోగుకొరివె.

అంజూరో గొచ్చొ గురించి పటో

(మార్కు 13:28-31; లూకా 21:29-33)

32 ఈనె ఉంచినె అంజూరో గొచ్చొరో పటో సుగ్గిండి. నడ కొమ్మానె కోల్లెలా ఆకూనె అయిలసంగరాక, కొర కలో అయిలి బులి తొముకు తెలుసుగుసి.

33 సాకిరాక మియ్యి కొయిలాటల్లా దిగిలా వెంట్లాక సే* కలో తలుపు వక్కురె అచ్చి బులి తొమె తెలిసిగివ్వొ.

34 యెడ సొత్తాక. ఎడల్లా జరిగిలా జాంక యే తరంలింకె మొరిజిన్నింతె బులి కచ్చితంగా కొయిలించి.

35 బూమి, మెగొ నసించిజివ్వొ ఈనె మో కొత కెబ్బుకు నసించిజెన్నీ.

* 24:33 సే కలో బడేవక్కురైకిరి తలుపు వక్కురె అచ్చి

సే బయంకరమైల దినో కాకు తెలిసిని

(మార్కు 13:32-37; లూకా 17:26-30,34-36)

³⁶ సే దినెరె గురించి నీనే సే గడియరె గురించి పరలోకంరె దేవదూతలకు గాని, పోకు కాని కాకు బుజ్జని. బోకు మాత్రమాక తెలుస్సు.

³⁷ నోవహు కలై క్యాకిరి అచ్చివో మనమరొ పో అయితల్లాబెల్లె కూడా సాకిరాక తాసి.

³⁸ జలప్రలయంకు అగరె దినెజాంక నోవహు బోయితో బిత్తరకు జెల్లాదినెజాంక మనమానె క్షైకుంట, పికుంటా, బ్యానె కొరిగికుంటా రొయితవ్వె.

³⁹ ప్రలయం అయికిరి తంకల్లకు కొడిగిబాజిసి జాంక తంకు బుజ్జనీ. మనమరొ పో కూడా సాకిరాక నాబుజ్జికుంటా ఆసి.

⁴⁰ సెల్లె దీలింకె వండ్రపోనె బిల్లొరె పైటి కొరుకుంటా రొసె. జొనె కొనిగిబాజివురొ యింకో జొనుకు సడిదివురొ ఊసి.

⁴¹ దీలింకె తిల్లాలింకె తిరగలి యిసురుకుంటా తన్నె జొనుకు కొనిగిబాజివురొ యింకా జొనుకు సడిదివురొ ఊసి.

⁴² ప్రబువు కేదినొరె అయిలీసివో తొముకు బుజ్జని ఈనె సిద్ధంగా టారింబి.

⁴³ ఈనె యే వినయం తెలిసిగిండి. గొరొకు యజమాని సారొ కెబ్బుకు ఆసివో బుజ్జికిరి తన్నే, తా గొరొకు సారొకు నాఅయిదీకుంటా సతనైకిరి కాపలాతాసి.

⁴⁴ మనమరొ పో కూడా తొమె నాఅరక్కెలా గడియకు ఆసి. ఈనె తొమె కూడా సాకిరాక సిద్ధంగా తమ్మంచి.

విస్వాసంనీలా, విస్వాసం గలిగిలా సేవకుడు గురించి

(లూకా 12:41-48)

⁴⁵ ఉంచినె విస్వాసము తల్లా, తెలివివైలా సేవకుడు కేసే? గొరొ యజమాని తాకు తాగొరొ పైటికురిలింకు బొట్ట నమయంరె బత్తో దీతె లొగిసి.

⁴⁶ గొరొ యజమానుడు మనమ అయిలబెల్లె సే పైటి మనమ యజమానుడు కొయిల పైటి కొరికిరి తన్నె సెయ్యె బడే దన్యుడు.

47 సాకిరి కొర్లాబెల్లె మియ్యి తొముకు సొత్తాక కొయిలించి, గొరొ యజమాని నే పైటి మనమకు తాకు తల్లా ఆస్తంపరె తాకు అదికారిగా నియమించుసి.

48 ఈనె పైటి మనమ చెడ్డాట యీనె తాబిత్తరె సెయ్యె మోగొరొ యజమాని యింక అయిని బులి మనుసురె, బులిగీకిరి

49 తా సంగరె పైటికొరిలాలింకు మరిపురొ మొదలు లొగిసి. సెత్తాకనీకిరి పీలాలింకె సంగరె మిసికిరి కైకిరి, తాసి.

50 యజమాని తా పైటి మనమ నావదురు దిగిలాదినె, తంకు నాబుజ్జిలా సమయంరె అయివొ.

51 తాకు ముక్కలు కొరికిరి నరకం బిత్తరె పొక్కదూసి. సే నరకంరె వేనదారులల్లా కందికుంటా దంతొనె కమిడిగీకుంటా బాదకు అనుబవించుసె.

25

దొస్త దిండపిల్లానెరో ఉపమానం

1 పురువు రాజ్యంరె యాకిరి రొవ్వొ, దొసిలింకె దిండానె తంకె తంకరొ బొత్తినె దరిగీకిరి బ్యాబొరుకు మిసిగితే జెల్లాలింకు పొలికిరచ్చి.

2 తంకె బిత్తరె పంచిలింకె తెలివినీలాలింకె; పంచిలింకె తెలిసిగల్లాలింకె.

3 తెలివినీలా దిండానె బొత్తినె దరిగీకిరి జేసె. ఈనె తంకసంగరె తెల్లొ దరిగీకిరిజెల్లానింతె.

4 తెలివొల్లొ దిండానె తంకె బొత్తినె పాటు సీసానె తెల్లొ కూడా దరిగీకిరి జేసె.

5 బొర్రొ అయితె ఆలన్యం ఈసి. సొబ్బిలింకె కునికిపాటుసంగరె గుమ్మా అయికిరి గుమ్మిజీసె.

6 మొజరత్తిరె గుటె కేక సుందీసి, ఇదిగొ బొర్రొ అయిసి, అయికిరి మిసిగిండి బులి.

7 వెంట్రాక సే దొసిలింకె దిండానల్లా ఉటికిరి తంకె బొత్తినె సరికొరిగిచ్చె.

8 ఈనె తెలివివీనిలా దిండానె అం బొత్తినె తెల్లో అల్లా యిజేసి తొం తెల్లో కుండె అముకు దేండి బులి తెలివిగల్లా దిండానుకు మగినె.

9 తెలివి గల్లా దిండానె, యే తెల్లో అముకల్లా సారిపొడిసికివో, కొట్టుకు జేకిరి తొం కోసం తెల్లో గినిగీకిరి అయిండి బులి కొయినె.

10 ఈనె తంకె తెల్లో గినిగిఅయితే జెల్లాబెల్లెకు బోర్తొ అయినె. సిద్ధంగా తల్లా పంచిలింకె దిండానె బ్యాకద్దీనుకు తాదీకిరి మిసికిరి బిత్తురుకు జేసె. నేతర్వాతరె తట్టినె పొగిపీసె.

11 తల్లా దిండానె అయికిరి బో, బో, తలుపు పిటు బులి బొట్ట కేకానె పొగినె.

12 ఈనె సెయ్యె మియ్యె సొత్తాక కొయిలించి; తొమె కేసెవో మెత్తె తెలిసిని బులి కొయినె.

13 తొముకు సే దినో, సే సమయం కెబ్బుకు ఆసివో తెలిసిని గనక సిద్ధపొడికిరి టార్చెంచి.

తిల్లింకె సేవకునెరొ ఉపమానం

(లూకా 19:11-27)

14 పురువురొరాజ్యం యాకిరి అచ్చి, జొనె మనమ దూరుదెసాకు ప్రయానం జేకుంటా తా సేవకుడుకు డక్కికిరి తా ఆస్తికు అప్పగించిలా యజమానుడుకు పొలికిరచ్చి.

15 జొనుకు పాటవెయ్యె సున్న నానేలు దీసి. యింకజొనుకు దీటవెయ్యె సున్ననానేలు, తింటో మనమకు గుటెవెయ్యె సున్న నానెం. తంకు తంకె సామర్థ్యం దిక్కిరి దీసి. నే తరవాత ప్రయానం కొరిసి.

16 పాట వెయ్యె సున్న నానేలు పొందిలా మనమ వెంట్రాక జేకిరి నే పలియసంగరె బొజొకొరికిరి యింకా పాట వెయ్యె సున్ననానేలు సంపాదించిసి.

17 సాకిరాక దీట వెయ్యె సున్న నానేలు పొందిలాట జేకిరి యింకా దీట తలాంతులు సంపాదించిసి.

18 ఈనె గుట్టె వెయ్యె సున్న నానేలు పొందిలాట జేకిరి గుటె గత్తో కులికిరి తా యజమాని దిల్లా గుట్టె కూడా గత్తోరె నుచ్చిదీసి.

19 బడేకలో తరవాతరె సే సున్న నానేలు దిల్లా సేవకునెరొ
యజమానుడు అయికిరి లెక్కలు దిగిసి.

20 పాట వెయ్యి సున్న నానేలు పొందిలా మనమ యింకా పాట
వెయ్యి సున్న నానేలు దన్నెకిరి బో, తూ మెత్తె పాటవెయ్యి సున్న
నానేలు దీసు. సడసంగరె మియ్యి ఇంకా పాటసోయి సున్న నానేలు
సంపాదించించి దిగు బులిసి.

21 సే యజమాని యాకిరి కొయిసి బడే బొట్ట పైటి కొరిసు తోబితైరె
బొట్టగునో, విస్వాసం అచ్చి. తువ్వ కొంచెమురె నమ్మకంగా పైటి
కొరిసు. గనక మియి తొత్తె బడేంచంపరె బొడొమనమగా కొరుంచి. తో
యజమాని సంగరె మిసికిరి సంతోసంకు బంటిగును బులి కొయిసి .

22 దీట వెయ్యి సున్న నానేలు పొందిలా మనమంకా అయికిరి,
బో, మెత్తె దీట వెయ్యి సున్న నానేలు దీసు. మియి యింకా దీట
సంపాదించించి దిగుబులి బులిసి.

23 సే యజమాని, బొట్ట పైటి కొరిసు తోబితైరె బొట్టగునో, విస్వాసం
అచ్చి. తువ్వ కొంచెమురె నమ్మకంగా పైటి కొరిసు గనక తొత్తె యింకా
బడేంచంపరె అదికారిగా కొరుంచి, తో యజమానిసంగరె మిసికిరి
సంతోసంగా తా బులిసి.

24 సెల్లె గుట్టె వెయ్యి సున్న నానేలు పొందిలా మనమ అయికిరి
బో, తూ బొట్టనిబులి మెత్తె తెలుసు. విత్తనం నాపొగిలా చోటురె తూ
కట్టుసు బులి, నా జల్లిలాచోటురె పచ్చకు పొగు కొరిలాట బులి.

25 సడకు మియి డొరికిరి తో సున్న నానేలు దనిగిజేకిరి బూమిరె
నుచ్చిదించి. ఇదిగో తోట తూ కడుగును బులి కొయిసి.

26 సడకు సే యజమాని, తా సంగరె తూ బద్దకం మనమ, చెడ్డ
దాసుడు మియి నాపొగిలా చోటురె కట్టిలాట, విత్తనం నాజల్లిలా
చోటురె పొగుకొరిలాట బులి తొత్తె తెలుసునా?

27 సాకిరి కొరికిరి తన్నే మో పలియ వడ్డిలింకు పక్కరె సడదిన్నే మీ
అయికిరి వడ్డిసంగరెసహా కడిగింతా బులికిరి,

28 తా పక్కరె తల్లాటకు కడిగీకిరి దొస్టవెయ్యి సున్న నానేలు
తల్లాటకు దీసి.

29 రొల్లా ప్రతిమనమకు యింకా బడేంచదూసి. సెయ్యె సముద్ధి కలిక్కిరితాసి. ఈనె నీలాట పక్కరెదీకిరి తాకు తల్లాటకుండాంక కడిగివురొ ఊసి.

30 ఈనె సే నాఫైటికైలా దాసుడుకు బయలై వొందారై పొక్కదేండి. సెట్టె కందికుంటా, దంతోనె కముడుకుంటా తాసి బులిసి.

అంతిమ తీర్పు

31 తేజోవంతుడైలా మనమరొ పో తా దేవదూతల సంగరె మిసికిరి అసి. అయికిరి తేజోవంతమైలా తా రొజా సింహాసనం ఉంపరె బొసురుసి.

32 సెల్లె సొబ్బిదెసొనొ మనమానుకు పొగు కొరికిరి తా అగరె తారదీపించుసి. సెల్లె జొనె గొర్రీనె జొగిలొతా తా మందరె మేకనెకు, గొర్రీనుకు వేరు కొరిలాపనికిరి దీట గుంపునెగా కొరుసి.

33 సే తా నీతిమంతునెకు కైలత్తో ఆడుకు, బాఅత్తో ఆడుకు కు మిగిల్లాలింకు తల్లాపనికిరి తారొపించుసి.

34 సెల్లె రొజా తా కైయిలత్తాడుకు తల్లాలింకెసంగరె, మో బోరొ ఆసీర్వాదంకు పొందిగిల్లాలింకే. తొమె అయిండి, అయికిరి లొకొకు పునాది పొగిలాబెల్లాక తొం కోసం సిద్ధపరిచిలా రాజ్యంకు రొయిదికిరి ఆంచి అయికిరి కడిగిండి.

35 కిరుకుబుల్చొ, మియి బొక్కొసంగరె తల్లాబెల్లె తువ్వు మెత్తె కద్దిదీసా. గొలారిలబెల్లె తువ్వు మెత్తె పనిదిసో. పరదేసియునిగా తొ పక్కరకు అయిలాబెల్లె తొమె మెత్తె ఆతిద్యం దీసా.

36 కొన్నానె కావలిసిలాబెల్లె తొమె మెత్తె కొన్ననెదిసో. జబ్బుసంగరె తల్లాబెల్లె తొమె మెత్తె సేవ కొరుసా. మియి చెరసాలరె తల్లాబెల్లె అయికిరి పలకరించుసా బులి కొయిసి.

37 సెల్లె నీతిమంతునె, ప్రబూ, తువ్వు బొక్కొసంగరె తల్లాబెల్లె అమె కెబ్బె తొత్తె కద్ది దీంచొ? తువ్వు గొలారిలబెల్లె తొత్తె పనికెబ్బె దీంచొ?

38 తువ్వు పరదేసియునిగా కెబ్బె అయిను? తొముకు కెబ్బె ఆహ్వానించించొ? తొత్తె కెబ్బె కొన్నానె కావాలిబులికిరి అయిను? కొన్నానె తొత్తె కెబ్బెదీంచొ?

39 తువ్వు నాబొల్లరొకిరి రొల్లాబేల్లే అమె కెబ్బె దిగించో? తువ్వు చెరసాలరె కెబ్బె అచ్చు? తొముకు దిగితె కెబ్బె అయింఱో? బులి పొచ్చిరిసె.

40 సే రొజా, ఎడ సొత్తాక. హీన స్తీతిరె తల్లా మా బయినుకు తొమె కొరిల ప్రతి సాయము మెత్తె కొరిలాపనాక బులిగుంచి బులి జవాబు కొయిసి.

41 సే తరవాతరె సే రొజా తల్లాలింకు దిక్కిరి సాపగ్రస్తులింకె, మెత్తె సడికిరి జాండి! సాతానుకు, తా దూతలకు సిద్ధం కొరిలా నిత్యమూ పుడ్డెతల్లా నియ్యబిత్తురుకు జాండి.

42 కిరుకుబుల్లే, మియి బొక్కొనంగరె తల్లాబెల్లె తొమె మెత్తె కద్ది దిల్లానింతో. గొలారిలబెల్లె తొమె మెత్తె పీతె పనిదిల్లానింతో.

43 మియి పరదేసిగా అయిలబెల్లె తొమె మెత్తె అహ్వొనించిలానింతో. మెత్తె కొన్నానె కావలిసిలాబెల్లె తొమె కొన్నానె దిల్లానింతో. మియి జబ్బుసంగరె చెరసాలరె రొల్లాబెల్లే తొమె మెత్తె సేవకొరిలానింతో బులి కొయిసి.

44 సెల్లె తంకె కూడా, ప్రబూ తువ్వు బొక్కొనంగరె గాని, ఈనె గొలారిల సంగరె రొల్లాబెల్లే కాని, ఈనె పరదేసియునిగా కాని, ఈనె జబ్బుసంగరె చెరసాలరె తల్లాపని కెబ్బె దిగించో? సాకిరి దిక్కిరి కూడా తొముకు కెబ్బె సాయం కొరిలానింతో? బులి కొయిసె.

45 ఈనె, ఎడ సొత్తాక. దీనస్తిదితిరె తల్లా జొనుకన్నా తొమె సాయం కొర్నే సెల్లె మెత్తె సాయం కొరిలాపనాక బులి కొయిసి.

46 ఈనె “అంకె జేకిరి నిత్య సిక్కుకు అనుబవించివె. ఈనె నీతిమంతునె నిత్యజీవంకు జోసే.”

26

మనమానె గుంపు యేసు వ్యతిరేకంగా అయివురొ

(మార్కు 14:1; 2; లూకా 22:1; 2; యోహాను 11:45-53)

1 సెల్లె యేసు తా బోదకు ముగించిలా తరవాతరె సిస్యునె సంగరె యాకిరి కొయిసి.

2 “దీట దినె తరవాతరె పస్కాపారువో అయిలబెల్లె తొముకు బుజ్జును. సెల్లె మనమరొ పోకు సిలువ పొగితె అప్పగించుసె” బులి కొయిసి.

3 ప్రదానయాజకూనె, బొడిలింకె, కయప బులి డక్కితల్లా ప్రదానయాజకుడురొ బవనం అగరె చేరిగిచ్చె.

4 యేసుకు తంకె కిరొ గుట్టె కుట్రసంగరె బందించికిరి మొరదిమ్మంచిబులి కాకూ మాయోపాయం కొరుసె.

5 “ఈనె పారువో దినొరె నాబులి, సాకిరి కొర్నే మనమానై కొలీనె ఊసె” బులి బులిగిచ్చె.

బేతనియరె యేసుకు తెల్లొపొక్కిరి అబిసేకించువురొ
(మార్కు 14:3-9; యోహాను 12:1-8)

6 యేసు బేతనియరె కుస్తురోగైకిరి బొలైజిల్లా సీమోను గొరై అచ్చి.

7 యేసు కడ్డికైతందుకు బొసిరికి తల్లాబెల్లె జొనె మొట్ట *చలువరాతిబుడ్డిరె బడే కరీదైల అత్తరు సంగరె సెయ్యె పక్కరకు అయికిరి తా ముండొవుంపరె అత్తరు పొగిసి.

8 యెడ దిక్కిరి సిస్యునెకు రగొ అయిసి “కిరుకు యాకిరి వ్యర్లంకొరును? బులి పొచ్చిరిసె.

9 ఏ అత్తరు బడే బూతు బిక్కికిరి సే పలియ బీదలింకు దివ్వలిసిలాట” బులి తంకె కొయిసె.

10 యేసు ఏ విసయం తెలిసిగీకిరి, తంకు యాకిరి కొయిసి “తాకు కిరుకు బులిసా? సెయ్యె మోకోసం బొట్ట పైటి కొరిసి,

11 బీదలింకె కెబ్బుకు తొంసంగరె రొనె. ఈనె మియి తొంసంగరె కెబ్బుకు తొం సంగరె తన్నిని.

12 సెల్లె యేసు సెయ్యె సే అత్తరు మో దేంపర వోడదీకిరి మెత్తె సమాది కొరితె తయారు కొరిసి.

13 ఏడ సొత్తాక యే సువార్తకు లొకొరె కే చోటురె కొయినెను సెయ్యె గురుతుకు ఆసి. సెయ్యె కొరిలాట కూడా కొయిగుచ్చె” బులి కొయిసి.

* 26:7 అల్బస్థరు బుల్లా మ్రుదువైలా పొత్తోరొ సంగరె కొల్లా విలువైలా గుటె సీసా

యేసుకు అప్పకొయితే యూదా వొప్పిగివురో
(మార్కు 14:10,11; లూకా 22:3-6)

14 నె తరవాతరె పన్నెండుగురు బిత్తరె యూదా ఇస్కరియోతు ప్రదానయాజకూనె పక్కరకు జేసి.

15 “తాకు తో అప్పగించినె తొమె మెత్తె కిరదూసా?” బులి ప్రదాన యాజకూనెకు పొచ్చిరిసి. తంకె ముపై వెండి కాసులు లెక్కకొరికిరి దీసె.

16 నెల్లిదీకిరి యూదా తాకు దరికిరి దిమంచెబులి సరైలా సమయం కోసం ఎదురు దీగిలీసి.

యేసు తా సిస్యనె సంగరె పస్కా కద్దికు కయివురో
(మార్కు 14:12-21; లూకా 22:7-13,21-23; యోహాను 13:21-30)

17 నాపులిసిల రొట్టినె కైలా పొరొవొ దినె అయిసి. సే పొరై తొలిదినె సిస్యనె యేసు పక్కరకు అయికిరి, పస్కాపొరువొ కద్దినె కేటె తయారు కొరుబులును? బులి పొచ్చిరిసె.

18 యేసు యాకిరి జవాబు కొయిసి, పట్నం బిత్తురుకు మియి కొయిల మనమ పక్కరకు జాండి తాసంగరె మో సమయం పక్కరకు అయిసి. మియి మొ సిస్యనె సంగరె మిసికిరి పస్కాపొరువొ కద్ది తొ గొరై కొరిమంచె బులిగిలించొ బులి అం గురువు కొయిసి బులికిరి బులి కోడి.

19 సిస్యనె యేసు కొయిలాపనికిరి పస్కాపొరువొ కద్ది సిద్దం కొరిసె.

20 సొంజయిలబెల్లె యేసు పన్నెండు లింకె సంగరె మిసికిరి కైయితందుకు బొసిరిసె.

21 సొబ్బిలింకె కైతల్లాబెల్లె యేసు తంకె సంగరె “తొబిత్తరె జొనె మెత్తె దరిపించుని” బులి కచ్చితంగా కొయిసి.

22 తంకు బాద కలిగికిరి ప్రతి జొనె తంసంగరె, “ప్రబూ, మీ నా” జొనె తరవాతరె జొనె పొచ్చిరిసె.

23 యేసు సమాదానం కొయికుంటా, “మోసంగరె మిసికిరి గిన్నెరె రొట్టె ముంచులాటాక మెత్తె అప్పకొరుసి.

24 మనమరొ పో లేకనాలె రాసికిరితల్లాపనికి మొరుజూసి. ఈనె మనమరొపోకు అప్పుకొయిలా మనమకు బడేకన్టా కలుగుసి. సెయ్యె నాజొన్నైకిరి తన్నే బొల్ల” బులి కొయిసి

25 సెల్లె సెయ్యె ద్రోహం కొరిల యూదా, బోదకుడా “మియ్యినా” బులి పొచ్చిరిసి. యేసు, తువ్వు కొయిలాపనికిరాక బులిసి.

ప్రబు రత్తిరో కద్ది

(మార్కు 14:22-26; లూకా 22:14-20; 1 కొరింది 11:23-25)

26 తంకె కైతల్లబెల్లె యేసు గుటె రొట్టె కడికిరి క్రుతజ్ఞతాస్తుతులు అర్పించికిరి సడకు బంగికిరి సిస్యనెకు దీకుంటా, “ఎడ కడిగీకిరి కాండి! ఎడ మో దే” బులి కొయిసి.

27 సే తరవాతరె పాత్రకు కడిగీకిరి క్రుతజ్ఞతాస్తుతులు అర్పించికిరి తంకు దీకుంటా, “సొబ్బిలింకె ఎ పాత్రరె తల్లాట పిండి.

28 యెడ మో రొగొతో. సొబ్బిలింకు కోసం పాపక్సమాపన నిమిత్తం చిందించిలా పురువురో నిబంధన రొగొతో.

29 ఆజిదీకిరి మో బో రాజ్యంరె తొంసంగరె మిసికిరి ఎ నాట ద్రాక్సరనంకు యింకాపీలా జాంక పినీబులికిరి తొంసంగరె నిచ్చియంగా కొయిలించి”

30 సెల్లె తంకె కీర్తనకు గైకుంట ఒలీవపొరొతో వుంపరకు జేసె.

పేతురు సారొకొతాలగుసి బులి యేసు అగరాక కొయివురో

(మార్కు 14:27-31; లూకా 22:31-34; యోహాను 13:36-38)

31 సే తరవాతరె యేసు తంకె సంగరె, “ఏ రత్తిరె తొమె మో కారనం వల్లరె చెదరిజూసా. కిరుకుబుల్చే, మియి గొర్రీనె జొగిలాటకు మరుంచి సెల్లె మందరో గొర్రీనె చెదిరిజోసె బులి రాసికిరి అచ్చి.

32 ఈనె మియి మొర్నొదీకిరి ఉటిలబెల్లె తొంకన్నా అగరె గలిలయకు జోంచి” బులి కొయిసి.

33 పేతురు, “సొబ్బిలింకె తొత్తె సడికిరి జెన్నెను మియి మాత్రం తొత్తె సడికిరి జెన్ని” బులి సమాదానం కొయిసి.

34 యేసు, “ఎడ సొత్తాక. యే రత్తికి కూడ నాడక్కిలా అగరె మియి కేసెవో బుజ్జినిబులి తింటసారి కొయివు” బులి పేతురుకు సమాదానం కొయిసి.

35 ఈనె పేతురు, “మియి తొనంగరె మిసికిరి మొరుజిన్నన్నా, తువుకెసో మెత్తె బుజ్జినిబులి కొయిసి” బులి బులిసి. సిస్యునె సొబ్బిలింకె సాకిరాక కొయిసె.

గెత్తేమనే బుల్లా తొటరె యేసు ప్రార్థన
(మార్కు 14:32-42; లూకా 22:39-46)

36 సే తరవాతరె యేసు సిస్యునె సంగరె మిసికిరి గెత్తేమనే బుల్ల సొటుకు జేసి. తంకె సంగరె, “ఎట్టె బొసురొండి. మియి కుండెదూరు జేకిరి ప్రార్థనకొరుంచి” బులి కొయిసి.

37 యేసు పేతురుకు, జెబెదయి దీలింకె పోనె తా పొచ్చాడె డక్కిగీకిరి జేసి. సెయ్యె దుక్కొనంగరె, కలతసంగరె పూరికిరచ్చి.

38 సెల్లె సెయ్యె తంకసంగరె, “మో ఆత్మ మొర్నొ వేదన పొడిలీసి. ఎట్టె తయికిరి మోసంగరె పాటు సతనైకిరి టారించి” బులి కొయిసి.

39 యేసు యింకా కుండె దూరు జేకిరి సాస్థంగపొడికిరి, “మో బో! సాద్యమైనె దుక్కొనంగరె పూరిలా యే పాత్రకు మో పక్కరె దీకిరి కడిపె! ఈనన్నా నెరవేరవలిసిలాట ఎడ మో ఇస్థంనీ, తో ఇస్థం సంగరాక” బులికిరి ప్రార్థించిసి.

40 సే తరవాతరె బులిక్కిరి అయికిరి సిస్యునె గుమ్ముకుంటా తవ్వరొ గమనించిసి. సెయ్యె, “మోసంగరె మిసికిరి గుటె గంట సేపంకా సతనైకిరి రొన్నారిసోనా?” బులి పేతురుకు పొచ్చిరిసి.

41 తొమె సోదనరె నాపొడుకుంటా “సెతనైసికిరి రొయికిరి ప్రార్థనకొరొండి! ఆత్మ సిద్ధమాక ఈనె దేరె బలహీనంగా అచ్చి!” బులి పేతురు సంగరె కొయిసి.

42 సెయ్యె దీటోసారి జేకిరి, “మో బో! ఎ స్రమ బుల్లా పాత్రరె తల్లాట పీమాసిబులి తన్నే మియి సడకు పూంచి. తో ఇస్థమాక నెరవేరిమాసి!” బులి ప్రార్థన కొరిసి.

43 సెయ్యో ఇంగుట బులికిరి అయికిరి తా సిస్యనె యింకా గుమ్మికిరి రొపురో దిగిసి. అంకినె బరువైపురోవల్లరె తంకె గుమ్ము ఆపిగిన్నారినె.

44 సెయ్యో తింటసారి తంకు సడికిరి అగరె ప్రార్థదించిలపనిక యింకా ప్రార్థనకొరిసి.

45 సే తరవాతరె తా సిస్యనె పక్కరకు అయికిరి, “తోమెయింకా గుమ్మిలిసానా, విస్త్రాంతి కడిగిల్లిసానా? దిగొండి! మనమరో పో పాపాత్మునెకు అప్పగించిల గడియ పక్కరకు అయిసి బులి కొయిసి.

46 యింకా జెమ్మా, ఉటండి. అదిగో! మెత్తె అప్పగించిలాట అయిలీసి” బులి కొయిసి.

యేసుకు బందించువురో

(మార్కు 14:43-50; లూకా 22:47-53; యోహాను 18:3-12)

47 సెయ్యో కొతలకుంట రొల్లాబెల్లె పన్నెండుగురు బిత్తరె జొనె యూదా అయిసి. ప్రదానయాజకూనె, ప్రజాప్రముకునె పొడదిల్లా బొడుమనమానె గుంపు గుటె తంకె పొచ్చడె అయిసి. తంకె అత్తొనె కత్తినె, బడ్డినె, బల్లెలు సంగరె అయిసె.

48 సే అప్పగించిలాట, “మియి జేకిరి కాకు చుమ్మో లొగుంచువో, తాకు బందించొండి!” బులి అగరాక గుటె గుర్తు దీసి.

49 యూదా వెంట్రాక యేసు పక్కరకు జేకిరి, గురువు బులి “వందనము కొయికిరి” తాకు చుమ్మోలోగ్గిచ్చి.

50 యేసు, “స్నేహితుడా! తువ్వు కొరితె అయిల పైటి కొరు” బులి కొయిసి. వెంట్రాక కుండెలింకె మనమానె అగురుకు అయికిరి తాకు దరిగీకిరి బందించినె.

51 యేసు సంగరె రొల్లాలింకె బిత్తరె జొనె వెంట్రాక తా కత్తికు వరదికిరి కడికిరి, ప్రదానయాజకుడురో పైటి మనమరో కన్నె అనిపేసి.

52 యేసు, తో “కత్తికు వరబిత్తరె లొగ్గి కత్తిట్టెక్కిల మనమా సే కత్తిసంగరాక మొరుజొసి.

53 మియి మో బో సహాయం కావాలబులి మగినారిబుగిల్లిసోనా? మియి మగిల వెంట్రాక పన్నెండు గుంపునె కన్నా బడెలింకు దేవదూతానెకు పొడిదిన్నీనా?

54 మీయి సాకిరి కోరినె యాకిరి జరిగిమంచెబులి లేకనాలై రాసిలాట క్యాకిరి నెరవేరుసి?” బులి కొయిసి.

55 సే తరవాతరె యేసు అయికిరి, మనమనెసంగరె, “దోపిడి సారొకు దరిగితై అయిలాపనికిరి కత్తినె సంగరె, బడ్డినె సంగరె అయిసాకిరా? మందిరంరె ప్రతిదినె బోదించించి. ఈనె సెల్లెతోమె మెత్తె బందించిలానింతో

56 ఈనె, ప్రవక్తానె రొంతిలంచ నెరవేరిమంచెబులి ఎడల్లా జరిగిసి” బులి కొయిసి. వెంట్రాక సెయ్యె సిస్యునె సొబ్బిలింకె తాకు సడికిరి పొలిజీనె.

యేసుకు మహాసబ అగరె లొగివురొ

(మార్కు 14:53-65; లూకా 22:54-55,63-71; యోహాను 18:13; 14:19-24)

57 తంకె యేసుకు బందించిలా ప్రదానయాజకుడైలా కయప పక్కరకు కొడిగీకిరి జేసె. సెట్టె సాస్తీనె, బోడిలింకె అగరాక కొడిగీకిరి అచ్చె.

58 ఈనె పేతురు కుండె దూరు తీకిరి యేసుకు ప్రదానయాజకుడురొ గొరొ జాంక పొచ్చాడెసి. గొరెబిత్తరె కెర జరిగిలీసివో దిగిమంచెబులి బట్టునె సంగరె మిసికిరి గొరొ దోరె టారిసి.

59 మొర్నొసిక్కు విదించిమంచెబులిగీకిరి ప్రదానయాజకూనె, మహాసబలింకె యేసుకు ప్రతికూలంగా, సారొసాక్య్య కోసం దిగినె.

60 బడే మంది సొర సాక్య్య కొయితె అగురుకు అయిసె. ఈనె మొరిదితె సారిల సాక్య్యం మిల్లనీ. చివరకు దిలింకె మనమనె అగురుకు అయిసె.

61 తంకె యాకిరి కొయిసె, “ఎ మొపో ‘మియి పురువురొ గుడికు నాననం కొరికిరి తింట దినై యింకా బందిపారి’ బులి కొయిసి.”

62 సెల్లె ప్రదానయాజకుడు ఉటికిరి టారికిరి యేసు, అంకె కొరిలా నేరారోపనకు తువ్వు సమాదానం కొయినూనా? బులి పొచ్చరిసి.

63 ఈనె యేసు జవాబు కొయిలాని. ప్రదానయాజకుడు, “సజీవుడైలా పురువుంపరె ప్రమానం కొరికిరి కో, తువ్వు పురువు పోయిలా క్రీస్తునా?” బులి పొచ్చరిసి.

64 యేసు జవాబు కొయికుంటా, “వై! తువ్వ బుల్లాట సొత్తాక. తొనంగరె కొయిలాట కిరబుల్నే యింక అగరె దీకిరి మనమరో పో గొప్పఅదికారం నంగరె సెయ్యె కైయిలత్తో ఆడుకు బొసిరికిరి రొవురో ఆకాసమంపరో మెగొనై అయివురో తొమె దిగుసో” బులి కొయిసి.

65 ఎడ సునికిరి ప్రదానయాజకుడు తా కొన్నానె సిరిగీకిరి, యెయ్యె డైవదూసన కొరిలీసి. పొదరిలింకె సాక్సినె కిరుకు? దిగొండి సెయ్యె పురువుకు దుసింబిలాట సునిసోనీనా!

66 ఈనె తొమె కిరబులిగిలిసో? బులి పొచ్చిరిసి. “తాకు మొర్నొదండన పొగిమంచెబులి” తంకె సమాదానం కొయిసె.

67 తంకె కుండెలింకె తా మూ ఉంపరె సెప్పొ పొక్కిరి మరిసె. ఈనె కుండెలింకె తాకు చెంప అంపరె మరికిరి.

68 “ఓ క్రిస్తూ! తొత్తె కేసె మరిసెవో కనుగును” బులి పొచ్చిరిసె.

పేతురు యేసు కేసో తెలుసునీ బులి కొయివురో
(మార్కు 14:66-72; లూకా 22:56-62; యోహాను 18:15-18,25-27)

69 ఎట్టె పేతురు బయిలై బొసిరికిరి తల్లాబెల్లె జొనె ప్రదానయాకుడొరో పైటి మొట్ట తాపక్కు అయికిరి, “తువ్వ కూడా గలిలయుడైలా యేసునంగరె తల్లా మనమాకనీనా?” బులి పొచ్చిరిసి.

70 ఈనె సెయ్యె తంకెల్లా అగరె, “తువుకిర కొతలగిలిసివో మెత్తె బుజిని!” బులి కొయిసి.

71 సె తరవాతరె తంకె అల్లా సెటె దికిరి ద్వారం పక్కరకు జేసె. సెట్టె తాకు యింకోదాసి పిల్ల దీకిరి, సెట్టెతల్లా మనమానె నంగరె, “యే మోపొ, నజరేయుడైలా యేసునంగరె తల్లాటాకనీనా!” బులి కొయిసి.

72 పేతురు ఒట్టులోగికిరి యింకా సెయ్యె తా కొతానుకు నిబులికిరి, “మెత్తె సే మనమా కేసెవో బుజిని!” బులి కొయిసి.

73 కుండె సేపైలా తరవాతరె సెట్టె టారికిరి తంకె పేతురు పక్కరకు అయికిరి, “సొత్తాక తువ్వాక తంకబిత్తరె జొన్నాక. తో కొతాతీరు దిగితన్నే గలిలయుడురె జొనె బులి తెలివైలీసి” బులి కొయిసి.

74 సెల్లె పేతురు సొత్తాక కొయిలించి బులిసి. సెయ్యె పురువుంపరె ప్రమానం కొరికుంటా, “సే మనమ కేసెవో మెత్తె తెలిసిని” బులి కొయిసి. వెంట్రాక కూడ డక్కిసి.

75 “కూడ నాడక్కిలా అగరె మియి కేసెవో తెలిసినిబుల్లా కొత తినిబెల్లె బులుసు బుల్లా కొతా పేతురుకు జ్ఞాపకం అయిసి” పేతురు బయలుకు జేకిరి బొట్టగా కందిసి.

27

పిలాతు పక్కరకు యేసు

(మార్కు 15:1; లూకా 23:1,2; యోహాను 18:28-32)

1 సొక్కలైలాబెల్లె ప్రదానయాజకూనె, బొడిలింకె సొబ్బిలింకే కూడికిరి యేసుకు మొరదితే నిర్నయించిగిచ్చె.

2 తంకె తాకు బందించి కొడిజేకిరి రోమా ప్రదానఅధికారియాల పిలాతుకు అప్పగించిసె.

యూదారొ మొరొనొ

(అపో 1:18; 19)

3 యేసుకు అప్పగించిలా యూదా యేసుకు మొరొసిక్స నిర్నయించించిసె బులి జనికిరి బాదపొడిసి. మనుసు మార్చిగికిరి సెయ్యె కడిగిల్లా ముప్పై వెండినానేలు ప్రదానయాజకూనెకు, బొడిలింకు బులికిరి దిపికుంటా,

4 “మియి కే తప్పు నాకొల్లా మనమరొ రొగొత్తోకు అప్పకొయికిరి పాపం కొరించి. సే అమాయిడుకు మొరొక్కు అప్పగించించి” బులి కొయిసి. తంకె, “సడ తో కొలి అముకు సంబందం నీ” బులి బాజాబులి కొయిసె.

5 యూదా సే పలియకు దేవాలయంరె పొక్కదీకిరి, జేకిరి ఉరి పొగ్గిచ్చి.

6 ప్రదానయాజకులూనె సే వెండి నానేలు కడిగీకిరి, “యెడ మనమకు మొరదీతే రొగొత్తో దీకిరి గినిలా పలియ ఈనె యే పలియకు కానుకానెపెడిరె పొగివురొ బొట్టనీ” బులి కొయిసి.

7 తంకె ఆలోచించికిరి సే పలియనంగరె పరదెసారె తల్లాలింకు బుజ్జదీతెపైటికైలాపనికిరి జొనె కుమ్మరి మనమరొ పొలముకు గినిసె.

8 సడకు ఉంచునుకు కూడా “రొగొతో బూమి” బులి కొయివె.

9 సడసంగరె “తంకె ముప్పై వెండి నానేలు కడిగికిరి ఇస్రాయేలు మనమానె తా కోసం యిర్మీయా ప్రవక్త సంగరె పురువు పలికిలా యే కొతానె నెరవేరిసె.

10 ప్రబువు ఆజ్ఞాపించిలపనికిరి తంకె సే పలియనంగరె కుమ్మరి పొలముకు గినిసె.”

యేసుకు పిలాతు ప్రస్సించివురో

(మార్కు 15:2-5; లూకా 23:3-5; యోహాను 18:33-38)

11 యేసు రోమా ప్రదాన అధికారియాలా పిలాతు అగరె టారిసి. సెయ్యె “తూ యూదునెరొ రొజానా?” బులి యేసుకు పొచ్చిరిసి. “తూ కొయిలాట సొత్తాక” బులి సే కొయిసి.

12 ప్రదానయాజకూనె, బొడిలింకె తాంపరె తప్పు పొగిలాబెల్లె కూడా కిచ్చి కొయిలాని.

13 సెల్లె పిలాతు, “తంకె తొ ఉంపరె ఎత్తె నేరమూనె మోపిలీసెనీ తువ్వ సునువురొనీనా?” బులి పొచ్చిరిసి.

14 యేసు తువ్వ గుటె కొతకు కూడా జవాబు కొయిలాను. సడకు పిలాతు బడే ఆచ్చర్యపొడిసి.

యేసుకు మొర్నొకు అప్పగించివురో

(మార్కు 15:6-15; లూకా 23:13-25; యోహాను 18:39-19:16)

15 పొరువొ దినోనె మనమానె కోరిలా జొనె నేరస్తుడుకు సడిదిల్లా అలవాటు. సె ప్రదానఅధిపతి ఆచరించితవ్వె.

16 సే దినోనె బరబ్బా బుల్లా నా గల్లా జొనె నేరస్తుడు చెరసాలరె అచ్చి.

17 సడకు మనమానె తా పక్కు అయిలాబెల్లె పిలాతు, “కాకు విడుదల కొరుబుల్లీసో? బరబ్బాకునా నీనె క్రీస్తు బులి డక్కిలా యేసుకునా?” బులి తంకు పొచ్చిరిసి.

18 అసూయవల్లరె యుదా అదికారినె యేసుకు అప్పగించినె బులి పిలాతుకు తెలుసు.

19 పిలాతు న్యాయపీటం ఉంపరె బొసితన్నుగా తా నైపో, “సే నీతిమంతుడు వినయంరె జోక్యం కొరిగితైనా. మియి యే రత్తిరె తా గురించి సొప్పొరె కెత్తె కొస్తోనెకు అనుబవించించి” బుల్లా సందేసంకు పొడిదినె.

20 బరబ్బాకు సడికిరి యేసుకు మొర్నొసిక్కు పొగిలపని కోరిగిబులికిరి ప్రదానయాజకూనె, బొడిలింకె మనమానుకు రెచ్చుమరిసె.

21 పిలాతు “దీలింకెబిత్తరె మెత్తె కాకు సడదె బుల్లీసో?” బులి మనమానెకు పొచ్చిరిసి. బరబ్బాకు బులి తంకె సమాదానం కొయినె.

22 “ఈనె ‘క్రీస్తు’ బులి డక్కితల్లా యే యేసుకు మెత్తె కిరకొరుబుల్లీసో?” బులి పిలాతు పొచ్చిరిసి. సొబ్బిలింకె, “సిలువ పొగండి!” బులి కొయినె.

23 సడకు “సెయ్యె కిర తప్పు కొరిసి?” బులి పిలాతు పొచ్చిరిసి. ఈనె తంకె, “తాకు సిలువకు పొగండి” బులి యింకా గట్టిగా దొదిరిసె.

24 లబో కలిగితె మారుగా కొలినె మొదలైపురో పిలాతు గమనించినె. తరవాతరె సెయ్యె పని కడిగికిరి మనమానె అగరె సే పనిరె అత్తోనె దొయిగీకిరి, “తా రొగొతోకు మియి కారనం నీ. ఎడ తొ బాద్యత” బులి కొయినె.

25 మనమానె, “తా రొగొతో అమంపరె, అం పిల్లానె ఉంపరె తమ్మాసిగాక” బులి కొయినె.

26 సే తరవాతరె పిలాతు బరబ్బాకు సడిదీసె. ఈనె యేసుకు కొరడా మడ్డొనె మరికిరి సిలువకు పొగితె అప్పగించినె.

సైనికునె యేసుకు అవమానం కొరువురో
(మార్కు 15:16-20; యోహాను 19:2,3)

27 సే తరవాతరె అదికారినె సైనికునె యేసుకు రొజాబవనం బిత్తరుకు దరిగిజేకిరి, సెల్లె సైనుకులల్లా తా చుట్టూ చేరిసె.

28 తా కొన్నానెకు పిటికిరి, గొర్ర ఊదారంగు డెంగకొన్నాకు తాకు పిందిసె.

29 కొంటానె సంగరె గుటె కిరీటం బునికిరి తా ముండొపరె లొగిసె. తా కైలా అత్తోకు గుటె రెల్లుబడ్డి దీసె. తా అగరె ముడుకూనె పొక్కిరి నమస్కారం కొరుకుంటా, “యూదునెరొ రొజా, జయము” బులి అవమానం కొరిసె.

30 తావుంపరె సెప్పొ పొక్కిరి, సే రెల్లుబడ్డిదీకిరి తా ముండొపరె మరిసె.

31 తాకు అవమానం కొర్లా తరవాతరె సే డెంగకొన్నాకు కడిపికిరి తా కొన్నా తాకు పిందిసె. సేతర్వాతరె తాకు సిలువకు పొగితె కొనిగిజేసె.

క్రీస్తుకు సిలువ పొగివురొ

(మార్కు 15:21-32; లూకా 23:26-43; యోహాను 19:17-27)

32 తంకె బయలుకు జేతన్నుగా కురేనే ప్రాంతముకు చెందిలా సీమోను బుల్లా నా తల్లా మనమ దిగదీసి. తాకు బలవంతం కొరికిరి యేసు సిలువకు బొయిపించిసె.

33 తంకె గొల్గొతా బుల్లా చోటుకు చేరిగిచ్చె.

34 సెట్టె చేదు మిసిలా ద్రాక్సరసంకు యేసుకు పీతె దీసె. ఈనె సక్కి దిక్కిరి సడకు పీతె సెయ్యె ఇష్టపొడిలానీ.

35 తాకు సిలువకు పొగిల తరవాతరె తా కొన్నానుకు చీటీనె పొగ్గీకిరి బంటిగిచ్చె.

36 సే తరవాతరె సైనికునె బొసిరికిరి తాకు జొగులొ జొగిసె.

37 తావుంపరె, “యెయ్యె యూదునె రొజా యేసు” బులి నేరముకు గుటె చెక్కంపరె రాసికిరి తా ముండొపరె లొగిసె.

38 ఈనె తాసంగరె బందిపొటు దోపిడి సొరొనెదీలింకె జొనెకు కైలత్తాడుకు, యింకజొనుకు బాఅత్తాడుకు సిలువకు పొగిసె.

39 సే బట్టరె జెల్లాలింకె ముండొ బించుకుంటా తాకు అవమానం కొరిసె.

40 “గుడికి నాసనం కొరికిరి తింట దినె ఇంకాబందిలాట, తొత్తె తువ్వు కాపాడిగిత్తు. తువ్వు పురువురో పోయానె నే సిలువదీకిరి వొల్లికిరి ఆయి” బులిసె.

41 ప్రదానయాజకూనె సాస్తీనె, బొడిలింకె మిసికిరి తాకు సాకిరాక అవమానం కొరిసె,

42 “సెయ్యె పొదరిలింకు రక్సించుసి. ఈనె తాకు సెయ్యె రక్సిందిగిన్నాది. సెయ్యె ఇస్త్రాయేలు రొజాపనెనే సిలువదీకిరి వొల్లికిరి ఆయినె సెల్లె తాకు నమ్ముంచొ.”

43 సెయ్యె పురువుకు నమ్మిసి, “సెయ్యె పురువురో పో బులి కొయినె. పురువుకు కావలిసిలాటయినె తాకు ఉంచినాక రక్సించుసి” బులి కొయిగిచ్చె.

44 తాసంగరె సహా సిలువ పొగిలా దోపిడి సారొనంకా సాకిరాక అవమానించినె.

యేసు మొర్నొ

(మార్కు 15:33-41; లూకా 23:44-49; యోహాను 19:28-30)

45 దిప్పొరుపన్నెండు గంటలదీకిరి తినిగంటజాంక నే దెసల్లా వొందారొకమ్మిపేసి.

46 సుమారు తినిగంటయాలబెల్లె యేసు, గట్టిగా “ఏలీ, ఏలీ, లామా సబక్తానీ” బులి బొట్ట కేక పొగిసి. నే కొతకు, మో దేవా, మో దేవా, మో అత్తో కిరుకు సడిదీను? బులి అర్థం.

47 సెట్టె టారికిరితల్లా కుండెలింకె ఎడ సునికిరి, “సెయ్యె ఏలీయాకు డక్కిలీసి” బులి బులిగిచ్చె.

48 జొనె ఎంట్రాక దొమిడికుంటా జేకిరి గుటె స్పాంజి దవ్వెసి. సడ పులిసిలా ద్రాక్చరనంరె బుడ్డికిరి గుటె రెల్లుబడ్డికు లొక్కిరి యేసుకు పీతే దీసి.

49 ఈనె పొదరిలింకె, “టారైసె, తాకు కాపాడితె ఏలీయా ఆసికివొ దిగిమా” బులిసె.

50 యేసు యింకా గుటె కేక పొక్కిరి తా పొర్నొ సడిదీసి.

51 సే సమయంరె గుడిరొ తెర ఉంపరె దీకిరి తొల్లె జాంక దీటబాగంగా చిరిజీసి. బూకంపం అయికిరి బండలు బద్దల్లెజీసి.

52 సెల్లె సమాదీనె పిటిగిచ్చె. పురువురొ మొరిజిల్లా బడేలింకె పరిసుద్దులు దేనె ఉటిసె.

53 తంకె సమాదులు తీకిరి దోరకు అయినె. ఈనె యేసు జీకిరి అయిలాబెల్లె తంకె పరిసుద్దపట్టుముకు అయికిరి బడేలింకు దిగదీసె.

54 యేసుకు జొగులొ జొగిలా సతాదిపతి, సైనికులూనె బూకంపాలుకు, జరిగిలా సంగతీనెకు దిక్కిరి బడే డొరిజేకిరి, “యెయ్యె సొత్తాక పురువురొ పొ” బులి కొయిగిచ్చె.

55 బడేలింకె మొట్టానె దూరు తీకిరి దిక్కుంటా అచ్చె. అంకె యేసుకు పరిచర్యానె కొరితె గలిలయదీకిరి అనుసరించికిరి అయిలాలింకె.

56 తంకబిత్తరె మగ్దలేనే మరియు, యాకోబు యోసే రొ మా యాలా మరియు, జెబెదయి నైపొ అచ్చె.

యేసుకు సమాదికొరివురొ
(మార్కు 15:42-47; లూకా 23:50-56; యోహాను 19:38-42)

57 ఈనె సొంజైలాబెల్లె, పలియ తా యాలా యోసేపు అరిమతయి గాతీకిరి అయినె. సెయ్యెంకా యేసుకు వెంబడించిలాటాక.

58 సెయ్యె పిలాతు పక్కరకు జేకిరి యేసురొ దేకు దేబులి మగిసి. పిలాతు దే బులి ఆజ్ఞాపించినె.

59 యోసేపు సే దేకు కడిగీకిరి గుటె నోకొన్నరె చుట్టినె.

60 సే తరవాతరె గుటె బొట్ట పొత్తొకు తొలిపించికిరి తా కోసం కొరిగిల్లా నో సమాదిరె సడకు రొయిదీసి. సెల్లె గుటె బొట్టపొత్తొకు సే సమాదికు అడ్డుగా దొర్లిలించికిరి బాజేసి.

61 మగ్దలేనే మరియు, యింకజొనె మరియు సే సమాది అగరె బొసిరికిరి అచ్చె.

సమాది అగరె బటులునె జొగులొ

62 సడ విస్త్రాంతికి సిద్ధమైలా దినో. మరదిన్తె ప్రదానయాజకూనె, పరిసయ్యునె, పిలాతు సమక్సంరె కూడిగిచ్చె.

63 “బో, సే సారొకొతాలగిలాట జీకిరి తల్లాబెల్లె ‘తింటొదినొరె మియ్యి ఇంకా జీకిరి ఆంచె’ బులి కొయివురొ అముకు గుర్తు అచ్చి.

64 సడకు తింట దినొ జాంక సె సమాదికు జాగర్తగా జొగులో లొగు బులికిరి ఆజ్ఞాపించండి. సాకిరి నాకొర్నే తా సిస్సునె అయికిరి తా దేకు నుచ్చిదీకిరి, ‘నెయ్యె జీకిరి ఉటిసి’ బులి మనమానుకు కొయివొచ్చు. ఏ చివరి సారొకొతా అగరె సారొకొతా కన్నా గోరంగా తాసి” బులి కొయినె.

65 పిలాతు, బటులుకు దరిగిజేసి. “తంకు సమాదికు జాగర్తగా జొగువురొ తొ బాద్యత” బులి కొయినె.

66 తంకె జీకిరి సే సమాదికు ముద్ద పొక్కిరి బటులుకు సే సమాదికు జొగులో లొక్కిరి సడకు బద్దం కొరినె.

28

మొర్నొ దీకిరి జీకిరి ఉటివురొ

(మార్కు 16:1-10; లూకా 24:1-12; యోహాను 20:1-10)

1 విస్త్రాంతి దినొ యీజేసి. అద్దారొ సొక్కలెపైతల్లాబెల్లె మగ్దలేనే మరియ, యింకజొనె మరియ సమాది దిగితె జేసె.

2 వెంట్రాక గుటె బూకంపం అయిసి పరలోకందీకిరి ప్రబువు దూత అయికిరి సే సమాది పొత్తొ దొర్లింకిరి సేడ ఉంపరె బొసిరిసి అచ్చి.

3 సడ రూపం మెరిసిలాపనచ్చి. తా కొన్నానె మంచుపని దొగల్తెకిరి అచ్చె.

4 సమాదికు జొగొలో జొగిలా బటునె తాకు దిక్కిరి డొరొసంగరె వనికిజీకిరి, మొరిజిల్లాలింకె పని యీజేసి.

5 సే దేవదూత, మొట్టానె సంగరె యాకిరి బులిసి, “డొరితెనాండి, సిలువకు పొగిలా యేసు కోసం తొమె కుజ్జిలీసో బులి మెత్తె తెలుసు.

6 నెయ్యె యెట్టెని. నెయ్యె కొయిలాపనాక ఉటికిరి అచ్చి. తాకు రొయిదిల్లా సొటుకు దిగొండి.

7 వెంట్రాక జేకిరి తా సిస్యనె సంగరె కోండి, 'సెయ్యె మొర్నొ తీకిరి ఉటికిరైసి బులి. తొకన్నా అగరె గలిలయకు జోసి. తొమె తాకు సెట్టె మిసిగుచ్చొ' బులి కొయిసి. మియి కొయిలాట గుర్తు దీగిండి."

8 తంకె తా సిస్యనుకు కొయిమంచి బులి సమాదిపక్కరెదీకిరి డొరొసంగరె, ఆనందం సంగరె దొముడుకుంటా జేకిరి తంకు కొయిసె.

9 వెంట్రాక యేసు తంకు మిసిగీకిరి, "తొముకు సుబం" బులి కొయిసి. తంకె తా పక్కరకు అయికిరి తా గొడ్డొనంపరె పొడికిరి తాకు మొక్కిసె.

10 సెల్లె యేసు తంకసంగరె, "డొరితెనాండి. జేకిరి బయిసె సంగరె గలిలయకు జాబులికోండి. తంకె సెట్టె మెత్తె మిసిగుచ్చొ" బులిసి.

సైనికునెరొ సమాచారం

11 తంకె జేతన్నుగా. సెల్లాక కుండెలింకె సైనికునె పట్నుకు జేకిరి జరిగిలాటల్లా ప్రదానయాజకుడు సంగరె కొయిసె.

12 ప్రదాన యాజకునె, బొడిలింకె మిసికిరి గుటె కుట్రపన్నిసె. తంకె సైనికునెకు బడె పలియ దీసె.

13 ఈనె "తా సిస్యనె, 'మొజిరత్తిరె గుమ్మితల్లా బెల్లె అయికిరి తా దేకు సారిపీసె' బులి కోండి.

14 యే సంగతి పిలాతు పక్కు జెన్నే తాకు సాంతిపరిచికిరి తొముకు కే కన్ఠం నాఅయికుంటా అమె దిగుంచొ" బులి రెచ్చమరిసె.

15 బటులు పలియ కడిగికిరి తంకె కొయిలాపని కొరిసె. యూదునెరె యేకొతా బొల్లె వ్యాపించికిరి ఆజిజాంక వాడుకరె అచ్చి.

యేసు తా సిస్యనెకు దిగదివురొ

(మార్కు 16:14-18; లూకా 24:36-49; యోహాను 20:19-23; అపో 1:6-8)

16 సే తరవాతరె సె పదుకుండుగురు సిస్యనె గలిలయకు జేకిరి, యేసు కొయిల పొరొతంపరకు జేసె.

17 సెట్టె యేసుకు దిక్కిరి తాకు మొక్కిసె. ఈనె తంకబిత్తరె కుండెలింకె అనుమానం పొడిసె.

18 సెల్లె యేసు తంకపక్కరకు అయికిరి యాకిరి కొయిసి.
“పరలోకంరె, బూమంపరె తల్లా అదికారమల్లా పురువు మెత్తెదీసి.

19 ఈనె జాండి తొమె సొబ్బి దెసోనుకు జేకిరి, తంకు మో సిస్సునెగా
కొరొండి. బో నారె, పో నారె, పవిత్రాత్మ నారె తంకు బాప్టిసం దేండి.

20 మియి తొముకు కొయిలా కొతానల్లా తంకు ఆచరించు బులికిరి
బోదకొరొండి. మియి కెబ్బుకూ యే యుగాంతం జాంక తొ పొచ్చాడె
తాంచి” బులి కొయిసి.

సాత్త్వ పురుషురొ పవిత్రొ కొత
The Holy Bible in the Reli language of India: సాత్త్వ
పురుషురొ పవిత్రొ కొత (Bible)

copyright © 2023 The Word for the World International and Relli Translation Samiti, Vishagapatnam, Andra Pradesh

Language: Relli (Reli)

Contributor: The Word for the World South Asia

సాత్త్వ పురుషురొ పవిత్రొ కొత
నో నిబంధన, 2023

The New Testament in Relli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 26 Jun 2025 from source files dated 26 Jun 2025

46416fd4-e5d1-555f-9e24-8bbc94e50bd9